

# KAMEETHARI ÑAANTSİ ROSANKENATAKERI MATEO

---

Icharineyetari Jesucristo

(Lc. 3.23-38)

**1** <sup>1</sup>Jiroka iwairopaini icharineyetari Jesucristo. Tema iriitake icharine David-ni, ejatzi Abraham-ni. <sup>2</sup>Ikanta pairani Abraham-ni, itzimake itomi itakeri Isaac. Ikanta Isaac tzimanake itomi irirori, itakeri Jacob. Ikanta Jacob tzimanake itomi irirori, itakeri Judá. Te apaani ikanta itomi Jacob, osheki itomipaini. <sup>3</sup>Ikanta Judá rowaiyakaawo Tamar, itakeri Fares, iriima itsipa itakeri Zara. Ikanta Fares tzimanake itomi irirori, itakeri Esrom. Ikanta Esrom tzimanake itomi irirori, itakeri Aram. <sup>4</sup>Ikanta Aram tzimanake itomi irirori, itakeri Aminadab. Ikanta Aminadab tzimanake itomi irirori, itakeri Naasón. Ikanta Naasón tzimanake itomi irirori, itakeri Salmón. <sup>5</sup>Ikanta Salmón rowaiyakaawo Rahab, itakeri Booz. Ikanta Booz rowaiyakaawo Rut, itakeri Obed. Ikanta Obed tzimanake itomi irirori, itakeri Isaí. <sup>6</sup>Ikanta Isaí tzimanake itomi irirori, itakeri David. Iri pinkatharitantsiri. Ikanta pinkathari David rowaiyakaawo iina Urías, itakeri Salomón. <sup>7</sup>Ikanta Salomón tzimanake itomi irirori, itakeri Roboam. Ikanta Roboam tzimanake itomi irirori, itakeri Abías. Ikanta Abías tzimanake itomi irirori, itakeri Asa. <sup>8</sup>Ikanta Asa tzimanake itomi irirori, itakeri Josafat. Ikanta Josafat tzimanake itomi irirori, itakeri Joram. Ikanta Joram tzimanake itomi irirori, itakeri Uzías. <sup>9</sup>Ikanta Uzías tzimanake itomi irirori, itakeri Jotam. Ikanta Jotam tzimanake itomi irirori, itakeri Acaz. Ikanta Acaz tzimanake itomi irirori, itakeri Ezequías. <sup>10</sup>Ikanta Ezequías tzimanake itomi irirori, itakeri Manasés. Ikanta Manasés tzimanake itomi irirori, itakeri Amón. Ikanta Amón tzimanake itomi irirori, itakeri Josías. <sup>11</sup>Ikanta Josías tzimanake itomi irirori, itakeri Jeconías. Irojatzi itzimantanakari irirentzipaini ejatzi. Aripaite ripokaiyakeni

owayeripaini poñagainchari Babilonia-ki, inoshikanakeri maawoini inampiki.

<sup>12</sup>Ikanta ripiyaiyaani inoshikawetakari Babilonia-ki. Tzimapai itomi Jeconías irirori, iitakeri Salatiel. Ikanta Salatiel tzimanake itomi irirori, iitakeri Zorobabel. <sup>13</sup>Ikanta Zorobabel tzimanake itomi irirori, iitakeri Abiud. Ikanta Abiud tzimanake itomi irirori, iitakeri Eliaquim. Ikanta Eliaquim tzimanake itomi irirori, iitakeri Azor. <sup>14</sup>Ikanta Azor tzimanake itomi irirori, iitakeri Sadoc. Ikanta Sadoc tzimanake itomi irirori, iitakeri Aquim. Ikanta Aquim tzimanake itomi irirori, iitakeri Eliud. <sup>15</sup>Ikanta Eliud tzimanake itomi irirori, iitakeri Eleazar. Ikanta Eleazar tzimanake itomi irirori, iitakeri Matán. Ikanta Matán tzimanake itomi irirori, iitakeri Jacob. <sup>16</sup>Ikanta Jacob tzimanake itomi irirori, iitakeri José. Iriitake oimenthoritakari María. Jiroka María irootake tomintakariri Jesús, irijatzi iitakeri Cristo.

<sup>17</sup>Iriira icharineyetakari. Retanakawo Abraham-ni irijatzi David-ni, ikaataiyini 14. Ipoñaanaka David-ni irojatzi inoshikawetantakariri Babilonia-ki, ikaataiyini 14. Ripiyaiyaini inoshikawetakarira Babilonia-ki, irojatzi itzimantakari Cristo, ikaataiyini 14 eejatzi.

### Itzimantakari Jesucristo

(Lc. 2.1-7)

<sup>18</sup>Jiroka okanta itzimantakari pairani Jesucristo. Eenitatsi José iinathori oita María, ikashaakawo iinantyaawo. Temaita iñiilo intsipawaityaawo. Iro kantacha María motzitake, ikantakaakawo Tasorenkantsi. <sup>19</sup>Tema tampatzikashirerri rinake José irirori, ikowawetaka rookerome rimananekiini, te ikowi rowaari perowaitero inkemakoitero itzimashiwaitaka eentsite. <sup>20</sup>Ikanta ikenkithashiryawaaita José tsireniriki, romishimpyaakeri imaninkarite Pawa ikantakeri: “José, icharine David-ni. ¿Oitaka pikenkithashiryasantari pookero María? Payero, tema Tasorenkantsi kantakaawori omotzitantakari. <sup>21</sup>Arika intzimake eentsi, piiteri JESÚS. Iriira owawisaakotairine isheninkapaini ikaariperoshirewetakaga.” <sup>22</sup>Ari imonkaatakari maawoini rosankenatakeri pairani Kamantantaneri, ikantake:

<sup>23</sup>Ari owaiyakya tsinane kaari ñeerie shirampari, intzime otomi, Itaiteri Emanuel, akantziri apaanteki aaka: “Itsipatai Pawa.”

<sup>24</sup>Ikanta ikakitanake José, rimatakero okaatzti inintakaakeriri Pawa, raakero iinantyaawo. <sup>25</sup>Te raawimaitawo irojatzi itzimantakari eewarite otomi. Iitakeri JESÚS.

### Ripokake yowarentzi iñeeri Jesús

**2** <sup>1</sup>Itzimake Jesús nampitsiki Belén saikatsiri janta Judea-ki. Tema itzimantakari Jesús, ipinkathariwentantzira Herodes. Ari rareetakari

nampitsiki Jerusalén yowaientzipaini ikenapaakero rishitowapiintzira ooryaa. <sup>2</sup>Rosampitapaakeri: “¿Tsika risaikika iwinkatharite Judá-ite owakera tzimaintsiri? Janta nonampiki nopoñaakaga, noñaake impokiro niyotantakari tzimake. Iroowa nipokantaiyarini noñaapinkathateri.”

<sup>3</sup>Ikanta ikemawake pinkathari Herodes, antawo okantzimoshiretanakari, ari ikantakari maawoini Jerusalén-satzi. <sup>4</sup>Ikaimakaantakeri Herodes maawoini reeware Imperatasorentsitaarewo, eejatzi maawoini yowaientziite, rosampitakeri: “¿Tsikajaantaka intzimeka Cristo?”

<sup>5</sup>Ikantaiyanakeni iriroripaini: “Intzime janta nampitsiki Belén saikatsiri Judea-ki, ari okantzi rosankenare Kamantantaneri, ikantake:

<sup>6</sup>Isaiki nampitsi Belén janta Judea-ki, tekaatsi thainerone.

Ari impoñeeyaari pinkathariperori janta. Iri jewatairine isheninkapaini Israel-iite nashitari naaka.”

<sup>7</sup>Ikanta Herodes, ikaimakaantakeri pokaintsiri iñeeri owakerari tzimaintsiri, rosampitakeri: “¿Tsikapaiteka piñaakeri impokiro piyotantakari tzimake pinkathari?” <sup>8</sup>Ikamantakeri maawoini. Iroatzi ikantantanakariri irirori: “Ariwé, pimatero piyaate Belén-ki, pamine tsika risaiki eentsi. Arika piñaakeri, eejatzi pinkenapai jaka, pinkamantanaina. Niyaateeta naaka, noñaapinkathateri.” <sup>9</sup>Iroatzi riyaatantanakari.

Eejatzi iñaanairi impokiro iñaakeri chapinki inampiki. Iñaatziiri rowaatzinkapaaka, iro riyatantapaakawori pankotsi risaikakera eentsi.

<sup>10</sup>Ikanta iñaakerira rowaatzinkapaaka impokiro, kimoshire ikantaiyakaní.

<sup>11</sup>Areetaiyapaakaní pankotsiki, iñaapaakeri eentsi eejatzi inaanate María. Rotziwerowashitapaakari, iñaapinkathatapaakeri. Roosoryaakotapaakero ramakeniriri, ipapaakeri ooro, ipakeri kasankayetatsiri, ipakeri eejatzi kasankaari kepishaatatsiri. Osheki owinawo jirokapaini.<sup>a</sup> <sup>12</sup>Ikanta rimagaiyapaakeni, romishimpyaakeri Pawa, ikantziri: “Eero pipiyashitari Herodes. Pinkenanai otsipaki awotsi piyaatantaiyaari pinampiki.”

### Raperaataitziri eentsipaini

<sup>13</sup>Ari ripiyaawo yowaientzipaini. Rapiitairo imaninkarite Pawa riñaanatairí José rimishireki, ikantziri: “José, pishiyakayeri eentsi eejatzi inaanate nampitsiki Egipto. Ari pisakeri janta iroatzi nonkantantaimiri: ‘Pipiyai.’ Awotsikitake Herodes ritsitokeri eentsi.” <sup>14</sup>Kakitanake José, ikamantanakero María, tsireniriki rishiyaka Egipto-ki, raanakeri eentsi. <sup>15</sup>Ari risaikakeri janta, iroatzi ikamantakari Herodes. Ari imonkaataka rosankenatakeri pairani Kamantantaneri, ikantake:

Risaikawetaka notomi nampitsiki Egipto, nokaimairi ripiyai eejatzi.

<sup>16</sup>Ikanta Herodes, yotake ramatawitakeri yowaientzipaini, te ripiyashitaari. Ityaanakari imashirenka. Rotyaantake rowayeritepaini,

a 2.11 Ikantakoitziri jika “kasankaari kepishaatatsiri” iroatzi iitaitziri “Mirra”.

ikantakeri: “Piyaate Belén-ki, paperaateri eentsipaini. Pithonkeri maawoini, petanakyaari owakera tzimaintsiri irijatzi tzimaintsiri apite rosarentsite.” Tema ikamantakeri chapinki yowaientzi tsikapaite iñaakeri impokiro.

<sup>17</sup>Iro ikantantakari pairani Kamantantaneri jitachari Jeremías, ikantake:

<sup>18</sup> Icheraaperotatz Ramá-sato iragaiyani.

Osheninkathori Raquel-ni iraakotakariri eentsitepaini.

Iro owashiretantakari rowamayitaitakerowa maawoini eenchaanite.<sup>b</sup>

<sup>19</sup> Okanta osamanitake, kamai Herodes, irojatzi risaikake José nampitsiki Egipto. Ari riñaanatairu imaninkarite Pawa rimishirekiini, <sup>20</sup> ikantairi: “José, piyaatai pinampiki, paanairi peentsite pintsipataanairi inaanate. Tema kamai kowawetachari ritsitokerime.” <sup>21</sup> Rimatakeru José, piyaawo inampiki Israel. <sup>22</sup> Iro rareewetaa José inampiki, ikantaitawairi: “Pinkatharitai Arquela janta Judea-ki. Ripoyaataari ipaapateni Herodes.” Ari ikenkithashiretanaa José, eero ikenanai janta. Ari rapiitaitairi riñaanaitairi rimishireki, ikantairi: “Paamayaari Arquela.” Irojatzi ikenantanaari José Galilea-ki. <sup>23</sup> Ikanta riyatai, risakapai nampitsiki Nazaret. Irojatzi imonkaatantakari rosankenatakeri pairani Kamantantaneri, ikantake:

Nazaret-satzi iitaiteri.

### Ikamantantakeri Juan omitsitsiyaatantanerí

(Mr. 1.1-8; Lc. 3.1-9, 15-17; Jn. 1.19-28)

**3** <sup>1</sup>Okanta pairani ochempiki saikatsiri Judea-ki, ripokake Juan omitsitsiyaatantanerí, ikamantantzi. <sup>2</sup>Ikantantapaake: “Pipakairo pikaariperoshirewaitake, irootaintsi impinkathariwentantai jika Inkitesatzi.” <sup>3</sup>Iro riñaanetakari pairani Kamantantaneri jitachari Isaías, ikantake:

Richeraapiintaitake ochempiki, ikantaitzi:

Powameethatainiri Pinkathari tsika inkenapaake.

Poshiyakayero rotampatzikaitziro awotsi.

<sup>4</sup>Iithaaretakari pairani Juan, rontyagaitziro iwitzí camello, romathakitatkarí mashitsimashi. Rañaantari rowayetari maapataki, ririri iyaa pitsi. <sup>5</sup>Osheki pokashitakeriri pairani Juan, Jerusalén-satzi, Judea-satzi, ripokashitakeri eejatzi nampiyetawori antawaaki ñaa Jordán.

<sup>6</sup>Thawetakoyetapaaka ikaariperoshirewaitakera, romitsitsiyaayetawakeri ñaaki Jordán.

---

**b** **2.18** Jiroka Raquel iro iinani Jacob, inintaperotanewo inatzi. Irooma Ramá nampitsi ini, saikatsiri iipatsiteki isheninkapaini Israel. Ikenkithatakotatziro Mateo okaatzi rosankenatakeri pairani Kamantantaneri jitachari Jeremías ikenkithatakotziro Raquel eejatzi Ramá-satoite okemaatsitaiyani, tema athataatyawo Jerusalén-satoite onkemaatsitaiya arika rowamayitaitero eentsitepaini.

<sup>7</sup>Ripokawetaiyakani Fariseo-paini, eejatzi Sadoc-iite, ikowi romitsitsiyaatyaaame. Iro kantzimaitacha ikisathatawakeri Juan, ikantakeri: “Te pikameethashiretaiyini eeroka, poshiyashitakari maanke. ¿Poshiyakaatzi eero rowasanketaitzimi? <sup>8</sup>Kyaaryooperorika pipakagairo tsika pikantaweta pairani, pinkameethashiretaiyeni, poshiyaawo pankirentsi kithokitatsiri. <sup>9</sup>Eero pikantashirewaitashita: ‘Naaka icharine Abraham-ni, te okowaperota nipakagairo nokaariperoshirewaitzti.’ Pinkeme nonkante: ‘Eero pishamewaitashita piitakaatzi eeroka ikowaperotanewo Pawa, tema kantacha ratziritakairo jiroka mapi, iroowa poyaataiyyarine incharineytaiyyari Abraham-ni.’ <sup>10</sup>Eerorika poshiyawo pankirentsi kithokitatsiri, richekakagaitakawo shacha owaatoki kaari kithokitatsine, ragaitziro ritagaitero.

<sup>11</sup>Arika ripakaanairo atziri ikaariperoshirewetaka, ari nomitsitsiyaatantakyaa ñaa. Iro kantzimaitacha, awotsikitake matzirori ipinkatharentsitzi, nopinkathatzitari naaka, te onkantya roshiyakaina rimperatanewo nonowikyaantyaanariri i-zapato-te. Iriira oshiyakairone romitsitsiyaatantatyeyaaarime Tasorenkantsi, romitsitsiyaatantatyeyaaarime eejatzi paampari. <sup>c</sup> <sup>12</sup>Tema arika ankowiitero awankire, otekakitziro, irojatzi ataantakyaaawori otaaki. Iroowa aye okithoki, otekitakero, owakotakero. Ari inkantaiyyari Awinkatharite eejatzi, rinashiyetaiyyari atziri. Ineshironkayetairi inkaate kemisantanairine, iriima kaari pakairone ikaariperoshirewaitzi, ritagairi paampariki kaari tsiwakanetatsine.”

### Romitsitsiyaata Jesús (Mr. 1.9-11; Lc. 3.21-22)

<sup>13</sup>Ripokake Jesús antawaaki ñaa Jordán, ipoñaakawo Galileaki. Ripokashitakeri Juan romitsitsiyaateri. <sup>14</sup>Te ikowaweta Juan romitsitsiyaateri Jesús, ikantawakeri: “¿Oitaka pipokashitantanari naaka nomitsitsiyaatemi? Eeroka omitsitsiyaatenane naaka.” <sup>15</sup>Rakanakeri Jesús: “Nokowaperotatzi pomitsitsiyaatena. Iro inintakaakenari Pawa.” Kowanake Juan, ikantziri: “Aritake nomitsitsiyaatakemi.” <sup>16</sup>Raanakeri, romitsitsiyaatakeri. Iro ritonkaawetanaka Jesús, oshiyanaakawo ashitaryaanakityeyaaame inkite, iñagaitawakeri ripokashitakeri Tasorenkantsi ikenapaake inkiteki roshiyapaakari shiro. <sup>17</sup>Ikemaitatzi inkiteki ikantaitanake: “Notomi rinatzi jirika netakokitari, osheki nokimo shirewentakeri.”

---

<sup>c</sup> 3.11 *Ikantakotziri Juan jaka:* “Nopinkathatzitari naaka.” *Ikantatzi:* “Te onkantya roshiyakaina rimperatanewo nonowikyaantyaanariri i-zapato-te.” Tema pairani iro rantapiintziri apaani imperataarewo rayiniri i-zapato-te imperatariri. Iro roshiyakaawentziri jaka Juan. Tema imaperotatya rimatziro Jesús rawisantzi irirori, tekaatsi oshiyaaarine, te onkantaatsikaitya roshiyakaina naaka rimperatanewo.

**Inkaariperoshiretakagaiterime Jesús**  
*(Mr. 1.12-13; Lc. 4.1-13)*

**4** <sup>1</sup>Ikantakaanakari Jesús Tasorenkantsi, jatanake ocheinpiki,  
 ari ikowawetakari Kamaari inkaariperotakairime. <sup>2</sup>Osheki  
 kiteesheri risaikawaitake, ritziwentaka, ayimatakeri ritashe. Okaatzi  
 40 kiteesheri risaikawaitake. <sup>3</sup>Ikanta Kamaari, ripokashitakeri Jesús  
 inkaariperotakairime. Ikantapaakeri: “Imaperotatyaarika Itomintzimi  
 Pawa, pimpeyero pan jiroka mapi, poyaawo.” <sup>4</sup>Rakanakeri Jesús,  
 ikantanakeri: “Eenitatsi osankenarentsi kantatsiri:

Te apatziro onkowimotai pan oyaawo, iroowa kowaperotacha  
 ankemisantairo maawoini ikantayetairi Pawa.”

<sup>5</sup>Ikanta Kamaari raanakeri nampitsiki tasorentsitsatsiri, risaikakaakeri  
 jenoki omitzikaaki tasorentsipango. <sup>6</sup>Ikantawetapaakari:  
 “Imaperotatyaarika Itomintzimi Pawa, pimitaye isaawikinta.  
 Pinkenkithashiretero rosankenaitakeri pairani okantzi:

Rotyaantemiri Pawa imaninkarite kempoyeemine.

Iriira thomaawakemine eero pomposantawaitapaaka mapiki.”

<sup>7</sup>Rakanakeri Jesús: “Okantzi ejatzi rosankenaitakeri pairani:

Te okameethatzti piñaantashiwaiyari Piwinkatharite Pawa.”

<sup>8</sup>Rapiiwetakari Kamaari raanairi Jesús ocheinpiki. Raminakaakeri  
 maawoini nampitsi ipinkathariyetzira atziripaini, tema kameetha  
 okantaka owaneenkayetaka. <sup>9</sup>Ikantziri: “Piñaakero okaatzi tzimatsiri.  
 Arika potziwerowashitakena piñaapinkathatena, arira nompakemiro  
 maawoini.” <sup>10</sup>Rakanakeri Jesús, ikantanakeri: “Piyaate intaina. Satanás  
 pini eeroka. Tema rosankenaitake pairani, kantatsiri:

Ampinkathateri Awinkatharite, apatziro ankemisanteri irirori.”

<sup>11</sup>Ari rintainaryaanake Kamaari. Pokaiyapaakeni imaninkarite Pawa,  
 ramitakotapaakeri Jesús.

**Retanakari rantayetziri Jesús**  
*(Mr. 1.14-20; Lc. 4.14-15; 5.1-11; 6.17-19)*

<sup>12</sup>Ikanta Jesús ikemakowentakeri Juan romonkyakaantaitakeri.  
 Irojatzi ripiyantanaari irirori Galilea-ki. <sup>13</sup>Te risaikapai Nazaret-ki,  
 ikenanai Capernaum-ki, ari risaikapairi. Inkaarecheraaki isaikira  
 Capernaum, inampiwetawowa icharineyetari Zabulón ejatzi Neftalí.  
<sup>14</sup>Ari imonkaatakari ikenkithatakotakeri pairani Kamantantaneri Isaías,  
 ikantake:

<sup>15</sup>Isaike inampitsite Zabulón-iite ejatzi Neftalí-ite janta  
 inkaarecheraaki,

---

<sup>d</sup> 4.5 Iitaitziri jaka “nampitsi tasorentsitsatsiri”, irojatzi iitaitzi nampitsi Jerusalén.

Intatsikero antawaaki ñaa Jordán,

Saikatsiri Galilea-ki, ipiyotapaawowa atziri kaari asheninkata.

**16** Iriira oshiyakawori risaikatyeeeme otsirenikitzira, iñaayetairi ootamentotsi.

Itsimankakowetakari raampare kathatayeri inkenayetaime sarinkaweniki.

Iro kantzimaitacha, oshiyawo iroñaaka risaikaatyeeeme okiteeshetzira.

**17** Ari retanakawo Jesús ikamantapaakeri atziripaini, ikantapaakeri: “Pookairo pikaariperoshirewaitake, irootaintsi impinkathariwentantai jakä Inkitesatzí.” **18** Irojatzí ipampithacheraatantanakawori inkaare saikatsiri Galilea-ki, iñaapaakeri Simón, iitaitziri eejatzi Pedro, itsipatari irirentzi iita Andrés, itarajaataiyini. Tema tarajaawarentzi rinaiyini.

**19** Ikantapaakeri: “Poyaatena, oshiyaiyawo iroñaaka iriime atziri nontarajaatakaimi.” **20** Royaatanakeri, rookanakero itarajaamento. **21** Iro rowaaganeentanaka eepichokiini, iñaapaatzíi Jacobo, itsipatakari irirentzi Juan, risaikaiyini ipitoki rowamatankawaitzi itarajaamento itsipatakari ipaapate Zebedeo. Romiñaanakeri eejatzi irirori,

**22** rookanakeri ipaapate ipitoki, royaatanakeri Jesús.

**23** Rithonkakero ranashitawo Jesús Galilea-ki, riyotaantake maawoini nampsiki eejatzi rapatotapiintaitaga, ikamantantakero Kameethari Ñaantsi kenkithatakotzirori ipinkathariwentantai Pawa. Retsiyatakotakaayetake mantsiyayetatsiri nampsiki. **24** Ikemakotaitakeri Jesús intaina. Ikemaiyakeni eejatzi Siria-satzi, ramayetapaakeniri maawoini mantsiyayetatsiri isheninka, retsiyatatakotaayetainiri. Ramakeri maawoini imatziri inashiyetachari mantsiyarentsi, katsiwaitatsiri, kamanawaitatsiri, kisopookiwaitatsiri. Ramake eejatzi raagayetziri peyari. Ari rithonkiri retsiyatatakotaayetairi Jesús.

**25** Royaataiyakerini osheki Galilea-satzi, Decápolis-satzi, Jerusalén-satzi, Judea-satzi, poñaayetanainchari eejatzi intatsikero antawaaki ñaa Jordán.

**Ikenkithatzi Jesús tonkaariki tsika ikantakota kimoshiretaatsine**  
**(Lc. 6.20-23)**

**5** **1** Ikanta iñaakeri Jesús osheki piyowentakariri, tonkaanake ochempiki, ari risaikapaake. Pokaiyapaakeni riyotaanewopaini, ipiyowentapaakari. **2** Ari riyotaayetakeri, ikantziri:

**3** “Kimoshire inkantaiya jentashiretatsiri, iri ñagairone impinkathariwentantai Inkitesatzí.

**4** Kimoshire inkantaiya iraaneentawaitachari, iri roimoshirenkaitairi.

**5** Kimoshire inkantaiya tsinampashireri, iri saikaatsine kameetha kipatsiki inintakagaitakeriri.

<sup>6</sup> Kimoshire inkantaiya aminaminatzirori inkameethashirete, ari iñagairo raminaminatziri.

<sup>7</sup> Kimoshire inkantaiya neshironkashiretantaneri, ari ineshironkaitairi irirori.

<sup>8</sup> Kimoshire inkantaiya kiteshireri, iri ñagairine Pawa.

<sup>9</sup> Kimoshire inkantaiya oitsimariirori mashirenkaantsi, iri intomintaiyaari Pawa.

<sup>10</sup> Kimoshire inkantaiya inkaate inkemaatsitakagaityaari ikameethashiretzira, iri ñagairone impinkathariwentantai Inkitesatzi.

<sup>11</sup> Kimoshire pinkantaiya imanintawaitaitemi, inkemaatsitakaitemi, inthaiyawentaitemi okantakaantzirowa pikemisantaana.

<sup>12</sup> Thaamenta pinkantayetanakya, tema Pawa pinayetaimine inkiteki. Pinkenkithashiretakotero jiroka, ari ikantaitakeri pairani etayetakawori Kamantantaneri.”

### Oshiyawori tziwi

<sup>13</sup> “Poshiyakawo eerokapaini tziwi. Arika rowaitaitero tziwi oitarika, eero opantanaawo inkatyokantaityaawo. Ontzimatye imanintaitero, rookaitakero raatzikawaitaitero.”

### Oshiyariri ootamentotsi

<sup>14</sup> “Arika isaike nampitsi tonkaariki, okoñaatzi maawoini arika ootya tsireniriki, te imana nampitsi. Kiteesheetyaakotantaneri pinaiyini eeroka ejatzi, eerokatake yotaayetanairine maawoini atziri, eero pimanimotziri okaatzi piyoyetanairi. <sup>15</sup> Ari okantari ejatzi, arika oosheri ootamentotsi, te ashitakotziri kantzirinaki. Owakotziri jenoki inkiteesheenkatakotantyaari maawoini saikatsiri pankotsiki. <sup>16</sup> Ari pinkantaiyaari ejatzi eeroka, pisaikayetai kameetha iñaantaimiri pisheninka okameethatzi maawoini pantayetanairi. Iro riyotantaiyaari irirori impinkathateri Ashitairi Inkitesatzi.”

### Ikenkithatakotakero Jesús Inintakaantaitanewo

<sup>17</sup> “Eero pikenkithashiretashita iro nipokantari nipakaakaimiro pikemisantziro Inintakaantaitanewo, te nokowi ejatzi nipakaakaimiro ikenkithatakotakeri pairani Kamantantaneri. Iro nipokantakari nimonkaatero okaatzi ikenkithatakotakeri pairani. <sup>18</sup> Imapero nokantzi: Aritake ithonkaiya paata kipatsi ejatzi inkite, iro kantzimaitacha eero ithonkimaita Inintakaantaitanewo, irojatzi imonkaatantakyaaari maawoini. <sup>19</sup> Eerorika pikemisantziro Inintakaantaitanewo, eerorika piyotaayetairo pisheninka inkemisantayetairo, eerowa pintagaaawo ipinkathariwentantaira Inkitesatzi. Iriima matakerone inkemisantairo, riyotaantairo ejatzi, iriira iriiperotaatsine inkiteki. <sup>20</sup> ¿Poshiyakaatziiima

kameethashire ikantayetaka Yotzinkariite ejatzi Fariseo? Tera. Te rimonkaatziro kameethaini inintakaawetariri Pawa. Eerorika pawisayetairi eeroka pinkameethashireyetai, eerowa piñagairo impinkathariwentantai Inkitesatzi.”

**Ikenkithatakotziro Jesús kisaantsi  
(Lc. 12.57-59)**

**21** “Piyotaiyironi eeroka ikantaitakeriri pairani etakaantanakawori, ikantaitziri:

Eero pitsitokantzi. Arika pitsitokantake, ari rowasanketaitakemi eeroka.

**22** Iro kantzimaitacha nokantzi naaka: Eero pikishiri pisheninka, rowasanketaitzimikari. Eero pikantawaitziri ejatzi: ‘Te piywainetzi eeroka.’ Rowasanketaitzimikari pinkatharentsiki. Te okameethatzi ejatzi pinkisaneeentawaiteri pisheninka piitamasontziwaiteri, patsipetaawokari pitagaiya sarinkaweniki. **23** Tema paapiintzi pipira pitayiniri Pawa, iro kantzimaitacha arika pinkenkithashiretapaakero tzmatsi ikisawentzimiri pisheninka, **24** ari pookanakeri pipira, piyatashiteri kisakemiri. Pinkantairi: ‘Asheninká, jame aakameethatawakagaiya.’ Arika paakameethatawakagaiya, pipiyai taapokimentotsiki, pitaapainiri Pawa pipira. **25** Arika intzime kishemine, irojatzi raantanakemi pinkatharentsiki, pinthaawakote eeroka awotsiki, pinkantairi: ‘Eero pikisawaita, jame aakameethatawakagaiya.’ Arika rareetakaakemi pinkatharentsiki, inkantaitakeri rimperatanewo: ‘Paanakeri jirika.’ Ari romonkyagaitemiri. **26** Eerorika pipinatashitari okaatzi pireewetakeri, eero piñagairo romishitowakaantaimi. Imaperotatyá.”

**Ikenkithatakotziro Jesús mayempitaantsi**

**27** Piyotziro eerokapaini ikantaitakeri pairani, ikantaitzி:

Eero pimayempitzi.

**28** Iro kantacha nokantzi naaka: Piñaamashiretaworika piñiilo tsinane, matakemi, pimayempishiretakero. **29** Jiroka noshiyakaawentemiro: Iroorika pokipero pantanta kaariperori, pipakagairo, poshiyakaantero pinkithoryaatyeerome, pookero. Tema te pikowiro poki atsipetakagaimiro sarinkaweni, iro kameethatatsi pisaikapityaakitai. **30** Iroorika pakopero pantanta kaariperori, pipakagairo poshiyakagairo pithatzinkatyeeerome, pookero. Tera pikowiro pako atsipetakagaimiro sarinkaweni, iroowa kameethatatsiri pisaikaponchokitai.

**Ikenkithatakotziro Jesús jokawakagaantsi**

**31** “Ikantaitake ejatzi pairani:

Arika rookawakaitya, ontzimatye impaiteri tsika osankenatakota jokawakagaantsi.

<sup>32</sup>Iro kantzimaitacha nonkante naaka: Kaariperoshireri rini jokashitawori iina. Arika aawetaiya itsipa oime, omayempitzimotakeri etawetari oimentari. Ari ikantari eejatzi agairone, mayempitake irirori. Te okaariperoweta rookerome atziri iina, arika iñeero omayempitzimowaiteri.”

### **Ikenkithatakotziri Jesús aakowitzashitaantsi**

<sup>33</sup>“Piyotaiyironi eejatzi ikantaitakeriri pairani etakaantawori:  
Eero pamatawithatantzi.

Pinkante: ‘Rowasanketaina Nowinkatharite eerorika nantayetziro nokantayetziri.’

Irorika pikantakeri ontzimatye pimonkaatero.

<sup>34</sup>Iro kantacha nokantzi naaka: Te onkameethate paakowitzashityaari Pawa, pimonkaatantyaawori pikantayetziri. Eero paakowitzashitawo inkite, arira risaikiri Pawa janta. <sup>35</sup>Eero paakowitzashitawo kipatsi, tema irojatzi rashitari Pawa, ari rimakoryaayitzitapiintzi. Eero paakowitzashitawo Jerusalén, ari ipinkathariwentantzi Pinkathariperori. <sup>36</sup>Eero paakowitzashitawo piito, pinkante: ‘Eerorika nimonkaatziro nokantziri, rithatzinkitaitenawoota noito.’ Te eeroka materone pishookakairo pipai, picheenkaishitakagairo eejatzi. <sup>37</sup>Eero pamatawithatantzi. Imaperotatyaarika pantero pikantayetziri, ari pinkante: ‘Jee, nimatero.’ Eerorika pantziro, apatziro pinkante: ‘Eero nimatziro.’ Tema te okameethatzi poshekyeero piñaane.”

### **Ikenkithatakotziro Jesús ineshironkataitziri kisaneentantatsiri (Lc. 6.27-36)**

<sup>38</sup>“Piyotaiyironi eeroka ikantaitakeri pairani:

Arika pinkithoriiteri roki itsipa atziri, okameethatzi ripiyakowentaityaari, rikithoriitatemiro poki eeroka.

Arika pintzinkeryaakoteri itsipa atziri, okameethatzi ripiyakowentaityaari intzinkeryaakotzitatemiro eejatzi eeroka.

<sup>39</sup>Iro kantacha nokantzi naaka: Te okameethatzi pipiyatyaaari kisaneentzimiri. Arika ripasaitemi kashetawooni, pishinetainiri rimontewootemi ripasatemi. <sup>40</sup>Arika raapithitemiro piithaare, pishineteniri raanakero eejatzi piwewiryakowo. <sup>41</sup>Arika rimperaitemi paanakero owaagawontsi pookero niyanki awotsi, paanakero owaagawontsi pawisakairo tsika ikantaweatkemi pookero. <sup>42</sup>Arika inkantaitemi: ‘Pimpewakenawo’, okameethatzi pimperi. Arika inkantaitemi eejatzi: ‘Pimpawakenawo, ari noipiylimiro’, okameethatzi pimperi eero pithañaapithatari.

<sup>43</sup>Piyotaiyironi eeroka ikantaitakeri pairani:

Pineshironkateri powawiiroki. Iriima ikaatzira kishimirí, pinkisheri irirori.

<sup>44</sup>Jiroka nokantzi naaka: ‘Petakotyaari kisayetzimiri. Pamanakoyetyaari maawoini ineshironkatantyaariri Pawa irirori. Eero pipiyatari kisaneentzimiri, paakameethatairai.’ <sup>45</sup>Iroowa ikowakagaitakeriri itomintayetaari Ashitairi Inkitesatzi. Iriitake wetsikakeriri ooryaatsiri, oorentakotziriri maawoini atziri: kameethashireri, eejatzi kaariperoshireri. Iri wetsikakerori eejatzi inkani, rowariiniri maawoini atziri: kameethashireri, eejatzi kaariperoshireri. <sup>46</sup>Apatzirorika petakotyaari ikaatzi etakoyetzimiri eeroka, ¿poshiyakaatzi ari ripinataimi Pawa? Eerowa, iroowa rantapiintakeri kaariperoshireri apatotziriri koriki. <sup>47</sup>Apatzirorika petakotari powawiiroki, ¿kaarima aminaashiwaitaantsi? Tema iro rimatapiintakeri itsipasatzi atziri. <sup>48</sup>Kameethashireri pinkantanaiya eeroka, poshiyakotaiyaari Ashitairi Pawa, tema imapero ikameethashireperotake irirori.”

### Ikenkithatakotziri Jesús pashitantatsiri

**6** <sup>1</sup>“Pipakagairo powapeyimotari atziripaini pantayetziro pinkameethashiretantaiyaarime. Eekerorika pantatyeero, tekaatsi ripinataimi Ashitairi Inkitesatzi.

<sup>2</sup>Arika pimpashitantya, te okameethatzi pinkantante: ‘Nopashitantaka naaka.’ Iroowa rametari owapeyimotantaneri, ikowi irirori impinkathaiterime. Eenitalsirika pinkathatakerine jirika, iro iñaamatsitantlyaawori irirori iñaapinkathataiterime. <sup>3</sup>Arika pamitakoteri ashironkainkari, eero pikamantziri itsipapaini, <sup>e</sup> <sup>4</sup>managa onkantya okaatzi pipashitantakari. Riyotake Pawa irirori, iri pinataimine.”

### Ikenkithatakotziro Jesús amanamanaataantsi (Lc. 11.2-4)

<sup>5</sup>“Arika pamanamanaatyaaari Pawa, te opantawo poshiyakotyaari shamewaitatsiri. Ikatziyapiinta irirori rapatotapiintaitaga, ikatziya eejatzi niyankineki nampitsi, iñaantyaariri isheninka. Ari iñaamatsiwetakawo irirori iñaapinkathaiterime. Imaperotatya. <sup>6</sup>Irooma eeroka, arika pamaña, pashitakota apaniroini pipankoki pinkowakoteri Ashitairi tsipatakemiri apaniroini. Iri ñiimiri apaniroini, ari ineshironkatakemi, irijatzi pinataimine.

<sup>7</sup>Arika pamaña, te ompantyaawo papiipiintero piñaane okaatzi pikantakeri. Iroowa rametari kaari asheninkata aakapaini. Roshiyakaatzi rapiipiintawetawowa riñaane ari inkemakeri Pawa. <sup>8</sup>Paamaiya poshiyakotarikari eeroka. Tekera pinkowakotanakeriita Ashitzimiri koityiimotzimiri, ryotzitakawo irirori maawoini. <sup>9</sup>Jiroka pinkante pamaña eeroka:

e 6.3 Poshiyakairo te iyote pampate oita antakeri pakopero.

Ashitanarí, nampitawori inkiteki,  
Tasorentsi pini eeroka.

<sup>10</sup> Pimpinkatharientina naaka.

Pantakainawo jaka kipatsiki okaatzi pinintakaanari eeroka,  
Poshiyakagainari inkiteweri, pantakairi irirori maawoini  
pinintakairiri.

<sup>11</sup> Pimpapiintena koityiimotanari noyaari.

<sup>12</sup> Pimpeyakotakagainawo nokaariperoshirewaitake,  
Tema nimatakero naaka, nopeyakotairi  
owaariperoshiretakenari.

<sup>13</sup> Eero pishinetana iñaantaitena, inkowaite rantakaitenawo  
kaariperori.

Ari pinkantaitaatyeero pimpinkathariwentantai. Ari  
pinkantaitaatyeero oshekitzimotemi pishintsinka, eejatzi  
powaneenkawo. Ari onkantaitaatyeeyaani.

<sup>14</sup> Arika pimpeyakotairi atziri kishimirí, ari impeyakotaimi eejatzi eeroka  
Ashitairi Inkitesatzi. <sup>15</sup> Irooma eerorika pipeyakotairi eeroka atziri  
kishimirí, eerowa ipeyakotzitaimi Ashitairi irirori.”

#### Ikenkithatakotziro Jesús tziwentaantsi

<sup>16</sup> “Arika pitziwentya pinkenkithashiretakoteri Pawa, eero  
pinkamantantayetzi, pinkante: ‘Nitziwentatyari Pawa.’ Paamaiya  
poshiyarikari owapeyimotantaneri. Ritziwentapiintaweta irirori,  
mantsiya ikantayeta ipooki riyatantaityaariri ritziwentatyia.  
Iro iñaamatsitantlyaawori irirori impinkathawentaiteri.  
Imaperotatya. <sup>17</sup> Irooma eeroka arika pitziwentyaari Pawa  
pinkenkithashiretantyaariri, pinkiwawootya, pinkishitya kameetha,  
<sup>18</sup> eero riyatantatzimi pitziwentatyia. Apatziro riyotemi Ashitairi  
Inkitesatzi, iri pinataimine.”

#### Ikenkithatakotziro Jesús inkitesato ashaagawontsi (Lc. 12.32-34)

<sup>19</sup> “Te opantawo pashaagantashiwaitya jaka kipatsiki, owana  
ipathayi, ari ipiyotari koshintzi. <sup>20</sup> Iro kameethatatsi pantayetanairo  
piñaantaiyaawori pisailkai kameetha inkiteki. Oshiyawaityaawo  
pashaagantaatyeyaaame inkiteki tsika te ipathaanetapai, te  
itzimapai eejatzi koshintzi. <sup>21</sup> Tsikarika pashaagantaka, ari  
pinkenkithashiretapiintero.”

**Ikenkithatakotziri Jesús ootamentotsi  
(Lc. 11.33-36)**

22 “Kameetharika onkantya poki, piñaantawo kameethaini, oshiyawo pinkoñeeetyaakotaatyeeeme.<sup>f</sup> 23 Terika opantawo poki, eero piñaantawo kameethaini, oshiyakawo pintsirenikitakotatyeeeme.”<sup>g</sup>

**Ikenkithatakotziro Jesús ashaagantaantsi  
(Lc. 16.13)**

24 “Tekaatsi materone rantawaiteniri apite imperatantaneri. Tema apaani inkowaperote rimonkaateniri rimperatariri, iriima itsipa, inkisaneentanakeri. Ari ikantari eejatzi: Tekaatsi materone ranteniri Pawa ikowakaantziri irirori, arika inkenkithashiretakotero eejatzi ashaagawontsi roshiyakaantanakero iroorikame imperatyaarine.”

**Ikenkithatakotziro Jesús kantzimoshiretaantsi  
(Lc. 12.22-31)**

25 “Pinkeme nonkante: Te opantawo onkantzimoshirewaitemi pinkante: ‘¿Oitaka noyaari, oitaka nireri, oitaka nonkithaatyaari?’ Eenitatsi otsipa ankenkithashiretapiintairi añaamentoki, iro kowaperotachari, anairo okaatzi owayetapiintari, okaatzi akithaayetapiintari eejatzi.

26 Thame ankenkithashiretakoteri tsimeryaanipaini. Te riyotziro impankite royaari, te riwetsiki ipanko rowaantyaawori iwankire. Iri kantzimaitacha Pawa, ipayetapiintakeri rowanawo. Aaka rimaperotzi retakotai Pawa. 27 Arika onkantzimoshirewaitemi ¿arima pinkantakero powawineentawairo posarentsite? 28 Thame ankenkithashiretakotero inchateyakipaini, te añiiro antawainete, te ontyagaanta onkithaatyaari. Temaita okantzimoshirewaitawo, onkante: ‘¿Oitaka nonkithaatyaari?’<sup>h</sup>

29 Owaneenkata kameetha, anairo rowaneenkawo Salomón, pinkathariwetachari pairani. 30 Iri Pawa owaneenkayetzirori. Okantaweta eepichokiini añaawetawo owaneenkapatapinta, iro osamani, tekaatsi pantyaawone arika onkamateyatatanake, tema richekaitakero, ritagaitakero. ¿Eeroma ikempoyaawentzimi eeroka Pawa? Aritake, eero pikisoshiretzi. 31 Ataama okantzimoshirewaitakemi, pikantzi: ‘¿Oitaka noyaari, oitaka nireri, oitaka nonkithaatyaari?’ 32 Apatziro okantzimoshirewaitari kaari kemisantatsine. Irooma eerokapaini,

**f 6.22** Oshiyakaawentachari okitsi kameethatatsiri, apaani pakoriinkari (kaari shampitsitatsi), kemathatairori okaatzi rantakairiri Pawa. Tema risaikanaatzi okiteesheenkatzira. **g 6.23** Oshiyakaawentachari eerorika opantawo oki, apaani shampitsi kaari kemathatairone okaatzi rantakairiri Pawa. Tema risaikatzi otsirenikitzira. **h 6.28** Iro ikantakoitzi jika “inchateyakipaini” jitachari “lirio”.

riyotakoyetzimiro Ashitairi Inkitesatzi oitarika koityiimotzimiri. <sup>33</sup> Iro kowaperotacha pithotyaakotairi impinkathariwentaimi, pithotyaakotairi eejatzi rowameethashiretaimi, iroatzi piñaantaiyaawori impayetaimiro okaatzi koityiimoyetzimiri.

<sup>34</sup> Arira okanta, eero okantzimoshirewaitzimi oitarika awishimotemine inkaamani. Tema okaatzi awishimoyetzimiri jiroka kiteesheri iroñaaka, irootake pawentaantaariri.”

### Ikenkithatakotziro Jesús kishimataantsi

(Lc. 6.37-38, 41-42)

**7** <sup>1</sup>“Te opantawo ankantante: ‘Kaariperoshireri rini nosheninka.’ Arika ankantantake, ari rimataitakai aaka, inkantaitai: ‘Kaariperoshireri pini eeroka.’ <sup>2</sup> Arika ankantakoteri asheninka, ari inkantakotanakai eejatzi aaka. Ontzimatye aamaiya, arika ontzime antzimatantane wo, rimaperoitaikari paata ripiyaitai. <sup>3</sup> Oshiyawaitakawo arika ityaakitaime antawo inchapetoki okiki, ¿kantachama aminer i tsipa tyaakitachari eepichokiini? <sup>4</sup> ¿Eero okanta ankanteri: ‘Pipoke, nagaimiro tyaakitakemiri?’ Tema ityaakitzitakemi eeroka antawo inchapetoki. <sup>5</sup> Poshiyakari owapeyimotantaneri. Petawakyawo eeroka paawairo inchato otzikaakemiri, paminantanaiaari kameetha paantaiyaanariri tyaakitzitachari itsipa.

<sup>6</sup> Te ipaitapiintziri otsitzi wathatsi tasorentsitsatsiri. Te ipaitziri eejatzi chancho poreryaayetatsiri, ari roipatsitakero raatzikawaitero. Tera ipaitziri ikowawetari, osheki inkatsimate, ari ratsikantake.”<sup>i</sup>

### Ikenkithatakotziri Jesús amanaperotariri Pawa

(Lc. 11.9-13; 6.31)

<sup>7</sup>“Pamanakotaiyani, pithotyaakotante eejatzi, ari piñaakero impaitemiro pikowakotantziri. Poshiyakayero arika pareetya pankotsiki, pinkantapaakeri ashitawori: ‘Pashitareenawo.’ Aritake rashitaryaakemiro ipanko. <sup>8</sup> Ari impaitairi kowakotantatsiri. Inkaate thotyaakotairone, ari roñaagaitairi. Arika inkantaiter: ‘Pashitareero.’ Aritake rimatakero. <sup>9</sup> Arika inkowakotemi pitomi, inkantemi: ‘Papá, pimpena pan.’ ¿Arima pimpakeri mapi? <sup>10</sup> Arika inkantemi: ‘Pimpena shima noya.’ ¿Arima pimpakeri maanke royaari? <sup>11</sup> Petakotari eeroka pitomipaini, kaariperoshireri pinaweta. Iri maperotzirori Ashitairi Inkitesatzi, retakotari irirori maawoini amanayetariri. <sup>12</sup> Arika

---

i 7.6 *Ikantitziri jaka:* “wathatsi tasorentsitsatsiri” eejatzi “poreryaayetatsiri”, iro oshiyakaawentacha Kameethari Ñaantsi tasorentsitsatsiri. Tema riñaane Pawa oshiyari ikaatzi poreryaayetatsiri. Iriima otsitzi eejatzi chancho, iri oshiyakaawentacha ikaatzi kaari kowerone inkemisantero Kameethari Ñaantsi, osheki ikisaneentakeri kamantantzirori. Terika ikowiro inkemisante, te onkameethate impankenaminthawaitaityaari.

pinkowe retakoitemi, petawakyaawo eeroka petakotantya. Iro okantakotziri Inintakaantaitanewo, irojatzi ikantakeri pairani Kamantantaneri.”

**Ikenkithatakotatziro awotsimanchaki  
(Lc. 13.24)**

13 “Arika pinkowe pinkyaapankotairi Pawa, poshiyakairo pimpampithatairome awotsimanchaki. Eenitatsi otsipa saawokitatsiri, kaari pomeentsitachane inkenantaityaawo. Osheki pampithatakerori, rashironkaayetaiya sarinkaweniki. 14 Irooma awotsimanchaki, te ishenitzi kenantyaawone, iriira areetaachane Pawaki, inkantaitaatyero rañagai janta.”

**Ikenkithatakotziri Jesús thairi  
(Lc. 6.43-44)**

15 “Pinkyaryootaiyeni, ramatawitzimikari oshiyawetariri Kamantantaneri, roshiyakotapaakyari oweja te ikatsimatanetzi. Iro kantzimaitacha kaariperoshireri rinatzi, roshiyakari owantaneri. 16 Ontzimatye aamagaiyaawo rantayetziri ayotantyaariri ikameethashiretzirika. ¿Añiroma uva onkithokitantlyaawo owaato kitochee? Te. ¿Imatziroma higo onkithokitantlyaawo iroori? Te imata eejatzi. 17 Inchato saankanatatsiri ishooki, okithokitzi kameetha. Irooma inchato sampishitaintsiri, te onkithokinete. 18 Inchato saankanatatsiri ishooki, te iñagaitziro onkarigerote okithoki. Ari okantari eejatzi inchato sampishitaintsiri, eero iñagaitziro onkameethate okithoki. 19 Ritowitziro inchato kaari kithokitatsine, ragaitziro ritagaitero. 20 Paamagaiyaari yotaayetaimiri. Roshiyakaworika okithokitzi inchato saankanatatsiri ishooki, panterowa ryotaayetzimiri.”

**Ikenkithatakotziri Jesús yotakoperotanairiri  
(Lc. 13.25-27)**

21 “Tzimawetacha osheki kantawetanari: ‘Nowinkatharite pini eeroka, nopolinkathakitakemi.’ Eeromaita iñagairo impinkathariwentairi Pawa. Apatziro ikaatzi antanairori ikowakaantziri Ashitanari Inkitesatzi. 22 Arika nopolinkatharitai paata nopoliyotairi maawoini atziri. Eenitatsi kantayetainane: ‘Nowinkatharité, naakotakemi piwairo naaka nokenkithatakoyetzimi. Naakotakemi piwairo nowawisaakotziri raagayetziri peyari. Ari nokantayetziri eejatzi nosheninka: Iro nitasonkawentantariri naakotzirira iwairo Jesúis.’ 23 Nonkantzimaitanakyaari naaka: ‘Te niyotemi. Piyaate jantyaatsikaini, imapero pikaariperoshiretake.’ ”

**Ikenkithatakotziri apite owatzikirori ipanko  
(Lc. 6.46-49)**

24 “Pinkeme, arika pinkenkithashiretero maawoini nokantakemiri, arika pinkemisantakero maawoini, ari okameethatzi. Iro piyotanetyaari.

Poshiyaari owatzikirori ipango shirantaaki.<sup>25</sup> Oparyaaweta antawoite inkani, amaaniwetaka. Otampyaawetaka shintsiini, ookantawetapaakawo pankotsi, te aawiyo. Tema owatzikakitya kameethaini shirantaaki.<sup>26</sup> Ari okantari eejatzi, eerorika pikenkithashiretziro nokantakemiri, eerorika pikemisantanairo, eero piñiilo piyotanetyaawo. Poshiyakotaari owatzikirori ipango impanekiiteki.<sup>27</sup> Oparyaappaake inkani, amaanitapaake. Okanta otampyaatapaake, ookantapaakawo pankotsi, tyaanake. Te iñagaitairo.

<sup>28</sup> Iroowa riyotaayetakeriri Jesús ikaatzi piyowentakariri. Riyokitziiwentanakeri. <sup>29</sup> Te imana ishintsinka riyotaantzira, ranairi riyotaantzi Yotzinkariite.

**Retsiyatakagairi Jesús imatane pathaawontsi  
(Mr. 1.40-45; Lc. 5.12-16)**

**8** <sup>1</sup>Ikanta roirinkaawo Jesús ikenkithatakera tonkaariki, royaatairi osheki atziri. <sup>2</sup>Ari ripokashitakeri imatane pathaawontsi, rotziwerowashitapaakari, ikantapaakeri: “Pinkatharí, pikowirika petsiyatakagaina, niyotzi tzimatsi pishintsinka petsiyatakotakanantenari.” <sup>3</sup>Irojatzi rakotashitantanakariri, riterotakeri, ikantziri: “Nokowi, petsiyatakotai.” Etsiyatanake ripathaawaiwetaga. <sup>4</sup>Ikantawetawaari Jesús jirika pathaawetachari: “Eerowa pithawetakotana. Apatziro piyaatashiteri Imperatasorentsitaarewo, pimonkaatantyaawori Inintakaantitakeri rosankenatakeri Moisés, pimperi pashtakaariri Pawa, riyotantaityaari etsiyatakotaimi.”

**Retsiyatakagairi Jesús rimperatanewo reeware owayeripaini  
(Lc. 7.1-10)**

<sup>5</sup>Ikanta rowaaganaa Jesús, areetaiyakani nampitsiki Capernaum. Ari ripokakeri reeware rowayerite Roma-satzi, iñeeri Jesús, <sup>6</sup>ikantapaakeri: “Nowinkatharité, tzimatsi nimperatanewo nopankoki, maperokitaka imantsiyatzi, kisopookitake.” <sup>7</sup>Rakanakeri, ikantziri: “Aritake niyaatake netsiyatakotakagairi.” <sup>8</sup>Ikantanake irirori: “Osheki nopinkathatakemi, kaariperori nini naaka, niyotzi te ishinetaantsita pinkyaapankotena. Apatziro nokowi pinkantakaanteri retsiyatakotai. Ari imatakyo pinkanteri.<sup>j</sup> <sup>9</sup>Tzimatsi imperatanari naaka, tzimatsi eejatzi owayeripaini nimperatarí naaka. Arika nonkanteri: ‘Piyaate’, ari ryaatake. Arika nonkanteri itsipa: ‘Pipoke’, ari ripokake. Arika nonkanteri nimperatanewo: ‘Pantero jiroka’, rimatziro rantziro.” <sup>10</sup>Riyokitziiwentanakeri Jesús ikemakerira ikantake

---

<sup>j</sup> 8.8 Jirika reeware owayeripaini Roma-satzi, kaari Judá-ite, itsipasatzi atziri rini. Tema pairani apaani Judá-ite, te ikyawankotziri itsipasatzi kaari isheninkata.

reeware owayeripaini. Ikantanakeri oyaataiyirini: “Rimatakeri ikemisantzi jirika, jaka Israel-ki tekaatsi asheninka oshiyaarine. Imaperotaty.

<sup>11</sup>Pinkeme, arika impinkathariwentantai Inkitesatzi, ari intzimake osheki kaari asheninkata poñaayetachari otsipaki nampitsi, inintaayetaiya intsipataiyaari Abraham-ni, Isaac-ni eejatzi Jacob-ni. <sup>12</sup>Iro kantzimaitacha eero itzimaperotai asheninka saikaatsine janta. Iri ikowawetakari impinkathariwentairime maawoini janta, iro kantzimaitacha osheki ripiyathataka, rookairi otsirenikitakera. Ari riraawaitaiyaari, ratsikaikiwaitya inkemaatsitaiya.” <sup>13</sup>Ripithokashitanakari reeware owayeripaini, ikantziri: “Pipiye pipankoki. Pimatakero pikemisantzi eeroka, iro retsiyatatakantaiyaari pimperatanewo.” Ari rawisakotanai rimperatanewo janta ipankoki.

### Retsiyatakotagairo Jesús riyote Pedro

(*Mr. 1.29-34; Lc. 4.38-41*)

<sup>14</sup>Ikanta Jesús jatake ipankoki Pedro. Iñaapaatziiro riyote, omaryaaka, imatakeri katsiirentsi. <sup>15</sup>Riterotapaakero eepichokiini, etsiyatakotanake. Piriintanaka, aminayetawakeniri oita ompawakeriri.

<sup>16</sup>Okanta otsireniityaanake, ramaitapaakeniri osheki raayiri peyari. Retsiyatakotakaayetairi, ikisathatawakeri iweyarite. Retsiyatakotakaayetairi eejatzi maawoini mantsiyayetatsiri. <sup>17</sup>Irojatzi imonkaatantakari ikenkithatakotakeri pairani Kamantantaneri Isaías, ikantake:

Iri aanakerori amantsiyare,  
Irijatzi aanakerori okaatzi akemaatsiyetari.

### Oyaaterine Jesús

(*Lc. 9.57-62*)

<sup>18</sup>Ikanta iñaakeri Jesús isheniperotapaake atziri piyowentariri, ikantanakeri riyotaanewo: “Jame amontyagai intatsikero.”

<sup>19</sup>Ikantawetawaari Yotzinkari: “Yotaantanerí, nokowi noyaatanakemi tsikarika pinkenayete eeroka.” <sup>20</sup>Rakanake Jesús, ikantziri: “Apaani otsitziniro, eenitatsi imoo rimaantari, eejatzi tsimeryaanipaini eenitatsi romayero. Iriima jirika Itomi Atziri te otzimi ipanko rimaantapiintyaari irirori.” <sup>21</sup>Ari ikantanake apaani riyotaanewo: “Yotaanarí, nokowawetaka naaka noyaatanakemi, iro kantzimaitacha nokowi noñaanairi nopaapate nonkitatanairi, ari noyaatemiri.” <sup>22</sup>Ikantanake Jesús: “Poyaatena. Ikaatzi kamashireyetatsiri, ari inkitatairai irirori kaminkaripaini.”

### Romairiilo Jesús tampyaa

(*Mr. 4.35-41; Lc. 8.22-25*)

<sup>23</sup>Ikanta rotetanaa Jesús pitotsiki, itsipatanaari riyotaanewo. <sup>24</sup>Ikanta rimontyaakotanaka, maanake Jesús pitotsiki. Iro riweyaakowetaka

niyankyeeronkaini, omapokakeri riyotaanewo otampyaatapaake antawoite, otetaagapaaka ñaa pitotsiki, otamakaatanake inkaare. <sup>25</sup>Riyaatashtitanakeri, rowakiryaakiteri Jesús, ikantapaakeri: “¡Yotaanarí, apiinkaty! ¡Powawisaakotaina!” <sup>26</sup>Ikantanakeri irirori: “¿Itaka pithaawantari? ¿Tekerama pikemisantaperotiita?” Piriintanaka, romairyaaakero tampyaa eejatzi otamakaare inkaare, awisanake, mairyatanai kameetha. <sup>27</sup>Riyokitziiwentaitanakeri Jesús, ipinkathatanakeri antawoite, ikantawakaiyani: “¿Tsika iitaka atziritatsiri jirika? Romairiilo tampyaa eejatzi inkaare.”

### Gadara-satzi raayiri peyari

(Mr. 5.1-20; Lc. 8.26-39)

<sup>28</sup>Areetaiyakani intatsikero, aatakotaiyapaakeni nampitsiki jitachari Gadara. Ari rishiyashitawakari apite atziri raayiri peyari, ipoñaakawo kitataarewoki. Katsimaki ikantakaakari peyari, osheki ithaawantaitakari, te onkameethate inkenaite janta. <sup>29</sup>Ikantawakeri: “¡Jesús, Itomi Pawa! ¿Irootaintsima powasanketena? ¿Tskama nokantakemika eeroka?” <sup>30</sup>Ari risaiki janta osheki chancho, roshimotokawaitaiyini. <sup>31</sup>Riñaawaitanake iweyarite, ikantanake: “Arika powawisaakotairi jirika naaganewo, potyaantena naaka ipiyotakaga chancho.” <sup>32</sup>Rakanakeri Jesús, ikantziri: “Piyaate peyari.” Jatanake peyripaini chanchoki, raagapaakeri, irojatzi rishiyantaiyanakarini impeetaki, mitagaiyapaakeni maawoini inkaareki, thonkaiyakani ripinkake. <sup>33</sup>Ikanta iñaakeri saikawentziriri, shiyaiyanakani. Jatake nampitsiki, ikamantapaakeri maawoini atziri okaatzi iñaakeri. <sup>34</sup>Irojatzi riyaatashtitantanakariri Jesús, ikantaitapaakeri: “Te nokowaiyini pisaike nonampiki, pamine tsika pinkene.”

### Retsiyatakotakagairi Jesús kisopookiri

(Mr. 2.1-12; Lc. 5.17-26)

**9** <sup>1</sup>Ikanta rotetanaawo Jesús pitotsiki, montyaakotaawo inampiki. <sup>2</sup>Ari ramaitakeniri kisopookiri, inatakoitakeri shitashintsiki romaryaantapiintari. Riyoshiretawakeri Jesús atziripaini natakotakeriri, riñaanatawakeri mantsiyari, ikantziri: “Thaamentashire pinkantya notomi, ari netsiyatakotakagaimi, ipeyakoitaimiro pikaariperoshirewetakaga.” <sup>3</sup>Ikanta ikemawake yowaarentziite, ikantashiretanake: “Rithainkatziiri Pawa jirika.” <sup>4</sup>Riyotake Jesús tsika ikantashiretzi, rosampitanakeri: “¿Oitaka okaariperotantari pikantashiretzi? <sup>5</sup>¿Tema okameethatzi nonkante: ‘Ipeyakoitaimiro pikaariperoshireweta?’ ¿Irooma pikowi nonkanteri: ‘Pinkatziye, panashitaiya?’ <sup>6</sup>Iroñaaka piyoteri jirika Itomi Atziri oshekitzimotziri ishindsighta, ipeyakotairi kaariperoshirewetachari.” Ripithokashitanakari

mantsiyari, ikantziri: “Pinkatziye, paanairo pomaryaantawetari, piyataai pipankoki.” <sup>7</sup>Katziyanaka mantsiyawetachari, jatai ipankoki. <sup>8</sup>Iñaakeri maawoini atziri piyotainchari, riyokitziiwentanakeri iñaawairira riyaatai. Ikantaiyanakeni: “Imaperotatziiri Pawa, iri matakerori oshekitzimotantakariri ishistsinka Jesús.”

**Ragaitanakeri Mateo**  
(*Mr. 2.13-17; Lc. 5.27-32*)

<sup>9</sup>Ikanta rowaaganaka Jesús, irojatzi iñaantapaakariri jitachari Mateo, apatotziriri koriki. Ikantapaakeri: “Poyaatena.” Katziyanaka, royaatanakeri. <sup>10</sup>Raanakeri ipankoki rowakayaari, itsipataanakeri riyotaanewo. Osheki jatanaintsiri apatotziriri koriki, riyatake eejatzi osheki kaariperoshiretsisri. Ari itsipatakari Jesús rowaiyakani. <sup>11</sup>Ikanta iñaakeri Fariseo-paini, ikaimakeri riyotaanewo Jesús, rosampitakeri: “¿Itaka itsipatantariri Jesús apatotziriri koriki, itsipatakari eejatzi kaariperoshireyetatsiri? Te okameethatzsi.” <sup>12</sup>Ikemawake Jesús, ikantanake irirori: “Arika imantsiyate atziri ripokashitziri aawintantzinkari, iriima atziri kaari mantsiyatatsi tekaatsi inkowe irirori. <sup>13</sup>Ontzimatye pinkenkithashiretero Inintakaantanewo Pawa, kantatsiri:

Te apa nonkoweri pamayetainari pipira pitagainari.

Iro nokowaperotairi pineshironkayetairu pisheninku.

Te apa nipokashiteri kameethashireri nonkaimashiretairi, tema nipokashitatiiri kaariperoshireri nonkaimashiretairi rookairo kaariperori.”

**Ikenkithatakotziro Jesús Tziwentaantsi**  
(*Mr. 2.18-22; Lc. 5.33-39*)

<sup>14</sup>Ikanta ripokaiyakeni riyotaanewo Juan, rosampitapaakeri Jesús, ikantziri: “¿Itaka kaari ritziwentanta piyotaanewo? Nitziwentapiinta naaka, ari ikantzita riyotaanewo Fariseo-paini.” <sup>15</sup>Rakanakeri Jesús, ikantanakeri: “Arika aate awakagaantsiki, ¿arima owashiretapaakya? Arika paata, ragaitakeri iimentaitari, aripaite ritziwentaitya. <sup>16</sup>Apaani antyashipawo ikithaatitari, arikame rowamatankaitantyaawo osape owakerari, ari isagaaperotanake aminthatanakyaarika owakerari. <sup>17</sup>Ari okanta eejatzi, te ikameethatzsi antyashipari mashitsinaki rowantaityaawo eeryaatatsiri riraitziri. Arika rowantaitakyaawo, ari risanaryaanake, apaatashiwaitakya riraitziri eejatzi mashitsinaki. Iri kameethatatsi owakerari mashitsinaki rowantaityaari, eero apaawaita apitekeroini.”

**Rishinto Jairo eejatzi tsinane terotakerori iithaare Jesús**  
(*Mr. 5.21-43; Lc. 8.40-56*)

<sup>18</sup>Ikenkithawaiminthaitzi Jesús, areetapaaka apaani jewari, rotziwerowapaaka, ikantapaakeri: “Kamake nishinto, iroowa

nipokantari piyataate nopankoki piterotero eepichokiini, añagaita.”

<sup>19</sup> Jatanake Jesús eejatzi riyotaanewo, royaatanakeri. <sup>20</sup> Okanta apaani mantsiyatatsiri tsinane, osheki osarentsi osokaawaitaka, tzimakotake 12 osarentsi, okenashitapaakeri itaapiiki Jesús, iterotakero opatzikaakiki iithaare. <sup>21</sup> Okantashiretti: “Arika niterotakero iithaare, ari netsiyatakotai.” <sup>22</sup> Ripithokashitanakawo Jesús, ikantziro: “Thaamenta pinkantaiya nishintó, etsiyatakotakagaimi pikemisantake.” Apathakero etsiyatanake omantsiyarentsite tsinane. <sup>23</sup> Ikanta rareetapaaka Jesús ipankoki jewari, iñaapaatziiri showiwenzirori kamaintsiri, osheki atziri akisheenkataintsiri. <sup>24</sup> Ikantapaakeri Jesús: “Piskeke, te okami piraakotaiyakarini imakoryaatzi.” Thainka rowaitakeri Jesús. <sup>25</sup> Romishitowapaakeri maawoini, kyaapaake Jesús, rotaiyawakotapaakero, piriintanaawo ewankawo. <sup>26</sup> Te imanakotanaka rantakeri Jesús, ikemakoitanakeri maawoini.

### Rokiryakagairi Jesús apite mawityaakiri

<sup>27</sup> Ikanta rowaaganaawo Jesús, royaatanakeri apite mawityaakiri, ikaimi, ikantzi: “¡Icharine David-ni, pineshironkataina!” <sup>28</sup> Areetapaaka pankotsiki, eejatzi mawityaakiri. Ripokashitapaakeri okaakiini, rosampitakeri Jesús, ikantziri: “¿Pawentaanama eeroka ari imatakyá nowawisaakotaimi?” Ikantaiyini irirori: “Ari pimatakero nowinkatharite.” <sup>29</sup> Rakotanake Jesús, riterokitakeri, ikantziri: “Okiryakagaimi pawentagaanaga.” <sup>30</sup> Apathakero raminanai kameetha. Ishintsineentawakari, ikantziri: “Te nokowi pinthawetakotena nokiryakagaimira.” <sup>31</sup> Ikanta riyaatai, ikamantantayetanake, ithonka ikemakoitanakeri Jesús.

### Riñaawaitakagaitairi kisowaanteri

<sup>32</sup> Ikanta ramaitapaakeniri Jesús apaani atziri raayiri peyari, kisowaante ikantaka. <sup>33</sup> Retsiyatakotakaawakeri Jesús jirika atziri, kenkithawitanai roisowaantewetakari peyari, tema rookapithatakeri iweyarite. Riyokitziiwentaitanakeri Jesús, ikantashiretaitanake: “Teañaapiintzi oshiyaaarine jirika anampiki Israel-ki.” <sup>34</sup> Ikantaiyini Fariseopaini irirori: “Ripasawyaaatziiri reeware iweyarite retsiyatakotakaantariri raaganewo.”

### Sampainkatake pankirentsi

<sup>35</sup> Rithonkakero ranashitawo Jesús maawoini nampitsi, riyoantayetake rapatotapiintaitaga. Ikenkithatakotapiintakero Kameethari Ñaantsi tsika onkantya impinkathariwentantai. Retsiyatakotakaayetairi maawoini, tekaatsi apaani mantsiyarentsi pomeentsitzimotyaarine. <sup>36</sup> Iñaayetzirira osheki piyowentariri, antawo

retakoshiretakari Jesús, ikantake: “Imapero rashironkaayetaka jirika atziripaini.

Roshiyakari oweja eerorika itzimi kempoyeerine.”

<sup>37</sup>Eekero ikantanakitziiri riyotaanewo: “Jirikapaini atziri roshiyakawo isampainkatzi pankirentsi, temaita itzimaperotzi atziri owiiterone.

<sup>38</sup>Pamanaiyaari Awinkatharite rotyaanteeta osheki jatatsine atziriki, tema yotacha osheki inkaate kemisantaatsine.”

### Riyoyaake Jesús 12 Rotyaantaperore

(Mr. 3.13-19; Lc. 6.12-16)

**10** <sup>1</sup>Ikanta riyoyaake Jesús ikaatzi 12 riyotaanewo, ripasawaakari ritasonkawentantzzi. Rimatanakero irirori retsyatatakotaayetai osheki atziri kantawaitachari imantsiyarentsite, eejatzzi ikaatzi raagayetziri peyari. <sup>2</sup>Jirika ikaatzi 12 riyoyaakeri Jesús: Etanakawori Simón, iitakeri Pedro. Eejatzi Andrés, irirentzi Pedro. Eejatzi Jacobo itomi Zebedeo itsipatakari rowawiropi Juan. <sup>3</sup>Eejatzi Felipe, Bartolomé, Tomás, Mateo apatowetariri koriki, Eejatzi Jacobo itomi Alfeo, Tadeo, <sup>4</sup>eejatzi Simón, iitzitakari Jokaakotantaneri. Eejatzi weyaantaapaakawori Judas Iscariote, iriira pithokashityaarine paata.

### Rotyaantaitakeri kaatatsiri 12

(Mr. 6.7-13; Lc. 9.1-6)

<sup>5</sup>Ikanta rotyaantakeri Jesús kaatatsiri 12, ikantawakeri: “Eero pikenanake risaikira atziri kaari asheninkata, eero piken eejatzi inampiki Samaria-satzi. <sup>6</sup>Iri petapaintya piyaatashiteri icharineyetari Israel-ni, oshiyakariri oweja itzipinawaitzi. <sup>7</sup>Tsikarika pinkenayetake pinkamantantayete, pinkante: ‘Irootaintsi impinkathariwentantai Inkitesatzti.’ <sup>8</sup>Petsiyatakotakaayetairi maawoini mantsiyari, powañaayetairi kamayewetachari, petsiyatakotakagairi pathaawaitatsiri, eejatzi raagayetziri peyari. Tema neshironkataarewo pinayetake, te piñiiro inkowakoitemi. Pimatairo eeroka pineshironkatantai eejatzi. <sup>9</sup>Eero paanake piyorikite pithaateki, <sup>10</sup>eero paanake eejatzi pithaate, eero paanake apite piithaare, pizapato-te, pikotziki, tekaatsi apaani paanake. Tema ikantaitzi:

Ripinaiteri antawaitatsiri.

<sup>11</sup>Arika pareetakya nampitsiki, pamine aakameethatemine, iri pintsipatapaakyaari, irojatzi pawisantanakyaari otsipaki nampitsi.

<sup>12</sup>Arika pareetakya pankotsiki, piwethatapaakyaari ikaatzi saikatsiri.

<sup>13</sup>Arika raakameethatawakemi piwethatapaakari, ari iñeero risaikai kameetha. Irooma eerorika raakameethatawakemi, aminaashitaka piwethawetapaakari. <sup>14</sup>Eerorika raakameethaitzimi, eerorika ikemisantitzimi eejatzi, pawisapithateri, potekanairo piipatsiyitzite.

<sup>15</sup>Tema iri rimaperote paata rowasankeeteri jirika, ari anaanakero ikantitakerira Sodoma-satzi eejatzi Gomorra-satzi. Imaperotatyá.”

### Rowashironkagaitaatyeyemi paata

<sup>16</sup>“Notyaantzimika iroñaaka. Poshiyawaitakari rotyaantaitziri oweja tsika ipiyotapaa owantaneri. Iro kantacha ontzimatye poshiyakotyari kokyantzi maanke. Ontzimatye eejatzi poshiyari shiro te ikatsimawaitzi. <sup>17</sup>Paamaawentya. Tema raakaantaitatyeyemi jeariki ripasawaitaitemi pankotsiki rapatotapiintaitaga. <sup>18</sup>Iroatzi ragaitantanakemi risaikira pinkathariperori okantakaantziro pawentaanaga. Ari pinkenkithatakoyetainari, iroatzi inkemantayetayaari itsipasatzti atziri kaari ashinkata. <sup>19</sup>Arika piñaakero raayeetanakemi, eero pikantashirewaitzi: ‘¿Oitaka nonkantapaakeri?’ Tzimatsi yotakaimirone oita pinkanteri. <sup>20</sup>Eero piyotashitawo apaniroini oita pinkanteri, Tasorenkantsi poñaachari Ashitzimiriki, iriira yotakaimirone onkaate pinkantayetapaakeri. <sup>21</sup>Ari iñagaitake aakaanterine irinentzi rowamaakaanteri. Piñe aakaanterine itomi. Piñe tsitokakaanterine ipaapate inkisaneentanakeri. <sup>22</sup>Osheki piñeero inkisaneentaitemi okantakaantziro pikemisantaanaga, iro kantzimaitacha arika pinkamaitanakyaawo pawentina, aritake nowawisaakoshiretaimi. <sup>23</sup>Arika inkisaneentitanakemi nampitsiki, pawishe otsipaki nampitsi. Tema tekera pithonkiroota pinkenayete maawoiniki nampitsi tsika risaikayetzi Israel-iite, iroatzi ripiyantaiyaari jirika Itomi Atziri. Imaperotatyá.

<sup>24</sup>Te iñagaitzi apaani riyotagaitziri ranayeri yotairiri. Te iñagaitzi apaani imperataarewo ranayeri imperatariri impinkathaiteri. <sup>25</sup>Apatziro añairi riyotagaitziri roshiyakotari yotairiri pairani. Ari ikantari eejatzi imperataarewo. Tema ikisaneentaitakena naaka iroñaaka, roshiyakagaitakena naakame Beelzebú iwinkatharite peyari. Eeroka rimaperote inkisaneentaitemi pikemisantaanaga.”

### ¿Tsika iitaka ampinkathateri?

(Lc. 12.2-9)

<sup>26</sup>“Iro kantzimaitacha eero pipinkashiwaitari jirikapaini. Ontzimatye onkoñaatakoyetai okaatzi manakowetainchari, ooñaawontairo kaari ikemathaweeda pairani. <sup>27</sup>Apapiroini niyotakaayetaimiro eeroka jirokapaini, te riyotakotziro thainkantaneri irirori, eeroka kenkithatakaayetairine. <sup>28</sup>Eero pipinkashiwaitari kowatsine ritsitokemi, eerowa rimatziro irirori rotyaantem Sarinkaweniki. Iri pimpinkathateri Pawa, tema iri matzirori rotyaantem Sarinkaweniki. <sup>29</sup>Pamine, te ripinaperoweta tsimeryaanipaini, iri kantacha Pawa riyotzi arika inkamagaante apaani.<sup>k</sup> <sup>30</sup>Riyotzitawo

---

<sup>k</sup> 10.29 Kantakotachari jaka “te ripinaperoweta tsimeryaanipaini”, tema kantacha ramanantaitanyaari apaani koriki inkaaterika apite tsimeryaani.

Pawa okaatzi tzimayetatsiri aishi. <sup>31</sup> Piñaakero, raminawentziri Pawa tsimeryaanipaini, eeroka rimaperotzi raminawentzimi. Eerowa pipinkashiwaitari kisaneentzimiri. <sup>32</sup> Arika pinkanteri pisheninka: ‘Nopinkathatairi Jesúś’, aritake nonkantairi Ashitanari Inkitesatzi: ‘Papá, ipinkathataana jirika, asheninkataari.’ <sup>33</sup> Irooma pinkanteririka pisheninka: ‘Te nompinkathateri Jesúś’, ari nonkantzyaari naaka, nonkantairi Ashitanari: ‘Papá, te ipinkathatana jirika, te asheninkatari.’ ”

**Ikenkithatakota Jesús**  
(Lc. 12.49-53; 14.26-27)

<sup>34</sup> “Te nokowi ikompitzimotemi oita nipokantakari. Te inta niyotaayetairi atziri raakameethatawakagaiya. Tema nipokakera, oshiyawaitakawo namatyeeumirome owathaamentotsi pantaminthatawakaantyaari.

<sup>35</sup> Tema iro nipokantakari:

Inkisaneeentantyaariri atziripaini ipaapatetari,  
Onkisaneeentantyaawori tsinane onaanatetari,  
Onkisaneeentantyaawori tsinane ayiro.

<sup>36</sup> Iri pithokashitawakaachane atziripaini inkisaneeentawakaiya risaikaiyinira ipankoki. <sup>37</sup> Tema iro kameethawetachari petakoyetyaari pipaapate, pinaanate, peentsitepaine eejatzi. Iro kantzimaitacha arika anaanakero okaatzi pinintana pawentaana naaka, tekeraga pithotyiyo pawentaana. <sup>38</sup> Ontzimatye pinkyaryoowentero nokenkithatakoyetakemiri, onkantawetya inkentakoitemi. Arika pipakaakero, tera pikyaryoowentziro pawentaawetaana. <sup>39</sup> Tema ikaatzi etakowitzachari apaniroini rantayetziro iñaamatashiyetari, ari impeyashitaiya. Iriima kamawentenane rantanairo nokowakairiri naaka, ari rawisakoshiretai.”

**Ripinaitairiri**  
(Mr. 9.41)

<sup>40</sup> “Tzimatsirika iita aapatziyemine, naakaga raapatziyaka. Ari okantari eejatzi, inkaate aapatziyainane naaka, iri raapatziyaka Ashitanari otyaantakenari jaka. <sup>41</sup> Tzimatsirika yotemine Kamantantaneri pini, irojatzi raapatziyantanakemi, arira ripinatairi Pawa paata, tsipatakariri Kamantantaneriite. Ari okantari eejatzi, tzimatsirika yotakemine kameethashireri pikantanaawo pikemisantanai, irojatzi raakameethantanakemi, arira ripinatairi Pawa paata, tsipatakariri kameethashireri. <sup>42</sup> Arika ryoitemi eerokatake niyotaanewo, iro ompoñaantyaari impemi pimere, riytakerowa Pawa, iri pinatairine jirika etakotakemiri.”

**Rotyaantziri Juan riyotaanewo**  
*(Lc. 7.18-35)*

**11** <sup>1</sup>Ikaataker Juan riyotaayetakeri 12 riyotaanewo. Owaaganaka inkamantante maawoiniki nampitsi saikatsiri janta.

<sup>2</sup>Ikanta Juan omitsitsiyaatantaneri, romonkyagaitakeri chapinki, ikemakotakeri rantayetakeri Cristo, rotyaantake apite riyotaanewo irirori, <sup>3</sup>rosampiteri Jesú, inkanteri: “¿Eerokatakema iitatziri, ‘Pokatsine?’ Kaaririka eeroka, ¿Eenitatsima itsipa naamayaari?”

<sup>4</sup>Ikanta rareetaiyakan, rosampitapaakeri Jesú. Iro ikantantanakariri irirori: “Arika piyaatai, pinkamantapairi Juan maawoini pikemakeri eeroka, okaatzi piñaayetakeri nantakeri eejatzi. <sup>5</sup>Tema nokiryaaakagairi mawityaakiri, nanashitakaayetaari kisopookiri, netsiyatakotakaayetairi pathaawaiwetachari, nokemakaayetairi witakempitari, nowañaayetairi kaminkari, nokenkithatakoyetainiri Kameethari Ñaantsi ashironkainkaripaini. <sup>6</sup>Irootake inkimoshiretantaiaari kaari kisoshirewentinane.”

<sup>7</sup>Ikanta ripiyayetanaa riyotaanewo Juan, rosampitanakeri Jesú ikaatzi piyowentakariri, ikenkithatakotziri Juan, ikantzi: “¿Tsika iitaka poshiyakairi piñaakeri chapinki ochempiki? ¿Iriima piñaake apaani oshiyakawori sawoo ompironkatonkitakaari tampyaa okantakaari te ithaamentashireta? <sup>8</sup>¿Piñaapaakerima rowaneenkataka ikithaataka? Te. Tema ikaatzi owaneenkatachari ikithaata, risaikawankotziri irirori pinkathari. <sup>9</sup>Iro piyatashitariri piyotaiyakeni Kamantantaneri rini. Tema rimaperotatziro irirori rawisanakeri Kamantantaneriite. <sup>10</sup>Tema iriitake rosankenatakoitakeri pairani, riñaanatziri Pawa Itomi, ikantziri:

Notomí, ari notyaantake etyaawone inkamantakotemi,

Iri wetsikaantemine tsika pinkenapaake eeroka.

<sup>11</sup>Pinkeme nonkante naaka: Atziripaini ikaatzi tzimayewetainchari pairani, tekaatsi anairone riyotanetakari Juan. Iro kantzimaitacha inkaate impinkathariwentairi Pawa inkiteki, tsinampashiretaatsine janta, ranagairi irirori Juan. Imaperotatyaga. <sup>12</sup>Tema retanakawo pairani Juan ikenkithatakayetakemi, eenitatsi osheki atziri ñaamatananakawori kameethaini iñeero tsika ipinkatharitai Inkitesatzi. Antawoite ikowanake iñeero oshiyawaitakawo ishintsitaitzi arika romanataitya. Irojatzi ikantaita iroñaaka. <sup>13</sup>Pairani tekera itzimiita Juan, tzimawetacha Kamantantaneri eejatzi Inintakaantaitanewo.

<sup>14</sup>Iriira Juan ikenkithakoitakeri pairani, iriitake Elías-tatsiri piyattsine. <sup>15</sup>Kowirori inkemathatero, inkemisante. <sup>16</sup>Noshiyakaakemiri koshekawaarentzi eentsi arika roshiyakaawaitya, <sup>17</sup>ikantawaka: ‘Jame ashowite omampaantyaari.’ Temaita ikowi. Ikantawaka eejatzi: ‘Jame omampaiya owashiretantlyaari.’ Te ikowiro eejatzi. <sup>18</sup>Ari pikantaiyakaní

eeroka. Piñaawetawakari Juan, ritzitapaakawo rowanawo, te ririro kachori, pikantaiyakerini: ‘Raagatziiri peyari, iro ritziwentantari.’

<sup>19</sup> Ripokawetaka Itomi Atziri, te ritzitawo owanawontsi, ririro kachori eejatzi. Pikantaiyakerini: ‘Kaariperori rini jirika, osomiyawaarentzi, shinkiyantzi rini eejatzi. Raapatziyari apatotziriri koriki, raapatziyari eejatzi kaariperoshireri.’ Tekaatsi oitya, tema arika iñagaitakero onkaate awisayetaatsine paata, arira ryoitairi imapero riyotanetzi.”

**Ikantamatsititziri kisoshireri nampsikipaini  
(Lc. 10.13-16)**

<sup>20</sup> Ikenkithatakotanakeri Jesús ikaatzi ñaawetakawori ritasonkawentantayetake nampsikipaini, temaita ripakairo ikaariperoshiretaiyini. Ikantanake: <sup>21</sup> “Ikantamatsititziri Corazín-satzi, eejatzi Betsaida-satzi. Osheki iñaayewetakena nitasonkawentantayetake, temaita ikemisantaiyini. Iriime ñaakenane Tiro-satzi, Sidón-satzi nitasonkawentantzi, ari rowashiretakotanakaame ikaariperoshiretake, ripakaanakerome. Inkemisantayetaime maawoini iriroripaini.”

<sup>22</sup> Paata arika raayetairi kameethashiretaintsiri, eero rimaperoitziri rowasanketaiteri Tiro-satzi, eejatzi Sidón-satzi. Rimaperoitairi rowasanketaiteri Corazín-satzi, eejatzi Betsaida-satzi, tema iñaawetakena nitasonkawentantayetzi, temaita ikemisantzi. <sup>23</sup> Eejatzi inkantayetaiya Capernaum-satzi, ikenkithashiretaiyani irirori ryaayetai inkiteki, iro kantzimaitacha osheki ikisoshiretake, ryaayetai ikenayetzira kaminkari. Iriime ñaakeroneme Sodoma-satzi pairani okaatzi iñaayetakeri Capernaum-satzi, inkemisantayetaime irirori, eero raperaatairime pairani Pawa saikaiyatsinime iroñaaka. <sup>24</sup> Arika raayetairi paata kameethashireyetaintsiri, iriira rimaperoitai rowasanketaitarai Capernaum-satzi, anaanakero rowasanketakeri pairani Sodoma-satzi.”

**Pipokashitaina naaka, ari piñeero nimakoryaakaayetaimi  
(Lc. 10.21-22)**

<sup>25</sup> Ikanta ramanamanaatanakari Jesús Ashitariri, ikantanakeri: “Papá, eeroka pinkathariwentziriri maawoini inkitesatzi, eejatzi maawoini kipatsisatzi, osheki niwetharyaakemi. Tema eeroka yotakaayetairiri oshiyakariri eentsi tsinampashiretaatsiri, kaari riyoyetzi yowairentziite.

<sup>26</sup> Tema iro inimotakemiri.” <sup>27</sup> Ikantanakeri piyowentakariri: “Iri Ashitanari yotakaakenawori maawoini. Apaniroini riyoperotana naaka tema Itomi rowana. Ari nokantari eejatzi naaka apaniroini niyoperotziri. Iroatzi riyoyetairi inkaate niyotakaayetairi naaka. <sup>28</sup> Arika piñeero

**11.21** Tema jirikapaini Corazín-satzi eejatzi Betsaida-satzi Judá-ite rinayetzi. Iriima Tiro-satzi, Sidón-satzi itsipasatzi atziri rinayetzi, te isheninkatari Judá-ite.

pimakoshirewaite, arika piñeero oita ñaantsipookitzimotemine, pipokashitaina naaka, pinkamantainawo, aritake piñagairo nimakoryaakaayetaimi. <sup>29</sup>Eero pimanintziro ñaantsipookitzimotemine, naakatake imperatzimiri pantero. Eenitatsi nokowiri niyotaimiri, te niyote naaka nowatsimaashirewaitya, tsinampashireri nini. Ari piñagairo nimakoryaashiretakagaimi. <sup>30</sup>Tema okaatzi nimperatantari naaka, te opomeentsiperota.”

**Ikenkithatakotziro Jesús kiteesheri rimakoryaantaitari**

(*Mr. 2.23-28; Lc. 6.1-5*)

**12** <sup>1</sup>Okanta apaani kiteesheri rimakoryaantaitari, ikenanake Jesús pankirentsimashiki. Tema ritasheyaiyatziini Riyotaanewo, ikowiitanake okithokiki pankirentsi royaari. <sup>2</sup>Inaakeri Fariseo-paini, iro ikantantakariri Jesús: “Pamineri piyotaanewo. Jiroka kiteesheri rimakoryaantaitari ini, te ishinetaantsita inkowiitaite.” <sup>3</sup>Rakanakeri Jesús ikantziri: “Tema piñaanatakotziri ikantakota David-ni, aantawetariri ritashe itsipayetakari ikaataiyini. <sup>4</sup>Ikyaaake pairani tasorentsipankoki, rowakawo tasorentsitsiri, ipayetakeri eejatzi itsipatakari. Te ishinetaantsiweta, apatziro rowapiintawo Imperatasorentsitaarewo. <sup>5</sup>Rosankenaitake eejatzi pairani Inintakaantaitanewo, okantzi: ‘Eero pantawaitantawo kiteesheri rimakoryaantaitari.’ Iro kantzimaitacha ryaatapiintzi Imperatasorentsitaarewo kiteesheriki rimakoryaantaitari tasorentsipankoki, rantawaitapiintzi. Tekaatsi kisakotyaawone. <sup>6</sup>Nokantzi naaka, eenitatsi jaka impinkathaperoiteri, iri anairori tasorentsipanko. <sup>7</sup>Iro rosankenatantaitakawori pairani, kantatsiri:

Te apa nonkoweri pamayetaina pipira pitagainari.

Iro nokowaperotairi pineshironkayetairi pisheninka.

Arikame pinkemathatero jiroka, eero pikantzirime jirikapaini, te ikaariperoshiretzi. <sup>8</sup>Jirika Itomi Atziri ipinkathariperotzi irirori, ranairo kiteesheri rimakoryaantaitari.”

**Atziri kisoimpekiri**

(*Mr. 3.1-6; Lc. 6.6-11*)

<sup>9</sup>Ikanta rowaaganaaawo Jesús, ikyAAPAI eejatzi rapatotapiintaitaga. <sup>10</sup>Ari risaikakeri janta atziri kisoimpekitatsiri. Ikanta Fariseo-paini, rosampitakeri Jesús, ikantziri: “¿Kameethatatsima petsiyatakotakagairi kisoimpekiri kiteesheriki rimakoryaantaitari?” Iroowa rosampitantariri ontzimantyaari inkantakoteriri. <sup>11</sup>Rakanakeri irirori, ikantziri: “Te paminaminthatashitari pipira arika rotetya omoonaki kiteesheriki rimakoryaantaitari, petakotari, pagairi. <sup>12</sup>Iriira retakoperoitari atziri, ranairi piratsi. Te owaariperoshiretanzti aneshironkatante kiteesheriki

rimakoryaantitari.” <sup>13</sup> Riñaanatanakeri atziri kisoimpekiri, ikantziri: “Pampiryaawakotai.” Matanaka atziri, akotsitanai, oshiyanaawo otsipa rako. <sup>14</sup> Kisaiyanakan Fariseo-paini. Jataiyakeni, ikenkithawaitaiyini, ikantzzi: “¿Jimpe ankanterika Jesúś, ampeyakaantyaariri?”

### Rosankenatakoitzitakari pairani Jesúś

<sup>15</sup> Yotake Jesúś ikowitzatzi ritsitokaiteri, iro rowaagantanaari. Royaatanakeri osheki atziri, retsiyatatakagairi maawoini mantsiyari. <sup>16</sup> Ikantayewetakari: “Eerowa pithawetakotana.” <sup>17</sup> Ari imonkaatari rosankenatakagaitakeriri pairani Kamantantaneri Isaiás-ni, ikantzzi:

- <sup>18</sup> Jirika nimperatanewo, iri niyyaakeri.  
Netakotanewo rini, iri oimoshirenkanari.
- Kisokero roweri Tasorenkantsi,  
Inkenkithatakagairi kaari ashinkata, inkamantairi irooperotatsiri.
- <sup>19</sup> Eero richeraawentawaita irirori,  
Eero ikemaitziri ishindsight inkenkithatakotya,
- <sup>20</sup> Eero rowatsiperotziro risatairo sonkare sataawetainchari,  
Eero rotsiwakiro paampari paampamenkiwetainchari,  
Iroatzti rimatantyaawori iñeero irooperotatsiri.<sup>m</sup>
- <sup>21</sup> Iri royaakoneentairi kaari ashinkata raakotairi iwairo.

### Kishimatzipiriri Tasorenkantsi

(Mr. 3.20-30; Lc. 11.14-23)

<sup>22</sup> Ikanta ramaitakeniri Jesúś raayiri peyari, ramashookitakaakari, ikisowaantetakaakeri eejatzi. Retsiyatakotakaawakeri, aminanai kameetha, ñaawaitanai eejatzi. <sup>23</sup> Riyokitzitanake maawoini atziri, ikantaiyini: “¿Iriima jirika icharine David-ni oyaakoneentziri?” <sup>24</sup> Kemaiyakeni Fariseo, ikantaiyanakeni irirori: “Jirika atziri ishindsightakaatziiri ashitariri peyari Beelzebú, iro rowawisaakotantariri raagayetziri peyari.” <sup>25</sup> Iri kantzimaitacha Jesúś riyotakotakeri ikenkithashireyetari, ikantanakeri: “Atziri ipinkathariwentaitziri tsikarikapaini, arika rantaminthatawakaiya, ari iñaakero rookanawentawakaiya. Eejatzi arika rantaminthatawakaiya inampiki atziri, ari iñaakero rookanawentawakaiya inampiki. Arika rantaminthatawakaiya atziri ikaatzi risaikawankotawakaa, ari iñaakero rookanawentawakaiya ipankoki. <sup>26</sup> Ari ikantari eejatzi peyari arika

<sup>m</sup> 12.20 Oshiyakaawentachari sonkare eejatzi paampamenkiwetainchari, iriitake atziripaini ikaatzi kemisantawetachari eepichokiini, ashironkaashireyetachari, mantsiyashireyetatsiri, jentashireyetatsiri, ari ineshironkayetairi Jesúś jirikapaini, eero rishinetziri rashironkaayetaiya aawyaashireri inkantakaayetaiyaari, roshireperotakaayetaiyaari.

rantaminthatawaiyaame. Arika rookanawentawakaanakya, ¿eeroma iñiilo rithonky? <sup>27</sup>Iriirkame Kamaari Beelzebú shintsitakainane naaka, ¿irijatzima Kamaari shintsitakayiriri piyotaanewo eeroka rowawisaakotantariri raagaitziri? Arika okanta pithawetakotatziiri piyotaanewo, ari inkisaneentawentakemiro okaatzi pikantakeri.

<sup>28</sup>Iri Tasorenkantsi poñaachari Pawaki shintsitakaanari naaka nowawisaakotantariri raayiri peyari. Irijatzti Pawa omapokakemiri eeroka ipinkathariwentantzi. <sup>29</sup>Arika inkowaite inkoshiiteri shintsitsiria kameetha atziri, ontzimatye retaitawakyaari roosoiteri, eero ikisakowentantawo rashiwetari arika rayitaiteri. <sup>30</sup>Ikaatzi kaari aapatzianari naaka, iriitake kisaneentanari. Inkaate kaari amitakotenane rowiitakotena, reewanatakotatyana. <sup>31</sup>Iro kantzimaitacha nokantzi naaka: Kantacha impeyakotairi Pawa inkaate kaariperoshirewetachari, eejatzti inkantairi maawoini ñaawaiwetawori kaariperori ñaantsi. Iriima kishimatakerine Tasorenkantsi, eero ipeyakoitairi. <sup>32</sup>Ari okantari eejatzti: Kantacha impeyakotairi Pawa inkaate kishimawetyaarine Itomi Atziri, iriima kishimatakerine Tasorenkantsi, eero iñagairo impeyakoitairi. <sup>33</sup>Oshiyawaityaawo arika iñagaitero kameethari chochoki, riyatitzia kameetha ini owaato tsika opoñaakawo chochoki. Ari okantari eejatzti arika iñagaitero chochoki piyantatsiri, riyatitzia kaariperori ini owaato tsika opoñaaka iroori. <sup>34</sup>Poshiyakari maanke, kaariperoshireri pikantaiyakani. Tekaatsi pinkenakairo piñaawaitero kameethari, te ompantyaawo pikenkithashireyetari, iro okaariperotantakari piñaawaiyetziri.

<sup>35</sup>Tema apaani kameethashireri ikenkithashiretawo kameethatatsiri, iro okameethatantari rantayetziri. Iriima kaariperoshiretsiri te ikenkithashiretapiintawo kameethatatsiri, iro okaariperotantari rantayetziri. <sup>36</sup>Iro nokantantari naaka, ari raminakoitairo paata kaariperori riñaawaitatziri. <sup>37</sup>Kameetharika okaatzi piñaaneyetari, ari raakameethaitaimi. Irooma terika okameethatzi, inkantayeetaimi: ‘Kaariperoshireri pinake, osheki pinkemaatsitayaawo.’ ”

### Ikowaweta kaariperoshireri ritasonkawentantaite (Lc. 11.29-32)

<sup>38</sup>Ikanta rakaiyanakeni Fariseo itsipatakari Yotzinkariite ikantanakeri: “Yotaantanerí, nokowi noñeemi pitasonkawentante.” <sup>39</sup>Rakanake Jesús ikantzi: “Kaariperoshireri pinaiyini eeroka, pithainkanewo powakeri Pawa, pikowaiyini piñeena nitasonkawentante. Eeromaita noñaayimiro, apatziro piñeero oshiyawone awishimotakeriri pairani Jonás, <sup>40</sup>iniyantakariri oshiyariri antari ñaaweri, tema mawa kiteesheri risaikake imotziki. Ari inkantyaari eejatzti jirika Itomi Atziri inkitawetapaintya mawa kiteesheri. <sup>41</sup>Paata arika raminakoitairo

okaatzi rantaitziri, ari ryakowentaimi Nínive-satzi, tema ikemisantairi pairani irirori Jonás ripakaanairo ikaariperoshirewetaiyani. Tema jirika saikimotakemiri iroñaaka ranairi Jonás.<sup>42</sup> Paata arika raminakoitairo okaatzi rantaitziri, ari iyakowentaimi tsinane pinkathawotatsiri pairani nampitsiki Sabá, tema ipokashitakeri iroori pinkathari Salomón, okemisantairi. Jirika saikimotakemiri iroñaaka ranairi Salomón.”

**Ripiyashitanta peyari**  
(Lc. 11.24-26)

<sup>43</sup> “Oshiyawaitakawo risaikashiretantari peyari apaani atziri, ipankotetakawo rañaamento. Arika rookaweeetakaari, awisakowetaa atziri risaikantakari peyari. Jatawetaawo ikenawaitzi ochempiki, te iñi jimpe risaike. <sup>44</sup> Ikantashiretai peyari: ‘Nipyaita nopankoki tsika nopoñaanaka ketziroini.’ Piyaawo peyari, iñaapairi atziri kameetha opishitaka rañaamento, owaneenka okantaka. <sup>45</sup> Riyaatashitakeri maperotzirori ipeyaritzi, inkantakeri: ‘Jame aate nopankoki, pintsipatena ampinkatharite.’ Ramake ikaatzi 7. Ari rashironkaaperotyaari jirika atziri, eero roshiyaa rashironkaaweta pairani eepichokiini. Ari pinkantayetaiyaari iroñaaka eerokapaini.”

**Ikenkithatakotziro Jesú斯 inaanate eejatzí irarentzi**  
(Mr. 3.31-35; Lc. 8.19-21)

<sup>46</sup> Eekero ikenkithataaatziiiri Jesú斯 atziri piyowentakariri, ari areetapaaka inaanate otsipatakari irirentzipaini, okatziyapaaka jakakeroki, okaimakaantapaakeri. <sup>47</sup> Ikantaweeetakari: “Ari ipoki pinaanate otsipatakari parentzipaini, okowi oñeemi.” <sup>48</sup> Ari rakanake ikantzi: “¿Itaka pikenkithashiryaari iroowa nonaanate, iriira nirentzitari?” <sup>49</sup> Rookotanakeri ikaatzi riyyotaayetapiintakeri, ikantzi: “Jirikapaini iriitake noshiyakagairi nirentzi, iro noshiyakagairi eejatzí nonaanate. <sup>50</sup> Tema maawoini antanairori ikowayetziri Ashitairi Inkitesatzi, iriitake nirentzitaari, irootake nitsirotaari, irootake ninirotaari.”

**Roshiyakaawentziri Jesú斯 pankiwaientzi**  
(Mr. 4.1-9; Lc. 8.4-8)

**13** <sup>1</sup>Ikanta rishitowanai Jesú斯 pankotsiki, jatanai inkaarecheraaki. <sup>2</sup>Ari risaikapaake. <sup>3</sup>Ipiyowentapaari osheki atziri. Iñaake othataka pitotsi, otetapaaka, saikapaake. Katziyaiyakaní atziri inkaarecheraaki. <sup>3</sup>Roshiyakaawentziri okaatzi ikenkithatakairiri, ikantziri: “Tzimatsi pankiwaientzi jatatsiri impankiwaite. <sup>4</sup>Ikanta rookakitakero iwankire, tzimatsi jokakitapainchari awotsiki, ripokapaake tsimeryaani, rowapaakawo. <sup>5</sup>Tzimatsi otsipa jokakitapainchari

omapipookitzira tekaatsipero kipatsi, ari ishookawetanakari intsipaite. Te otontapathatzi kipatsi,<sup>6</sup> sampishitanake pankirentsi ishaintsikitaakera ooryaa, tema te okyaaperotzi oparitha inthomoiki.<sup>7</sup> Tzimatsi otsipa jokakitapainchari kitcheemashiki, anaanakero kitchee ishookanake, kamanake pankirentsi.<sup>8</sup> Irooma otsipa jokakitapainchari okameethapathatzi kipatsi, saankana ishookanake, kithokitanake maawoini. Tzimanai okithoki apawopaini okaatzi shookapaintsiri. Apaani shekichonchoitanaaintsiri okithoki, otsipa shekipiyokineentaintsiri, otsipa eepiyokiini okithokitanake.<sup>9</sup> Kowatsiri inkemathatero, rowayempitaty inkemisante.”

**¿Oitaka roshiyakaawentantawori Jesús?**

(Mr. 4.10-12; Lc. 8.9-10)

<sup>10</sup> Irojatzি rosampitantanakariri riyotaanewo, ikantziri:  
“¿Oitaka poshiyakaawentziniriri atziripaini?”<sup>11</sup> Rakanake Jesús, ikantziri: “Rishinetaitakemiro eerokapaini piyotairo tsika ikanta ipinkathariwentantai Inkitesatzi, iriima jirikapaini te rishinetaitziniri irirori.<sup>12</sup> Ikaatzi oshekitzimotakeri, ari oshekichonchoitzimotairi. Iriima kaari oshekitzimotzi, eero oshekichonchoitzimotairi.<sup>13</sup> Iroowa noshiyakaawentantawori jiroka, onkantya raminawetya jirikapaini, eero iñiimaitawo. Arika inkemawetyaawo, eero riyotawakero nokantawetariri.<sup>14</sup> Iri ikenkithatakotake pairani Isaías-ni, ikantake:

Pinkemaiyawetyaani, eeromaita piyotaiyironi.

Paminaiyawetyaani, eeromaita piñagaiyironi.

<sup>15</sup> Tema kisoshire ikantaiyakani jirikapaini.

Witakempitari ikantaiyakani.

Amashookiri ikantaiyakani eejatzi.

Irootake kaari iñaantaiyawoni,

Kaari ikemantaiyani,

Kaari ikenkithashiretantaiyani.

Te ikemisantaiyini, eero nowawisaakotairi.

<sup>16</sup> Irooma eerokapaini kimoshire pikantaiyaani, tema piñagairo, pikemayetairo eejatzi.<sup>17</sup> Iro ikowaiyawetakarini pairani Kamantantaneriite eejatzi kameethashireriite, iñeerome irirori okaatzi piñaayetairi eerokapaini. Ikowawetayakani inkemerome pikemaiyakerini eureka. Te iñeena, te ikemana eejatzi. Imaperotatya.”

**n 13.8** Kantakotachari jaka “okaatzi shookapaintsiri”, aamaaka okaatzi 100 okithoki, otsipa okaatzi 60 okithoki, otsipa okaatzi 30 okithoki. **o 13.12** Okaatzi kenkithatakotachari jaka, jiroka okantakota: Eepichokiinrika pikemisantawakero nokantakemiri, eepichokiini piyotairo. Irooma pinkemisantaperotawakerika, osheki piyotawakeri, eekero niyotakaaperotatyemiro.

**Ikenkithatakotziro Jesús roshiyakaawentziri pankiwairentzi  
(Mr. 4.13-20; Lc. 8.11-15)**

18 “Pinkeme nonkamantemiro okaatzi noshiyakaawentakeriri pankiwairentzi. 19 Tzimatsi kemirori nokenkithatakotziro ipinkathariwentantaira Pawa, temaita riyotakotziro. Ikanta ripokapaake owaariperoshiretantatsiri ripakaakaapaakeri ikemisantawetana. Iri oshiyakawori pankirentsi jokakitapainchari awotsiki. 20 Eenitatsi thaamentawori niñaane, ikemisantaweta intspiaite. Iri oshiyakawori pankirentsi jokakitapainchari omapipookitzira. 21 Te riyoperotero ñaantsi, te ikisashitawo rowasankewentitanakeri ikemisantzi, ripakaanakero. Roshiyakawo pankirentzi sampishitanaintsiri te okyaaperotzi oparitha inthomoiki kipatsiki. 22 Eenitatsi kemawetawori niñaane, iro kantzimaitacha iñaamawaitawo inthaamentawaitya, osheki eejatzi ikenkithashiretakotziro rowaagawo, irootake ipeyakotantakawori niñaane, te ikemisantzi. Roshiyakawo pankirentsi jokakitapainchari kitcheemashiki, kaari kithokitatsine. 23 Tzimatsi itsipa kemirori niñaane, ikemisantanakero. Ikyaaryooowentanakero. Iri oshiyakawori pankirentsi shookapaintsiri okameethapathatzira kipatsi, shekichonchoitanake okithoki, ortsipa shekipiyokineentaintsiri, ortsipa eepiyokiini okithokitanake.”<sup>p</sup>

**Ikenkithatakotziri Jesús pankitzirori trigo**

24 Roshiyakaawentakeniri eejatzi Jesús, ikantzi: “Jirokaga ikanta ipinkathariwentantai Inkitesatzi, oshiyatyari apaani atziri pankitakaantzirori kameethakiri trigo.<sup>q</sup> 25 Okanta tsireniriki rimagaiyinira ratziritepaine eejatzi irirori, pokake kisaneeentziriri ramake okithoki trigo-niro, ipankitapaakeniri rowaneki, rowaitakero trigo-pero, piyanaka. 26 Okanta ishookanake trigo-pero, kithokitanake. Eejatzi okantztaka trigo-niro rowaitaitakerori. 27 Ikanta iñaakero ratzirite, ryaatashitakeri ashitawori, ikantakeri: ‘Te opantawo okithoki trigo apankitakeri powaneki, ¿iitaka owaitantakari ishooki trigo-niro?’ 28 Ikantanake ashitawori rowane: ‘Kisaneeantanari pankitakerori.’ Ikantzi ratzirite: ‘¿Pikowima niyaate nonthokayetairo trigo-niro?’ 29 Rakanake, ikantzi: ‘Eero, aamaashitya pithokakotzirokari trigo-pero. 30 Atake okantawakaata owaityaawoota isooke, irojatzi isampatantakyaari trigo-pero. Aripaite nonkantemi: Pithatzinkero trigo-niro, pitayero. Powiitero trigo-pero, powayetairo.’ ”

---

**p 13.23** Paminero kantakotachari versículo 13.8.    **q 13.24** Ikantaitziri jaká “trigo”, pankirentsi ini, ritoonkaitziro okithoki, iroowa riwetsikantaitawori pan.

**Roshiyakaawentaitziro okithoki oryaanikitatsiri**  
*(Mr. 4.30-32; Lc. 13.18-19)*

<sup>31</sup> Ikanta rapiitakero Jesús roshiyakaawentziniri, ikantziri: “Jirokaga ikanta eejatzi ipinkathariwentantai Inkitesatzi, roshiyakari pankitzirori oryaanikitatsiri okithoki pankirentsi.” <sup>32</sup> Oryaani okantaweta okithoki, iro kantzimaitacha arika ishookanake, anairo otsipa pankirentsi, antawo otewayetanake ari imenkoshiyetari tsimeryaaniki itsimankatapishitakera.”

**Roshiyakaawentaitziro kachopathari**  
*(Lc. 13.20-21)*

<sup>33</sup> Jiroka otsipa roshiyakaawentakeri Jesús, ikantzi: “Jirokaga ikanta ipinkathariwentantai Inkitesatzi, roshiyakawo apaani tsinane naashewaitatsiri. Aake eepichokiini kachopathari, owaitantakawo maawoini oshe. Ari oñaakero onkachopathate.”<sup>s</sup>

**Oita roshiyakaawentantawori Jesús ikenkithatakoyetakeri**  
*(Mr. 4.33-34)*

<sup>34</sup> Ari ikantapiinta Jesús roshiyakaawentziro okaatzi riyotaantayetziri. Tekaatsi apaani kaari roshiyakaawente. <sup>35</sup> Ari imonkaatari ikenkithatakotakeri pairani Kamantantaneri ikenkithatakotziro ikantakeri Pawa:

Noshiyakaawentatyeeniri atziri maawoini nonkamanteriri.  
 Nooñaawontainiri kaari riyotaitzi pairani owakera iwetsikantakari kipatsi irojatzi iroñaaka.

**Rooñaawontziro Jesús oshiyakaawentachari trigo-niro**

<sup>36</sup> Ikanta ryaatanai Jesús, rookanairi piyowentakariri, jatanake pankotsiki. Ari rosampitakeri riyotaanewo, ikantziri: “Piyotainawo okaatzi poshiyakaawentakeri. ¿Oitaka oshiyakaawentachari trigo-niro rowaitaitakerori ipankiitziro trigo-pero?” <sup>37</sup> Ikantzi Jesús: “Jirika Itomi Atziri iriitake oshiyakariri ashitawori rowane ipankiitakerowa trigo-pero. <sup>38</sup> Jiroka owaantsi iro oshiyakaawentzirori kipatsi risaikantaitari. Jiroka trigo-pero iri oshiyakaawentacha ikaatzi ipinkathariwentairi Pawa. Irooma trigo-niro oshiyakaawentziri ikaatzi rashiyetari Kaariperori. <sup>39</sup> Jirika kisaneentantatsiri pankitakerori trigo-niro iri oshiyakaawentachari Kamaari. Oshiyawori rowiitaitziro okithoki trigo, oshiyakaawenta arika ithonkaiya paata kipatsi.

---

<sup>r</sup> 13.31 Iro “ikantakoitziri jaka” okithoki oryaanikitatsiri pankirentsi, jitachari mostaza, shookatsiri inampiki itsipa atziri. <sup>s</sup> 13.33 Kantakotachari jaka “maawoini oshe” irojatzi iiitatziri mawa inkatapathaitero oshe pasoki.

Jirikapaini owiiyetairori okithoki iri oshiyakaawentachari maninkariite.

<sup>40</sup> Piñaakero, ipioitakero trigo-niro, ritagaitakero. Iro oshiyakaawentachari arika ithonkaiya paata kipatsi. <sup>41</sup> Jirika Itomi Atziri rotyaantairi maninkariite, impiyotairi kaariperoshiretatsiri, tema te ikowi rowaitaiyaari ikaatzi kemisantayetakeriri. <sup>42</sup> Ritaayeetairi kaariperoshireri, riraawaitaiya ratsikaikiwaitya inkemaatsiwaitaiya. <sup>43</sup> Iriima kameethashiretantsiri, shipakirya inkantaiya roshiyaiyaari ooryaatsiri. Risaikimotairi Ashitairi tsika ipinkathariwentantzi irirori. Powayempitatyá.”

### Ikenkithatakotziri Jesús manachari koriki

<sup>44</sup> Rapiitanakero eejatzi Jesús, ikantzi: “Jiroka otsipa noshiyakaawentemiri. Tzimatsi osheki koriki rimanaitziri owaantsiki. Ikanta apaani atziri iñaakeri, te onkantya raanakeri, eejatzi rimananairi, tekaatsi inkamante, ikantashiretanake irirori: ‘Ontzimatye namanantero jiroka kipatsi, ompoñaantyaari nashityaari tzimatsiri janta.’ Ipimantakero okaatzi tzimimowetariri, ramanantakero kipatsi. Kimoshire ikantaka, tema ramanantakotake osheki koriki. Ari okantari eejatzi ipinkathariwentantai Inkitesatzi.”

### Ikenkithatakotziro Jesús poreryaari pinaperotachari

<sup>45</sup> Ikantzi eejatzi Jesús: “Jirokaga ikanta ipinkathariwentantai Inkitesatzi, roshiyari apaani atziri kowaintsiri ramanante poreryaari.<sup>t</sup> <sup>46</sup> Iñaake poreryaari, osheki ikowake rayeri. Irojatzi ripiyantanaari inampiki, ipimantapaakero okaatzi tzimimotziriri, ramanantakero poreryaari.”

### Ikenkithatakotziro Jesús tarajaamentotsi

<sup>47</sup> Ikantake eejatzi Jesús: “Jirokaga ikanta ipinkathariwentantai Inkitesatzi, roshiyakari apaani tarajaatatsiri. Raake osheki kantawaitachari shima. <sup>48</sup> Inoshikakotakeri othanyaaki, riyyaakeri kameethatatsiri. Rookayetakeri ikaatzi kaari kameethatatsi. <sup>49</sup> Ari onkantaiyaari paata arika ithonkaiya kipatsi. Ripokake maninkariite, rinashiyetaiyaari kameethashireri, ari inkanteri eejatzi kaariperoshireri. <sup>50</sup> Irojatzi ritaantayetyaariri kaariperoshireri, ari riraawaitaiyaari, ratsikaikiwaitaiya inkemaatsitaiya.”

### Ikenkithatakotziro Jesús owakerari owaagawontsi eejatzi antyashipawo

<sup>51</sup> Ikantzi Jesús: “¿Pikemathatakero okaatzi nokantayetakeri?” Ikantaiyini ryotaanewo: “Nokemathatakero.” <sup>52</sup> Ikantanake eejatzi Jesús:

<sup>t</sup> 13.45 Iro ikantakoitzí jaka poreryaari, ikaatzi poreryaayetatsiri oshiyawetawori mapi itaitziri “perla”, osheki inintaitziro. Osheki okanta owinawo.

“Noshiyakaawenteri apaani ashitaanitachari, tzimatsiri rowaagawo pinatachari. Raapiintziro antyashipawo rowaagawo, eejatz iowakerari. Ari ikanta ipinkathariwentantai Inkitesatzi, roshiyakari yowairentziite riyotaantairo okaatzi riyotaantaitziri pairani, riyotaantairo eejatz iowakerari.”

**Piyaawo Jesús Nazaret-ki**  
(*Mr. 6.1-6; Lc. 4.16-30*)

<sup>53</sup> Ikaatakeri Jesús roshiyakaawentakero okaatzi ikenkithatakotakeri, ari rowaaganawa. <sup>54</sup> Ikenanai inampiki. Riyotaantayetapai rapatotapiintaitaga. Riyokitziiwentawairi ikaatzi kemayetakeriri, ikantaiyini: “¿Itakama matakaakeriri jirika riyotanetantari, ritasonkawentantake eejatz? <sup>55</sup> ¿Kaarima itomi pimantzirori inchakotapaini? ¿Kaarima otomi María? ¿Kaarima irirentzipaini: Jacobo, José, Simón, eejatz Judas?” <sup>56</sup> ¿Kaarima atsipatari iritsiropaini jaka? ¿Tsika iitaka roshiyakaawaimatsitantari ipinkathariwentantzi?” <sup>57</sup> Osheki rithainkaitakeri, ikisaneentitanakeri. Iro ikantantanakari Jesús: “Rashi rowiro te ipinkathaitziri Kamantantaneri inampiki irirori.” <sup>58</sup> Tema osheki rithainkimawaitaitakeri Jesús inampiki, iro kaari ritasonkawentanta.

**Ikamantakari Juan omitsitsiyaatantaneri**  
(*Mr. 6.14-29; Lc. 3.19-20; 9.7-9*)

**14** <sup>1</sup> Ikanta Herodes jitachari Tetrarca, ikemakotakeri Jesús.  
<sup>2</sup> Ikantziri rimperatanewo: “Jirika Jesús iriitake Juan omitsitsiyaatantaneri. Iri añagaatsi, piñeeri otzimi ishinsinka.”  
<sup>3</sup> Tema iri Herodes akaantakeriri ketziroini Juan, roosotakaantakeri, romonkyakaantakeri. Iro kantakaantzirori Herodías iinantawetari irirentzi Felipe. <sup>4</sup> Tema ikaminaawetatyari Juan jirika Herodes, ikantawetari: “Te okameethatzi paapithatantziro.” <sup>5</sup> Ari ikowawetaka ritsitokakaanterime, iro kantzimaitacha osheki pinkathatakeriri Juan, riyotaiyini Kamantantaneri rini. Ithaawantanakari Herodes atziripaini, ikantashiretzi: “Arika nitsitokakaantakeri, ari inkisaneentitakena.”  
<sup>6</sup> Okanta imonkaatka kiteesheri roimoshirenkawentawo itzimantari Herodes. Ipiyotaiyakan osheki isheninka, roimoshirenkaiyani. Ari ipokapaake ishinto Herodías, omampaapaaka. Okameethatzimotanakeri Herodes. <sup>7</sup> Ikantakero: “Oitarika pinkowakotenari, ari nompakemiro. Imaperotaty, riyotzi Pawa eero namatawitzimi.” <sup>8</sup> Okantakero onaanate: “Pinkerteri rithatzinkakaanteri Juan.” Iroatzi okantantanakariri: “Nokowi pamakotakenawo iito Juan pasoshetaki.” <sup>9</sup> Ari rowashiretanaka

u **13.55** Jacobo, irijatz iitaitziri Santiago.

Herodes, te ikowaweta. Iro kantzimaitacha ikemaiyakerini isheninka ikantakerori ketziroini.<sup>10</sup> Irootake rithatzinkakaantantakariri Juan.<sup>11</sup> Ramakoitakero iito, ipakoitakero aanakeniro onaanate.<sup>12</sup> Irojatzi ripokaiyantapaarini riyotaanewo Juan, ikitatairi. Jataianakeni risaikira Jesús, ikamantapaakeri.

**Rowakaari Jesús 5000 shiramparipaini**  
(*Mr. 6.30-44; Lc. 9.10-17; Jn. 6.1-14*)

<sup>13</sup> Ikanta ikemake Jesús kamake Juan, otetanaka pitotsiki ryaatero tonkaariiteki. Iro kantzimaitacha ikemakoitakeri tsika ryaate, shiyaiyanakan ikenaiyanakeni awotsiki, royaataitanakeri.<sup>14</sup> Iro raatakotapaakitzii Jesú, iñaapaatzii osheki ipiyotaka atziri. Retakoshiretapaakari, retsiyatakotakaake osheki mantsiyatatsiri.<sup>15</sup> Okanta otsireniityaanake, ikantzi riyotaanewo Jesú: “Pamine, asaikatzi tonkaariki, tsireniityaanake. Pinkaatero pikenkithatzi, ryaataita atziri nampsiki rowapaiya.”<sup>16</sup> Rakanakeri, ikantziri: “¿Itaka ratsipetantyaawori ryaayetai? Pimperi eeroka rowanawo.”<sup>17</sup> Ikantanake riyotaanewo: “Tekaatsi nomperiri naaka. Apatziro otzimi 5 pan eejatzi apite shima.”<sup>18</sup> Ikantzi Jesú: “Pamakenari jaka.”<sup>19</sup> Ikantakeri maawoini atziri: “Pisaikaiyeni.” Saikaiyanakeni atziripaini. Raakero pan, eejatzi shima, aminanake jenoki inkiteki, ramananaka, ikantzi: “Niwethareemi Ashitanarí, eerokatake pakenawori jiroka nowanawo.” Itzipetowakero, ipayetakeri riyotaanewo, rowawisaakeniri atziripaini piyotainchari.<sup>20</sup> Maawoini rowaiyakan, kemakitaiyakani. Ipiyotairo tzimagaantapaintsiri, rotetylairo kantziriki, okaatzi 12 yekitatsiri.<sup>21</sup> Aamaaka ikaatzi 5000 shirampari owainchari. Eenitatsi tsinane eejatzi eentsipaini owainchari.

**Ranashaatantawo Jesús inkaare**  
(*Mr. 6.45-52; Jn. 6.15-21*)

<sup>22</sup> Ikantairi Jesú riyotaanewo: “Jame petaiyaawo intatsikero.” Ikantakeri eejatzi piyotainchari atziripaini: “Kantacha piyataiyaini.”<sup>23</sup> Irojatzi ikenantanakari irirori tonkaariki, ramanamanaatari Ashitariri. Okanta otsirenitanake, saikake apaniroini Jesú janta.<sup>24</sup> Weyaakotaiyaani riyotaanewo niyankaaneki, antawo otamakaare inkaare, oipiayapiyatakotakeri tampyaa.<sup>25</sup> Okanta okiteeshetzimatake, pokai Jesú ranashaatantaawo inkaare.<sup>v</sup><sup>26</sup> Te riyotawairi,

---

**v 14.25** Kantakotachari jaka: “Okanta okiteeshetzimatake”, irootake oshiyawori rametari rantayetapiintziro owayeripaini raamaawenta tsireniriki, eero ikakiwaitanta apaani owayeri maawoini tsireniriki, ontzimatye intzime 4 owayeri aamaawentachane. Apaani etanakyaawone owakera ontsirenitanake, itsipa arika oniyankiyyaanake tsireniri, itsipa arika oniyankitake tsireniri, weyaantapaakyaaawone iri kiteeshetakotatsine.

thaawaiyanakeni riyotaanewo, ikaimaiyanakeni: “¡Kaakitake shiretsiwé!”  
 27 Riñaanatapairi irirori, ikantziri: “Naaka pokaatsi, tontashire  
 pinkantya eero pithaawawaitzí.” 28 Ari ikantanake Pedro: “Eerokama  
 Nowinkatharité, pimatakainawo nanashaatantyaawo naaka inkaare.”  
 29 Ikantzi Jesús: “Pipokanakeeta.” Anashitanaka Pedro inkaareki  
 ryaatatashitanakeri ikatziyakaga. 30 Ari ikenkithashiretanaka Pedro  
 antawo otamakaare inkaare, thaawanake, irootake ritsitsiyantanakari,  
 ikaimanake: “Pinkatharí paawaina.” 31 Rakothatashitanakeri Jesús,  
 raawairi. Irojatzi ikantantanakariri: “Eepichokiini pikemisantakena.  
 ¿Oitaka pikisoshiretantari?” 32 Ikanta rotetapaa pitotsiki,  
 awisainkatatanake tampyaa. 33 Antawoite ipinkathatanakeri riyotaanewo,  
 ikantaiyanakerini: “Imaperotatyá eerokatake Itomi Pawa.”

**Retsiyatakotakaantake Jesús Genesaret-ki**  
 (Mr. 6.53-56)

34 Ikanta rareetaiyaani intatsikero nampitsiki Genesaret. 35 Iro  
 raatakotapaakitzíiini Jesús, riyotaitawakeri. Ikamantaitakeri  
 maawoini nampitawori janta, ramayetapaakeri mantsiyayetatsiri.  
 36 Ikantaitakeri Jesús: “Pishineteri mantsiyari riterotawakero piithaare,  
 retsiyatakontaiyaari.” Ari okantzimaitaka, ikaatzi terotzitakeriri  
 iithaare, etsiyatakoyetai.

**Owaariperoshireziriri atziri**  
 (Mr. 7.1-23)

**15** 1 Ikanta ripokaiyakeni Fariseo itsipatakari Yotzinkariite.  
 Ipoñaakawo nampitsiki Jerusalén. Ikantapaakeri Jesús:  
 2 “Judá-ite anaiyini. Iro ametaiyarini akiwaakota tekera oyaata, ari  
 okanta riyotaayetairi pairani acharineete. ¿Oitaka kaari rimatantawo  
 piyotaanewo? Rowapiintaiyani te ikiwi roko.” 3 Rakanake Jesús,  
 ikantzi: “Irojatzi poshiretawo eerokapaini riyotaayetairi pairani  
 acharineete, te pimatizimaitawo riyotaayetairi Pawa. 4 Jiroka ikantzi  
 Pawa:

Pimpinkathateri ashitzimiri.

Ikantake ejatzi:

Ontzimatiye romposaiteri kishimatziriri ipaapate.

5 Iro kantzimaitacha pikantashitapiintaiyani eeroka: ‘Kameethatatsi  
 ankanteri apaapate: “Nokashaakaakeri Pawa maawoini noorikite, eero  
 okanta noneshironkatemi eeroka.”’ 6 Piyotaantashitakawo rametaitari  
 pairani, te piyotaantziro inintaperotziri Pawa. Iro kaari retakotantaari  
 asheninkapaini ipaapate. 7 Owapeyimotantaneri pinaiyini. Eeroka  
 ikenkithatakotake pairani Isaías, ikantake:

8 Ipinkathawaantewaitashitakena atziripaini.

Temaita ikenkithashiretakotana kameetha.

<sup>9</sup> Aminaashita rotziwerowawaita ipinkathawetana,  
Riyotaantashiwaitawo rameyetari irirori.”

<sup>10</sup> Ikaimakeri Jesú斯 maawoini piyowentakariri, ikantziri:  
“Pinkemisantiyeni, pinkemathatantyaawori nonkenkithatakoteri:  
<sup>11</sup> Ikaatzi owari te rowaariperoshiretantzi, irooma okaatzi añaawaitziri,  
iroowa owaariperoshiretantatsiri.” <sup>12</sup> Iroatzi ripokashitantapaakariri  
riyotaanewo okaakiini, ikantapaakeri: “Te inimoteri Fariseo-paini  
ikemakemi pikantake.” <sup>13</sup> Ikantanake Jesú斯: “Ashitanari Inkitesatz, ari  
inthokairo okaatzi kaari ipankitzi irirori. <sup>14</sup> Piñaaminthatashityaari,  
te riyotaiyini irirori, roshiyakari amashookiri. Roshiyakotakari  
rakathatawakaa mawityaakiri, te riyotzi jimpe inkene, apitekeroini  
impare omooki.” <sup>15</sup> Ari ikantzi Pedro: “Pooñaawontenawo okaatzi  
poshiyakaawentakeniriri jirikapaini.” <sup>16</sup> Ikantzi Jesú斯: “¿Tekerama  
otzimimotzimiita eeroka piyorenka? <sup>17</sup> ¿Tema piyotzi okaatzi owapiintari  
okeni asheetoki, iroatzi omishitowantaiyaawori? <sup>18</sup> Irooma añaawaitero  
kaariperori akenkithashireyetari, iroowa owaariperoshiretantatsiri.  
<sup>19</sup> Tema ashireki akenkithashiretawo kaariperori, omposawakaantsi,  
mayempitaantsi, ñaathatakotaantsi, koshitaantsi, thaiyakotaantsi,  
kishimataantsi. <sup>20</sup> Irootake jiroka owaariperoshiretantatsiri. Irooma  
eerorika akiwaakota ankowerika oya, te owaariperoshiretantzi iroori.”

### Okemisantzi tsinane Canaán-sato

(Mr. 7.24-30)

<sup>21</sup> Ikanta ikenanake Jesú斯 nampitsiki jitachari Tiro iroatzi Sidón-ki.  
<sup>22</sup> Ari ipokashitakeri apaani tsinane Canaán-sato, kaari Judá-ite iroori.  
Okantapaakeri: “Nowinkatharité, eeroka icharine pinkathari David-ni.  
Nokowi pineshironkataina, osheki okemaatsitakawo nishinto raayiro peyari.”  
<sup>23</sup> Ari imairetake Jesú斯, te rakiro. Ikantaiyirini riyotaanewo: “Potyaantairo  
iyaataita, osheki oomerenchaaakai.” <sup>24</sup> Ikantanakero Jesú斯: “Apatziro  
rotyaantakena Ashitanari noneshironkayetairi noshenkaitae Israel-iite,  
oshiyakariri oweja ipeyawaitaka.” <sup>25</sup> Ari otziwerowashitanakari Jesú斯 jiroka  
tsinane, okantanakeri: “Pinkatharí, pineshironkataina naaka.” <sup>26</sup> Ikantanakero  
irirori: “Paata tsinane. Tema ikantaitake pairani: ‘Te aapithatziri rowanawo  
eentsite amperi otsitzi royaawo.’”<sup>w</sup> <sup>27</sup> Akanakeri iroori, okantziri: “Imapero  
pikantakeri Pinkatharí. Iro kantzimaitacha, rowapiintamatsitawo otsitzi  
rowaryagaitziro owanawontsi otapinaki.” <sup>28</sup> Rakanairo Jesú斯, ikantziro:  
“Tsinané, imapero pikemisantai eeroka. Irootake nimatantyaawori  
pikowakotakenari.” Apathakero awisakotanai ishinto.

w 15.26 Irira roshiyakaawentaitzi Judá-ite roshiyakari eentsi. Iriima kaari Judá-ite  
roshiyakari otsitzi.

### Retsiyatakotakaake Jesús osheki atziri

<sup>29</sup>Ikanta rowaaganaawo Jesús ikenanairo ocheraaki inkaare Galilea. Irojatzi ritonkaantanakari otzishiki, ari risaikapaake janta. <sup>30</sup>Ari ripokashitakeri osheki atziri, ramayetake kantawaiyetachari imantsiyare: ethoriwaitatsiri, amashookiri, kisowaanteri, pesaponchokiri, maawoini. Rithonkiri retsiyatakotakaayetziri. <sup>31</sup>Riyokitziwentaitanakeri Jesús iñagaitakeri riñaawaitakagairi kisowaanteri, ranashitakaayetaari kisopookiri, ethoriwaitatsiri eejatzi, raminakaayetairi mawityaakiri. Ikantaiyini atziripaini: “Imapero ikameethatake Pawa, iriitake pinkathariwentairiri isheninkapaini Israel.”

### Rowakaari Jesús 4000 shiramparipaini

(Mr. 8.1-10)

<sup>32</sup>Ikanta Jesús ipiyotakeri riyotaanewo, ikantakeri: “Osheki netakotakari atziripaini, tema mawa kiteesheri risaikaiyakeni ikemisantana, tekaatsi rowaiya. Arika ryaatashitaiya eero rowanaa, ari aakeri ritashe awotsiki.” <sup>33</sup>Ikantaiyini riyotaanewo: “Pamine, asaikatzi ochempiki. ¿Tsika ayeka owakayaariri? Osheki ikaataiyini.” <sup>34</sup>Ari rosampitziri Jesús riyotaanewo: “¿Tsika okaatzika pan tzimatsiri?” Ikantzi riyotaanewo: “Tzimatsi okaatzi 7, tzimitacha eejatzi shiwareki.” <sup>35</sup>Ari ikantaitanakeri ikaatzi piyotainchari: “Pisaikaiyeni.” <sup>36</sup>Raakero pan eejatzi shiwareki, riwetharyaaawentakawo. Irojatzi itzipetowantakawori pan, ipayetakeri riyotaanewo, rowawisaakeniri piyotainchari atziri. <sup>37</sup>Owaiyakaní maawoini, kemaneentaiyakaní. Ipiyotairo tzimagaantapaintsiri, yeekitai okaatzi 7 kantziri. <sup>38</sup>Amaaka ikaatzi 4000 shirampari owainchari. Tzimitacha tsinanepaini eejatzi eentsipaini owainchari. <sup>39</sup>Irojatzi ikantantanaari Jesús: “Ari owaiyakaní, kantacha piyaayetai.” Ari rotetanaawo Jesús pitotsiki, montyaanaka iipatsiteki Magdala-satzi.

### Ikowakoitziri Jesús ritasonkawentante

(Mr. 8.11-13; Lc. 12.54-56)

**16** <sup>1</sup>Ikanta ripokaiyakeni Fariseo itsipatakari Sadoc-iite, ikowawetaiyatyáani rikompitakayaarime Jesús inantyaari riyakowenterime. Ikantawetapaakari: “Janjaatya pitasonkawentante niyotantyaari imaperotatyáarika opoñaawo pitasorenka inkiteki.” <sup>2</sup>Rakanake Jesús ikantzi: “Arika onkityonkaitye tsireniiteeni, pikantaiyini eeroka: ‘Osaryaamanaatyé onkiteeshetamanai.’ <sup>3</sup>Irooma piñaamanairorika menkori onkityonkaitye inkiteki, pikantzi: ‘Omparyaatyé inkani.’ Piñaakero, piyotakowetawo inkite, piyotakotziro ompare inkani. Iro kantzimaitacha te piyotzimaitawo piñaayewetari jaka

kipatsiki. <sup>4</sup>Te pikameethashiretaiyini eeroka, thainka powakeri Pawa, iro pikowantaiyarini piñeena nitasonkawentante, eeromaita noñaayimiro. Apatziro piñeero awishimotakeriri pairani Jonás.” Ari ripiyanaawo Jesús.

**Kachotakairori iwaane Fariseo**  
(Mr. 8.14-21)

<sup>5</sup>Ikanta rareetayakani riyotaanewo Jesús intatsikero, te raanake iwaane, imaisantanakero. <sup>6</sup>Ikantzi Jesús: “Paamaiyaawo kachotakairori iwaane Fariseo ejatzi rashি Sadoc-iiite.” <sup>7</sup>Ari rosampitawakaanaka riyotaanewo, ikantawakagaiyani: “¿Oitaka ikantantairori jiroka? ¿Irooma ikantantairi te amanake awaane?” <sup>8</sup>Yotake Jesús ikantawakaari riyotaanewo, ikantziri: “Te pikemisantaiyini eeroka, iro pikenkithashirewaitantari, pikantaiyini: ‘Te amake awaane.’ <sup>9</sup>¿Tema piyotaiyironi? Chapinki otzimaweta pan okaatzi 5, iro kantzimaitacha nowakaaka 5000 shirampari. Powitairo tzimagaantapaintsiri. ¿Tsika okaatzika kantziri piyeekitairi? <sup>10</sup>Ari nokantzitakawo kaatatsiri 7 pan, nowakaakari 4000 shirampari. ¿Tsikama okaatzika kantziri piyeekitairi? <sup>11</sup>¿Oitaka kaari piyotakotantawo eeroka? Te iro niñaawente rowaitari pan. Nokantazzi: ‘Paamaiyaawo kachotakairori iwaane Fariseo ejatzi rashি Sadoc-iiite.’” <sup>12</sup>Ari riyotaiyanakeni riyotaanewo, te iro riñaawente Jesús kachotakairori pan, roshiyakaawentatziro okaatzi riyotaantayetziri Fariseo ejatzi Sadoc-iiite.

**Riyotake Pedro: Cristo rini jirika Jesús**  
(Mr. 8.27-30; Lc. 9.18-21)

<sup>13</sup>Ikanta ikenanake Jesús janta Cesarea-ki, inampsiteki Filipos. Ari rosampitakeri riyotaanewo, ikantziri: “¿Oitaka ikenkithashiretakoitariri Itomi Atziri?” <sup>14</sup>Rakaiyanakeni, ikantzi: “Eenitatsi atziri kantatsiri, ‘Juan omitsitsiyaatantaneri piriintaachari.’ Ikantzi itsipa, ‘Iri koñaataatsiri Elías.’ Ikantzi itsipa ‘Iri Jeremías-ni.’ Tzimatsi kantayetatsiri ejatzi, itsipa Kamantanerri rini.” <sup>15</sup>Ikantziri riyotaanewo: “Eeroka. ¿Tsika pikantaiyinika?” <sup>16</sup>Rakanake Simón Pedro, ikantzi: “Eerokatake Cristo, Itomi Pawa Kañaaneri.” <sup>17</sup>Ikantzi Jesús: “Imaperotaty okaatzi pikantakeri Simón itomi Jonás, kaari atziri yotakaakemirone jiroka, iri Ashitanari Inkitesatzi yotakaakemirori. <sup>18</sup>Noitaimi Pedro, mapi oshiyakaawentacha piwairo. Tema mapi poshiya, ari niwetsikairo nopanko. Inkaate kemisantaatsine paata, iri oshiyawone pankotsi. Eero rimatziro sarinkaweniweri impeyakaashitayaari. <sup>19</sup>Iri poshiyaiyaari aminirori ashitakowo pankotsi, kantacha rashitareero, kantzitacha ejatzi rashitero, rintsiritero shintsiini. Iro pankotsi oshiyakaawentacha tsika ipinkathariwentantai Inkitesatzi. Ikaatzi pishinetairi eeroka jaka, iri rishinetaitzi inkiteki. Iriima kaari pishinetai jaka, iri kaari rishineetzi

inkiteki.”<sup>20</sup> Ikantanakeri Jesús maawoini Riyotaanewo: “Paataga pikamantantzi, pinkante: ‘Iri Cristo jirika Jesús.’”

**Ikenkithatakotziro Jesús inkame  
(Mr. 8.31–9.1; Lc. 9.22–27)**

<sup>21</sup> Ikanta Jesús ikamantakeri Riyotaanewo, ikantziri: “Irootaintsi aate nampitsiki Jerusalén, antawoite inkemaatsitakaina Itzinkampaini, reewaperore Imperatasorentsitaarewo, reeware Yotzinkariite, ari ritsitokaantaitena. Iro awisawetakya mawa kiteesheri nañagai eejatzi.”

<sup>22</sup> Ikanta Pedro, raanakeri Jesús jantyaatsikaini, ikantakeri: “Pinkatharí, te inimotena naaka pikantziri, te nokowi awishimotemi jiroka.”<sup>23</sup> Ari ripithokanaka Jesús, rakanake: “Piyaate Satanás. Te poshiretawo eeroka ikowakaanari Pawa, apatziro poshiretawo ikowapiintakeri atziripaini.”

<sup>24</sup> Ikantanakeri Jesús maawoini Riyotaanewo: “Tzimatsirika kowatsiri intsipatena, ripakairo ikowashiyetari rantero, onkantawetya inkentakoiterime, intsipatena.<sup>25</sup> Tema ikaatzi etakowitzashitachari apaniroini rantayetziro iñaamatashiyetari, ari impeyashitaitya. Iriima kamawentenane rantayetenairo nokowakayiriri, ari rawisakoshireta.<sup>26</sup> Aminaashiwaita otzimimotziri maawoini rowaagawopaini tzimatsiria jakä kipatsiki, ari ompeyakaashitaiyaari rañaamento. ¿Kantachama ripinakowentaitya eero iñaantaitawo impeyashitaitya?<sup>27</sup> Ari ripiyai paata jirika Itomi Atziri ramairo rowaneenkawo Ashitariri, intsipataiyyaari maninkariite, iri pinatantapairone okaatzi rantaitakeri.<sup>28</sup> Imaperotatyá, eenitatsi pikaatzira jakä, tekera pikamiita ari piñaakeri Itomi Atziri jimpe ikanta ipinkathariwentantzi.”

**Rishipakiriimotziri Jesús Riyotaanewo  
(Mr. 9.2-13; Lc. 9.28-36)**

**17** <sup>1</sup> Okanta awisake 6 kiteesheri, eejatzi raanairi Jesús: Pedro, Jacobo, eejatzi Juan, irirentzi Jacobo. Ritonkaiyanakeni otzishiki.<sup>2</sup> Ari ipashinitzimotakeri Riyotaanewo, rishipakiryaanake ipooki, roshiyankari ooryaatsiri, matanaka iithaare kitamaaki okantanaka.<sup>3</sup> Iñaatziiri Moisés-ni, eejatzi Elías ikenkithawaitakairi Jesús.<sup>4</sup> Ikanta Pedro, ikaimakotanakeri Jesús, ikantzi: “Pinkatharí, imapero okameethatzi pamakenaga jakä. Kameetha niwetsikemi mawa pankoshetantsi: apaani pashitya eeroka, apaani rashitya Moisés, rashitya apaani Elías.”<sup>5</sup> Ikenkithawaiminthaitzi, ipamankapaakeri menkori, shipakirya okantapaaka. Ikematzti ñaawaitanaantsiri menkoriki, ikantaitzi: “Notomi rinatzi jirika netakokitakari, osheki nokimoshirewentakeri. Pinkemisantairi.”<sup>6</sup> Ikanta ikemaitakero jiroka ñaantsi, oiyotaiyanakanisaawiki, antawoite ithaaawaiyanakeni.<sup>7</sup> Iri kantzimaitacha Jesús ripokashitapairi Riyotaanewo, riterotapaakeri,

ikantziri: “Pinkatziye, eero pithaawaiyini.” <sup>8</sup> Raminawetaiyananai, tekaatsi iñaanai, apatziro ikatziyaka Jesús.

<sup>9</sup> Ikanta roirinkaiyaani otzishiki, ikowakotakeri eero ikamantantziro iñaakeri irojatzi paata arika rañagai. Tema jirika Itomi Atziri ari rañagai inkamawetakaarika. <sup>10</sup> Rosampitanakeri riyotaanewo, ikantziri: “¿Oitaka ikantakotziri Yotzinkariite ikantaiyini: ‘Arika ripokimatake Cristo, iri jewataatsine Elías ripoke?’” <sup>11</sup> Rakanake Jesús, ikantziri: “Imaperotatyá ikantziri, iri jewatapaintsine Elías ripokake, rowameethashiretantaapake. <sup>12</sup> Pinkeme nonkante naaka: Areewetaka Elías, iro kantzimaitacha te riyotawakeri atziri, osheki rowasankewaitakeri. Ari inkantaiteri eejatzi Itomi Atziri, osheki rowasankeeteri.” <sup>13</sup> Ari riyotaiyanakeni riyotaanewo iri ikenkithatakotzi Juan omitsitsiyaatantaneri.

### Rowawisaakotziri Jesús ewankari raayiri peyari

(Mr. 9.14-29; Lc. 9.37-43)

<sup>14</sup> Ikanta rareetaiyaani ipiyotaiyanira atziri. Ari ripokashitakeri Jesús apaani atziri. Rotziwerowashitapaakari, ikantziri: <sup>15</sup> “Pinkatharí, pineshironkatainari notomi osheki ikamanawaitake, antawoite ikemaatsiwaitaka, osheki ritaawaitapiintaka, ripiinkawaitzi ñaaki.

<sup>16</sup> Namawetakanari piyotaanewo, rowawisaakotainari. Iro kantzimaitacha te rimatziri.” <sup>17</sup> Ari rakanake Jesús, ikantanake: “Te pikemisantaiyini eeroka, pikenashiwaitaka. ¿Tsikapaitema piyotaiyeni? Pamakenari eentsi.” <sup>18</sup> Ikitashtatanakeri peyari, jatanake. Ari retsiyatatakotairi ewankari. <sup>19</sup> Ikanta riyotaanewo Jesús, rosampitairi apaniroini, ikantairi: “¿Itaka kaari nimatantari naaka netsiyatakotakairi?” <sup>20</sup> Ikantzi Jesús: “Iro kaari pimatantari te pikemisantaperotzi. Pinkeme nonkante: Onkantawetya pinkemisantaironkate, kantacha pinkantero otzishi: ‘Pishirinke.’ Ari ishirinkake. Tema tekaatsi kompitzimotemine arika pinkemisantaperote. Imaperotatyá. <sup>21</sup> Iro kantacha pinkowerika petsiyatakotakagairi oshiyakariri jirika ewankari, ontzimatye pamanaperotaari Pawa, pitziwentyaari.”

### Rapiitairo Jesús ikenkithatakotziro inkame

(Mr. 9.30-32; Lc. 9.43-45)

<sup>22</sup> Ikanta risaikaiyini Jesús nampitsiki Galilea, ari ikantakeri riyotaanewo: “Irootaintsi ripithokashitaityaari Itomi Atziri. <sup>23</sup> Ari ritsitokaiteri. Iro awisawetaka mawa kiteesheri, ari rañagai eejatzi.” Antawoite rowashiretaiyanakanai riyotaanewo ikemakerira ikantake.

### Ripinaitzirori tasorentsipanko

<sup>24</sup> Ikanta rareetaiyaani Jesús nampitsiki Capernaum, ari ripokakeri apatotakaantziriri koriki ashi tasorentsipanko, rosampitapaakeri

Pedro: “¿Ripinatapiintziro yotaimiri tasorentisipango?”<sup>25</sup> Ikantanake Pedro: “Ripinatapiintziro.” Ikanta ripiyapaawo pankotsiki, iri thaawakotawaincha Jesús rosampitawairi: “¿Itaka pikenkithashiretari eeroka Simón? ¿Itaka inintakaantapiintziri itsipasatz pinkatharipaini? ¿Iriima inintakaayetzi isheninkaperotari? ¿Iriima inintakaayetzi areetzinkari kaari isheninkaita?”<sup>26</sup> Ari rakanake Pedro, ikantzi: “Iri inintakitziri areetzinkaripaini.” Ikantzi Jesús: “Ari okanta. Tema te okowa ripinayetairo ikaatzi isheninkayetari.<sup>27</sup> Iro kantzimaitacha te nokowi inkisaneentawaitya apatoyetziriri koriki. Piyaate pakachaate inkaareki. Arika pinoshikake apaani, paminawaanteteri, ari piñeeri koriki. Paanakeniri apatotziriri, pimperi. Iri pipinawentyaari eeroka ejatzi naaka.”

### Tsika itzimi iriiperotatsiri

(Mr. 9.33-37; Lc. 9.46-48)

**18** <sup>1</sup>Ikanta ipiyotaiyakani riyotaanewo Jesús, rosampitakeri, ikantziri: “Arika impinkathariwentantai Inkitesatzi. ¿Tsika itzimika iriiperotatsine intsipatyaaari impinkatharite?”<sup>2</sup> Ikanta Jesús ikaimake apaani eentsi, ikatziyakeri niyankineki risaikaiyakenira irirori,<sup>3</sup> ikantzi: “Eerorka pawentanaari Pawa, eerorka poshiyakotanaari jirika eentsi, eerowa piñagairo ipinkathariwentantai Inkitesatzi. Imaperotaty. <sup>4</sup>Tema jirika eentsi te riyotziro ishamewaite. Maawoini inkaate oshiyakotaiyaarine eentsi, iriitake iriiperotaatsine ipinkathariwentantaira Inkitesatzi.<sup>5</sup> Ikaatzi aakotanari nowairo ikemisantaana, raakameethatanairi oshiyakariri jirika eentsi, naakatake raakameethatake.”

### Arika rantakaantaitero kaariperori

(Mr. 9.42-48; Lc. 17.1-2)

<sup>6</sup> “Tzimatsirika antakaakerine kaariperori oshiyakotariri jirika eentsi rawentaana, onkaminta inthataitenirime mapi ikentsiki, rowiinkaiteri inthomoyaaki inkaare.

<sup>7</sup> Imapero onkoweenkate jaka kipatsiki. Iñagaite osheki antayeterone kaariperori. Iro kantacha ari rowsankeyetaitakeri antakaantakerone.

<sup>8</sup> Iroorika pako, iroorika piitzi pantantari kaariperori, pipakagairo, poshiyakagairo pithatzinkatyeerome, ompoñaantaiyaari. Tema te okameethatzi otzimawetaga apite pako, apite piitzi, iro ompoñaantaiyaari paata piñagairo pashi powaatyeero pitagaiya.<sup>9</sup> Iroorika poki pantantari kaariperori, pipakagairo, poshiyakagairo pisoryaakitatyeeme, ompoñaantyaari pawisakopityaakitai. Tema te okameethatzi otzimawetaga apite poki, iro ompoñaantaiyaari paata rookaitaimi opaampatzira sarinkaweni.”

**Ikenkithatakotitziri oweja peyachari  
(Lc. 15.3-7)**

**10** “Paamaawentya pimanintawitzirika oshiyakotanaariri jirika eentsi. Tema ikempoyaawentakeri maninkariite nampiyetawori Ashitanariki Inkitesatzi. **11** Tema iro ripokantakari Itomi Atziri rowawisaakoshireyetairi ikaatzi peyawetainchari.

**12** Pinkeme noshiyakaawentemiro. Tzimatsi atziri piratariri ikaatzi 100 oweja. Ikanta ipeyagaantaka apaani, ikaatanai 99 oweja. Rookanakeri itsipa, jatake otenkanaamashiki otzishi rithotyaakotairi peyainchari. **13** Ikanta iñagairi antawo ikimoshiretanai ragairira peyawetainchari. Antwoite ikimoshiretanai, anaanakero ikimoshirewentziri kaari peyachari kaatatsiri 99. **14** Ari ikantari eejatzi Ashitairi Inkitesatzi, te ikowi impeyagaantawaitya apaani ikaatzi oshiyanaariri jirika eentsi.”

**Tsika okanta ipeyakotantaitzi**

**15** “Arika piñeeri pisheninka rantakero kaariperori, piyatashiteri, pinkenkithawaitakairi apaniroini, poñaayeri okaatzi ikenakaashitakari. Arika inkemisantanakemi, pimatakeri poshiyakagairi iriirkame parentzipero. **16** Eerorika ikemisantzimi, paanake itsipa kemisantzinkari, eerorika apite kemisantzinkari, iri pintsipatanakaari pinkaminairi. Irootake pimonkaatanyaawori Inintakaantitziri pairani, ikantaitzi:

Inkaaterika apaani ñaakotakemirone pantakero kaariperori, tera okameethatzi rowasanketaitemi. Irooma inkaaterika apite, eerorika inkaate mawa ñaakotakemirone pantakero kaariperori, iroowa ompoñaantyaari rowasanketaitemi.

**17** Eerorika ikemisantzi jirika, pinthawetakoteri rapatotapiintaitaga. Eerorika ikemisantashita, eerowa pishinetairi intsipataimi papatotapiintaga, poshiyakagairi kaari pisheninkata, tema roshiyakotakari apatotziriri koriki. **18** Tema ikaatzi pishineyetairi eeroka jaka, irijatzi rishinetaitzi inkiteki. Iriima ikaatzi kaari pishineyetai eeroka jaka, irijatzi kaari rishinetaitzi inkiteki. Imaperotaty.

**19** Pinkeme nonkante eejatzi: Arika pinkaate apite, arika oshiyawakaiya pikenkithashiretanewo, iroowa ompoñaantyaari pithotyaakotairi Ashitairi Inkitesatzi, ari rimatakemiro. **20** Tsikarika ipiyota apite, terika mawa atziri, raakotana nowairo ikemisantaana, ari nisaikitari naaka notsipatari.”

**21** Ari ripokapaake Pedro, rosampitapaakeri Jesúis, ikantziri: “Pinkatharí, arika ontzime rantzimotenari nosheninka, ¿onkaateka rapiitero nompeyakoteri? ¿onkaatema 7?” **22** Rakanakeri Jesúis,

ikantanakeri: “Te okameethatzi pipiyatantya. Te apatziro pimpeyakoteri onkaate 7, osheki onkaate papiipiinteri.”<sup>x</sup>

### Ikenkithatakota apite ireewetatsiri

<sup>23</sup>“Jiroka ikanta ipinkathariwentantai Inkitesatzi, roshiyakotari rantziri pinkathari ikowakotziri rimperatanewo ripinatairri rireewetzirira. <sup>24</sup>Ikanta ikowakoyetziri ireewetziriri, ari ripokapaake apaani ireewetatsiri osheki koriki.<sup>y</sup> <sup>25</sup>Tekaatsi raye ripinakowentaiyaari. Ikantzi pinkathari: ‘Paanakeri jirika atziri, iina, itomipaini, eejatzi okaatzi tzimimotziriri, pimpimanteri. Naantaiyaariri koriki rireewetanari.’ <sup>26</sup>Ikanta ikemawake rimperatanewo, rotziwerowashitanakari pinkathari, ikantanakeri: ‘Eero pipimantana, poyaawentawakya eepichokiini, aritake nipayataimi.’ <sup>27</sup>Ikanta jirika pinkathari ineshironkatanakeri rimperatanewo, ikantzi: ‘Ariwé, te pireewetaana.’ Ipeyakotairi okaatzi rireewetziriri. <sup>28</sup>Ikanta ryaatai rimperatanewo, ritonkyotaka irirori ireewetziriri eepichokiini. Rotaiyakentsitawakeri, ikantziri: ‘Pipinatena iroñaaka pireewetanari.’<sup>z</sup> <sup>29</sup>Ari rotziwerowashitanakari, ikantziri: ‘Poyaawentawakya eepichokiini aritake nipayataimi.’ <sup>30</sup>Te ikowi royaawentya, raanakeri, romonkyaaakaantakeri, ikantziri: ‘Arika pipinataina pireewetanaga, ari nomishitowakaantaimi.’ <sup>31</sup>Iñaakeri ikaataiyini te inimotanakeri, jatake ikamantakeri pinkathari. <sup>32</sup>Ikanta pinkathari ikaimakaantakeri, ikantziri: ‘Kaariperoshireri pini eeroka. Nopeyakotaimi eeroka pireewetanari pikantakenaga poyaawentawakya. <sup>33</sup>Ari pinkantanteme eeroka, pineshironkatanteme.’ <sup>34</sup>Antawo ikisanaka pinkathari, romonkyaaakaantakeri, ikantziri: ‘Arika pipinataina eeroka, ari nomishitowakaantaimi.’ <sup>35</sup>Arira inkantaiya paata Ashitanari Inkitesatzi, eerrika pineshironkayetairi pisheninka.”

### Riyotaantzi Jesús ikantzi: te okameethatzi pookero piina (Mr. 10.1-12; Lc. 16.18)

**19** <sup>1</sup>Ikanta rithonkanakero Jesús riyotaantzi Galilea-ki, jatake intatsikero Jordán-ki irojatzi rareetantakari Judea-ki. <sup>2</sup>Ipiyowentaitawaari. Retsiyatakotakaapai osheki mantsiyari. <sup>3</sup>Ari ripokashitakeri Fariseo-paini, ikowi rikompitakayaarime Jesús, rosampitapaakeri ikantziri: “¿Shinetaantsitsima inkowe atziri rookashiwaityaawo iina?” <sup>4</sup>Rakanakeri irirori, ikantanakeri:

---

<sup>x</sup> 18.22 Ikantakoitziri jaka “osheki onkaate papiipiinteri”, arika apiipiintakero ampeyakotante onkaate 7, 7 apiipiintero 70. <sup>y</sup> 18.24 Kantakotachari jaka “ireewetatsiri osheki koriki” iriitake iitaitziri 10 mil talento. Onkantawetya rantawaite osheki osarentsi, eero ripinakowentaawo. <sup>z</sup> 18.28 Kantakotachari jaka “ireewetziriri eepichokiini” irijatzi ikantaitziri ikaatzi 100 denario.

“¿Tema piñaanatakotziri owakera riwetsikantitakariri atziri. Tema riwetsikaitake shirampari eejatzi tsinane? <sup>5</sup>Ikantaitake pairani:

Rontsiparyaaari ipaapate mainari raakerika iina,  
Apaani ikantanaawo iwathaki raawakaana.

<sup>6</sup>Iro eero okantanta rookawakaiya atziri itsipatakaakariri Pawa, tema apaani ikantanaawo, eero okanta rookawakagaiya.” <sup>7</sup>Rapiitanakeri Fariseo rosampitziri, ikantziri: “<sup>8</sup>Oitaka rosankenatantari pairani Moisés, ikantake:

Arika rookawakagaitya, ontzimatye impaiteri osankenarentsi rookawakaantyaari?”

<sup>8</sup>Ikantzzi Jesús: “Okantakaantziro pipiyathataga, iro rishinetantakemirori Moisés. Iro kantzimaitacha te ari onkantya pairani owakera etantanakari maawoini. <sup>9</sup>Pinkeme nonkante naaka: Ikaatzi jokashiwaitawori iina ragairika otsipa, mayempitakeria. Iroomba omayempitakerika tsinane, kantacha rookaitero. Tzimatsirika agairone tsinane jokaarewo, mayempitake irirori.”

<sup>10</sup>Ikantaiyanakeni riyotaanewo: “Arika okanta, eerotya ragaitzi iinantaitari.” <sup>11</sup>Ari rakanakeri Jesús, ikantziri: “Iriirika Pawa kowakayemirone, aritake pinkemathatakerio. <sup>12</sup>Tzimatsi kantakaantzirori eero raanta iina atziri. Tema tzimatsi atziri amashithakitchari ishiramparitantari owakera itzimapaaake, eero okanta raye iina. Eenitatsi itsipa inowikyaanikiitziri eero okanta raye iina. Tzimatsi eejatzi kowatsiri risaikashiwaitya, tema ikantakotatziiri pinkathariwentantatsiri inkiteki. Kowatsiri rimatero nokantakeri, rimatero.”

### Ritasonkawentziri Jesús eentsipaini (Mr. 10.13-16; Lc. 18.15-17)

<sup>13</sup>Ikanta ramaitapaakeniri Jesús eentsipaini, ikantaitapaakeri: “Nokowi pamanakotenari neentsite, potzimikapatziitoteri pitasonkawenteri.”

Ikantzzi riyotaanewo Jesús: “Eero poñaashirenkiri Awinkatharite.”

<sup>14</sup>Ikantanake Jesús: “Eero pikoshekari, nokowi ramaitenari eentsipaini. Tema ikaatzi oshiyakotanaariri jirikapaini eentsi, iri ñagairone jimpe ipinkathariwentantai Inkitesatzi.” <sup>15</sup>Ikanta Jesús rotzimikapatziitoyetakeri eentsipaini, jatanai irirori.

### Ashaagantachari mainari (Mr. 10.17-31; Lc. 18.15-17)

<sup>16</sup>Ikanta apaani mainari ripokashitakeri Jesús, rosampitapaakeri, ikantziri: “Kameethari yotaantaneí. ¿Oitaka nantairi noñaantaiyaawori kantaitaacchane añaamentotsi?” <sup>17</sup>Rakanakeri Jesús, ikantziri: “¿Oitaka pikantantanari ‘kameethari’? Tekaatsi apaani kameethatatsine, apatziro ikantakaawo Pawa ikameethatzi. Pinkowerika piñagairo añaamentotsi,

pantairo Inintakaantaitanewo.” <sup>18</sup> Ikantzi irirori: “¿Otzimika?” Ikantzi Jesús:

Eero pitsitokantzi.  
Eero pimayempitzi.  
Eero pikoshitzi.  
Eero pithaiyakotanta.

<sup>19</sup> Pimpinkathateri ashitzimiri.

Petakotaiyaari pisheninka poshiyakagairo petakota eeroka.

<sup>20</sup> Rakanake mainari: “Nimataker o maawoini jirokapaini, irojatzi netanakawo pairani eeniro neentsitzi. ¿Oitaka kowachari iroñaaka?”

<sup>21</sup> Ikantanakeri Jesús: “Pikowirika pinkameethashirete, piyaate pipankoki, pimpimantero maawoini tzimimotzimiri, pimpayeteri ashironkainkari, tema inkiteki piñagairo pinintagaiya. Arika pimatakero, pipoke poyaatena.” <sup>22</sup> Ikanta ikemawake mainari, owashire ikanta ripianaka, tema ashaagantzinkari rini.

<sup>23</sup> Ikantanakeri Jesús riyotaanewo: “Antawoite ompomeentsitzimotaari ashaagantzinkari impinkathariwentairi Inkitesatzi. Imaperotaty.”

<sup>24</sup> Eekero ikantatzi: “Tema te okanta inkye piratsi camello imooki akoshi. Iriira maperotacha ikompitzimotaari inkye ashaagantachari tsika ipinkathariwentantai Pawa.” <sup>25</sup> Ikanta ikemaiyakeni

riyotaanewo, riyokitiitayanakeni, ikantawakaiyani: “¿Itakama awisakoshiretaatsine?” <sup>26</sup> Ari raminanakeri Jesús, ikantziri: “Eero rimatziro apaniroini atziri, iriima Pawa tekaatsi kompitzimotaarine.”

<sup>27</sup> Rakanake Pedro, ikantanake: “Jirikapaini nokaataiyakeni nokowi noyaatemi, nookanawentanakawo maawoini tzimimotanari. ¿Oitaka ripinaitainari paata?” <sup>28</sup> Rakanake Jesús, ikantzi: “Arika owakeratai paata kipatsi, ari impinkathariwentantairi Itomi Atziri, roshiyakotyari ikanta apaani pinkathari risaikantawo owaneenkatachari risaikamento. Ari pinkantaiyaari ejatzi eerokapaini pimpinkathariwentairi maawoini charineyetyaarne Israel-ni, ikaatzi 12 rinashiyeta. Imaperotaty. <sup>29</sup> Tema ikaatzi oyaatakenari, rookanawentanakawo ipanko, irirentzi, iritsiro, ipaapate, iina, reentsite, iipatsite. Aritake iñaayetairo ontzimimotairi osheki, tema iriitake aakoyetaanari nowairo rawentagaana. Irrijatzi ñaayetairone kantaitaachane añaamentotsi. <sup>30</sup> Tema tzimayetatsi etawori iroñaaka, iri ñagairone rimpoiyetai. Tzimayetatsi impoiyetatsiri iroñaaka, iri ñagairone retaiyaawo.”

### Antawaitatsiri chochokimashiki

**20** <sup>1</sup>“Jiroka ikanta ipinkathariwentantai Inkitesatzi, roshiyakowitzakari ikanta apaani atziri tzimatsiri ichochokimashite. Riyaatake okiteeshetamanai ramine antawaitatsine iwankiremashiki. <sup>2</sup> Ikanta iñaake kowatsiri rantawaite, ikantakeri: ‘Arika

petanakyaawo pantawaite iroñaaka irojatzi ishaawiiteeni, nipinatem i apapentyaki koriki.<sup>a</sup> Ikantaiyini antawairentzi: ‘Kameethatake.’ Rotyaantaitakeri pankirentsimashiki.<sup>a</sup> <sup>3</sup>Ikanta reenokiityaapaake ooryaa eejatzi ripiyanaawo ashitawori iwankiremashi nampitsiki. Iñaapai itsipa ikatziyaiyani tekaatsi rantawaire.<sup>b</sup> <sup>4</sup>Ikantapaakeri: ‘Arika piyaate pantawaite nowankiremashiki, ari nipinaperotakemi.’ Riyaataiyakeni rantawaite. <sup>5</sup>Ari ikantakero itampatzikatapaake ooryaa, eejatzi ritainkanakera ooryaa.<sup>c</sup> <sup>6</sup>Ari ikantakero eejatzi otsireniityaanake, iñaapai atziri risaikaiyini, tekaatsi rantawaire, rosampitapaakeri: ‘{Tekaatsima pantawaire pisalkashiwaitantari kiteesheriki?’<sup>d</sup> <sup>7</sup>Rakaiyanakeni, ikantzi: ‘Tekaatsi antawaitakainane.’ Ikantzi irirori: ‘Piyaate eejatzi eeroka pantawaite nowankiremashiki, ari nipinaperotakemi.’ <sup>8</sup>Okanta otsirenitanaake, ashitawori iwankiremashi, ikantakeri oisaikiniriri iyorikite: ‘Pinkaimeri maawoini antawairentzi pipinateri. Iri petawanya pipinateri impoitaintsiri rantawaitake irojatzi pimatantakyaariri ananinkaintsiri rantawaitake.’ <sup>9</sup>Ikanta ripokake impoitaintsiri rantawaitzi, eepichoki rantawaitake, iro kantacha ripinaitakeri apapentyaki koriki. <sup>10</sup>Irojatzi ripokayantakan ananinkaintsiri rantawaitake, roshiyakaatzi iri ripinaperoteri. Te, apapentyaki koriki ripinaitakeri eejatzi. <sup>11</sup>Ikanta raawetawakari ripinaitakeriri, ikisanakeri ashitawori rantawaire, <sup>12</sup>ikantanakeri: ‘Jirikapaini impoitapaintsiri rantawaitzi, te rantawaiperotzi, iro kantacha rimonkaatakena pipinatakenari, naaka atsipetaperotakariri ooryaa.’ <sup>13</sup>Ikantzi ashitawori iwankiremashi: ‘Asheninká, nipinatakemi kameethaini, ¿tema nokantzitakemi amatyaaake nipinatem apapentyaki koriki?’ <sup>14</sup>Jirika piyorikite nipinatzimiri, piyaatai pipankoki. Naaka kowashitaincha nipinatziri apapentyaki koriki impoitapaintsiri rantawaitzi, <sup>15</sup>¿Eeroma okanta nipinatante nonintziri naaka? ¿Pisamaneentakotashitanawo noneshironkatantzi?’ <sup>16</sup>Tema eenitatsi etawori iroñaaka, iri ñagairone rimpoyetai. Tzimatsi impoiyetatsi iroñaaka, iri ñagairone retaiyaawo.”

**Rapiitairo Jesús ikenkithatakotziro rowamagaiteri**  
*(Mr. 10.32-34; Lc. 18.31-34)*

<sup>17</sup>Ikanta ritonkaanake Jesús ryaatero Jerusalén-ki, raanakeri 12 riyotaanewo ikenakaanairi awotsiki, ari ikantakeri: <sup>18</sup>“Aatatziira Jerusalén-ki. Ari raakaantaiteri Itomi Atziri, rayeri reeware

**a 20.2,9,10,13,14** Ikantakoitziri jaka “apapentyaki koriki” irijatzi iitatziri apaani denario.

**b 20.3** Kantakotachari jaka “reenokiityaapaake ooryaa” irijatzi ikantatziri pairani ooryaa

**3. c 20.5** Kantakotachari jaka “itampatzikatapaake ooryaa, eejatzi ritainkanakera ooryaa” irijatzi ikantatziri pairani ooryaa 6, ooryaa 9. **d 20.6** Kantakotachari jaka

“otsireniityaanake” irojatzi ikantatziri pairani ooryaa 11.

Imperatasorentsitaarewo, intsipatakyaaari Yotzinkariite, iri yakowenterine ritsitokaiteri. <sup>19</sup>Iro raantanakyaariri atziri kaari asheninkata. Ari ripasawaitaiteri. Irojatzi inkentakotaitantakaari. Iro awisawetakya mawa kiteesheri, ari rañagai eejatzi.”

**Ikowiri Jacobo eejatzi Juan**  
(*Mr. 10.35-45*)

<sup>20</sup>Okanta iina Zebedeo ipokashitakeri Jesú, otsipatakari otomipaini: Jacobo eejatzi Juan. Otziwerowashitapaakari, okantapaakeri: “Nokowi pineshironkatena.” <sup>21</sup>Rosampitanakero Jesú, ikantziro: “¿Oitaka pikowakotanari?” Okantanake iroori: “Tema irootaintsi pimpinkatharentsite, nokowi intsipatemi notomi impinkathariwentante, risaikimotemi apaani pakoperoki, itsipa risaike pampateki.” <sup>22</sup>Rakanakero Jesú ikantanakero: “Te piyotziro oita pikowakotanari. Osheki nonkemaatsityaari naaka. ¿Arima pinkisashitakyaawo eeroka pinkemaatsitya osheki? ¿Arima poshiyakena nonkame naaka?” Ikantaiyanakeni: “Aritake nimatakero.”<sup>e</sup> <sup>23</sup>Irojatzi ikantanakari Jesú: “Imapero, irootaintsi awishimotemi onkaate nonkemaatsityaari naaka. Irooma pintsipatenarika ampinkathariwentante pisaike nakoperoki, itsipa nampateki, tera naaka nintakayaawone iita nontsipatyari, apatziro riyotzi Ashitanari jimpe iita ikashaakaakeri.”<sup>f</sup> <sup>24</sup>Ikanta ikemaiyakeni itsipa ryotaanewo, ikisaitanakeri Juan eejatzi Jacobo. <sup>25</sup>Irojatzi ipiyotantakari Jesú maawoini ryotaanewo, ikantziri: “Piyotaiyini eeroka jimpe ikanta ipinkatharitzi kaari asheninkata, osheki rimperatanta. Ari roshiyari eejatzi iriiperoyetsiri ipinkathaitziri irorori. <sup>26</sup>Irooma eerokapaini, arika pinkowe piriiperote, iri poshiyakotya ikanta onampitaarewo. <sup>27</sup>Iroorika pinkowe peewatakaante, iriira poshiyakotyaari ikanta noshikaarewo. <sup>28</sup>Te iro ripokantyaari Itomi Atziri rimperatantya iro ripokantari roshiyakotyaari onampitaarewo, inkamawentante, iriira pinakowentairine maawoini.”

**Raminakagaitairi apite mawityaakiri**  
(*Mr. 10.46-52; Lc. 18.35-43*)

<sup>29</sup>Ikanta rawisaiyanakeni Jericó-ki, osheki atziri oyaatanakeriri. <sup>30</sup>Ari risaikake awotsinampiki apite mawityaakiri. Kemake irirori, ikantaitzi: “Ari inkenapaake Jesú jaka awotsiki.” Irootake ikaimantanakari, ikantzi: “¡Pinkatharí, icharinetari David-ni, pineshironkataina naaka!”

---

<sup>e</sup> **20.22** Jiroka jaka ikantajaantziri Jesú: “¿Arima pimatakero eeroka pirero kepishaari onkaate nireri naaka? ¿Arima poshiyakena niipiinkaate naaka?” <sup>f</sup> **20.23** Jiroka jaka ikantajaantziri Jesú: “Imapero, aritake pimatakero pirero nireri naaka, aritake pimatakero eejatzi inkitaiten oshiyakawori romitsisayitakenaga.”

<sup>31</sup> Osheki ikisathawetaitanakari. Te imairetzi, eekero ikaimanakitzi shintsiini: “¡Pinkathari, icharinetari David-ni, pineshironkataina naaka!” <sup>32</sup> Katziyapaaka Jesús, ikaimakeri, ikantziri: “¿Iita pikowiri nantzimotemiri?” <sup>33</sup> Ikantaiyini irirori: “Pinkatharí, nokowi naaka naminawaitai kameethaini.” <sup>34</sup> Antawoite ineshironkashiretanakeri Jesús jirika mawityaakitsiri, riterotzitakeri roki. Aminanai kameetha, royaatanakeri Jesús.

### Areetaa Jesús Jerusalén-ki

(Mr. 11.1-11; Lc. 19.28-40; Jn. 12.12-19)

**21** <sup>1</sup>Jekaatzimatapaake rareetantyaari Jerusalén-ki. Riweyaiyakani Betfagé-ki nampitsi imontetari otzishi Olivo. Ari rotyaantake Jesús apite riyotaanewo, <sup>2</sup>ikantakeri: “Piyaate nampitsiki amontetakari, ari piñaapaake inthatakotya burro ontsipataykaari iryaani. Pinthataryakotero, pamakenawo. <sup>3</sup>Tzimatsirika osampitawakemine, pinkanteri eeroka: ‘Ikowatziro pinkathari. Aritake roipiyyaimiri.’” <sup>4</sup>Ari imonkaatari rosankenatakeri pairani Kamantantaneri, ikantake:

<sup>5</sup> Pinkamantayetairi maawoini Jerusalén-satzi:  
Kaakitataike Piwinkatharite ripokashitakemi  
Tsinampashire ikantaka, ikyakaakawo apaani burro  
Ewonkeri ini burro, owaiyanewo piratsi ikyakaitziri tenari.  
<sup>6</sup>Ikanta rotyaantakeri apite riyotaanewo, rimatakeri okaatzi ikantawakeriri Jesús. <sup>7</sup>Ramakero burro otsipataykaari iryaani. Rowanketaitakeniri manthakintsi imitzikaaki inkene inkyaa kagaityaari. Ikanta Jesús ikyakaanakari. <sup>8</sup>Ikanta atziripaini piyotainchari janta, romaankashitanakeri imanthaki awotsiki tsika inkenanake. Eenitatsi itsipa chekayetaintsiri inchashi romaankashiteriri eejatzi. <sup>9</sup>Ikaatzi atziri jewayetaintsiri, ikaatzi oyaatakeriri itaapiiki, ikaimaiyini, ikantzi:

¡Thame ampinkathatairai icharinetari David-ni!  
¡Tasonkawentaarewo rini, tema Pinkathari aitziri otyaantakeriri!  
¡Kaikitataike Awinkatharitepero!

<sup>10</sup> Irojatzi rareetantapaakari Jesús nampitsiki Jerusalén. Ari rosampitawakaanaka nampitawori, ikantaiyini: “¿Iitaka jirika?”

<sup>11</sup> Eenitatsi atziri kantanaintsiri: “Iriitake Jesús kamantantaneri, iriira poñaachari Nazaret-ki saikatsiri Galilea-ki.”

### Romishitowiri Jesús yompariyetachari tasorentsipankoki

(Mr. 11.15-19; Lc. 19.45-48; Jn. 2.13-22)

<sup>12</sup> Ikanta Jesús, kyaapaake isaikira tasorentsipanko. Rookapaakeri pimantayetatsiri eejatzi ikaatzi yompariyetachari. Rotatsinkayetapaakero rowantitariri koriki, eejatzi ikantakeri jimpe rowaitziri shiro.

<sup>13</sup> Ikantapaake: “Okantzi osankenarentsi, riñaaawaitziri Pawa, ikantzi:

Nopanko ini jiroka, ari ramanapiintaitenari.  
Iro kantacha eeroka pamatawitantake jaka pipimantayetzi,  
poshiyakaakero koshintzipango.”

<sup>14</sup>Ikanta Jesú, ripokashitapaakeri tasorentsipankoki osheki mawityaakiri, kisopookiri, retsiyatatakagairi maawoini. <sup>15</sup>Tema osheki okameethatake rantakeri Jesú. Ikanta iñaakeri ewankaripaini rantakeri, ikaimaiyanakeni, ikantzi:

¡Thame ampinkathatairai icharinetari David-ni!

Iri kantzimaitacha reewarepaini Imperatasorentsitaarewo, itsipatakari Yotzinkariite, kisaiyanakaní, tema te inimotziri. <sup>16</sup>Ari rosampitanakeri Jesú, ikantitziri: “¿Pikemakeri ikantaiyirini ewankaripaini?” Ari rakanake Jesú, ikantzi: “Nokemakeri. ¿Tema piñaanatero eeroka osankenarentsi kantatsiri pairani?

Iri ewankaripaini eejatzi eentsipaini thoyetzirori iteni,

Pikantakaakari impinkathayetaimi.”

<sup>17</sup>Ikanta Jesú, piyanaka ikenanairo Betania-ki. Ari rimaapai.

### Riyakatziro kaari kithokitatsi pankirentsi

(Mr. 11.12-14, 20-26)

<sup>18</sup>Okanta okiteeshetamanai eejatzi ripiyaawo Jesú nampitsiki. Ari ritasheyapaake niyankineki awotsi. <sup>19</sup>Iñaapaake awotsinampiki okatziya pankirentsi, ryaatashitanakero, iñaapaakitziiro te otzimi okithoki, iyoshiita oshi. Ikantanakero: “Pashi powaatyeero eero pikithokitai.” Okanta pankirentsi, kamashitanake.<sup>g</sup> <sup>20</sup>Ikanta iñaakero ryotaanewopaini, ryokitziiwentanakero, rosampitaiyakerini: “¿Itaka okamashitantanakari pankirentsi?” <sup>21</sup>Ari rakanake Jesú, ikantziri: “Imapero nonkantemi, imaperotatyaarika pawentaana, eerorika pikisoshirewaitzi, ari pimatakero eeroka, anaanakero jimpe okanta piñaakero pankirentsi. Kantacha pinkante: ‘Ishirinke otzishi, ipiinke inkaareki.’ Kantacha imatya. <sup>22</sup>Onkaate pinkowakotairiri Pawa, arika pawentaaperotanaiyari, aritake impakemiro.”

### Ishintsinka Jesú

(Mr. 11.27-33; Lc. 20.1-8)

<sup>23</sup>Ikanta ripiyaawo Jesú tasorentsipankoki, ryotaantapai eejatzi. Ari ripokashitapaakeri reeware Imperatasorentsitaarewo, itsipatakari Itzinkamipaini, rosampitapaakeri: “¿Jimpe itzimajaantzika pinkathari otyaantzimiri pantantawori jiroka?” <sup>24</sup>Ari rakanakeri Jesú, ikantanakeri: “Eejatzi naaka eenitatsi nosampitemiri. Arika pakakenawo, ari nonkamantakemi iita otyaantakenari. <sup>25</sup>Romitsitsiyaatantake Juan-ni,

<sup>g</sup> 21.19 Kantakotachari jaka “pankirentsi”, iro iitaitziri higuera.

¿Itaka otyaatakeriri? ¿Pawama? ¿Atzirima?” Ikantawakagaiyanakan: “Arika ankantakeri Pawa otyaatakeri, ari inkantanakai: ‘¿Oitaka kaari pikemisantantari?’<sup>26</sup> Arika ankante: ‘Atziri otyaatakeri’, ari inkisanakai atziripaini.” Tema ikantaiyini atziri Kamantantaneri rini Juan-ní.  
 27Ikantaiyini: “Te niyotero.” Ari ikantanake eejatzi Jesús: “Ari nokantzita naaka, eero nokamantzimiro iita otyaatakenari.”

### Ikenkithatakotitziri apite itomintaitari

28 Rosampitantake Jesús, ikantzi: “¿Tsika okantzimotzimika erokapaini jiroka? Eenitatsi apaani atziri tzimatsiri apite itomi. Okanta apaani kiteesheri ikantakeri itomi: ‘Notomi, piyaate pantawaite pankirentsimashiki.’<sup>29</sup> Rakanakeri itomi, ikantanakeri: ‘Te nokowi.’ Iro kantacha osamaniityaake, ipiyimoshiryagaari itomi, jatake rantawaite. 30 Riyaatashitakeri itsipa itomi, ikantakeri eejatzi. Ikantanake irirori: ‘Ari nimatakerero, Papá.’ Iro kantacha te ryaatzi.<sup>31</sup> ¿Itzimika apite itomi antakerori ikowakeri ipaapate?” Ari rakaiyanakeni, ikantzi: “Iri antakerori retawetakari ketziroini rimperawetakari.” Ikantzi Jesús: “Iriira awisaimine ikaatzi apatotziriri koriki, eejatzi mayempiroyetatsiri, ipinkathariwentairi Pawa. Imaperotaty. 32 Tema ripokake pairani Juan omitsitsiyaatantaneri, ikamantawetakemi jimpe pinkantya pinkameethashirentaiyaarime, iro kantacha te pikemisantawakeri. Iriima ikaatzi apatotziriri koriki, eejatzi mayempiroyetatsiri, okemisantawakeri. Piñaawetawakari eerokapaini, iro kantacha te pipakayiro jimpe pikantaiyani, ompoñaantyaari pinkemisantawakeri.”

### Kaariperoshireri antawairentzi

(Mr. 12.1-12; Lc. 20.9-19)

33 “Pinkemero otsipa noshiyakaawentemiri. Tzimatsi pankitzirori chochokimashi, rotantakotakero maawoini othapiki, riwetsikashitakero rowerowa owaa paata, riwetsikake eejatzi pankoshetantsi onkene raminakoitero. Rithotyaakotake atziri aminerone iwankiremashi. Jatake irirori intaina. 34 Okanta okithokitanake chochoki, rotyaantake rimperatanewo ragaate okithoki. 35 Ikanta antawairentzi aminirori pankirentsimashi, iñaawakeri ripokaiyakeni imperataarewo, raawakeri romposawetawakari apaani, ritsitokawakeri itsipa, rishemyaantakari mapi itsipa. 36 Rotyaantawetaka itsipa rimperatanewo, osheki ikaataiyakeni. Ari ikantzitawakari eejatzi irirori. 37 Ikanta weyaantapaakawori, rotyaantakeri itomi irirori, ikantzi: ‘Ari impinkathaitawakeri notomi naaka.’<sup>38</sup> Ikanta jirikapaini antawairentzi, iñaawakeri itomi, ikantawakaanaka: ‘Iri ashitaiyaawone paata jiroka pankirentsimashi. Jame atsitokeri, ayeroota aaka.’<sup>39</sup> Rotaiyawakeri, raanakeri othapiki pankirentsimashi, ritsitokakeri. 40 Arika ripokanake

ashitawori iwankiremashi, *¿tsika inkanterika jirikapaini antawairentzi?*”

<sup>41</sup> Ari rakaiyanakeni, ikantzi: “Ontzimatye ritsitokaiteri jirikapaini kaariperori, raminai itsipa iriiperori aminairone pankirentsimashi, amapiintainirine okithoki iwankire.”

<sup>42</sup> Ikantanake Jesú: “Tema piñaanatero okantziri Osankenarentsipero: Imanintawetakawo mapi wetsikirori pankotsi, Iro kantzimaitacha ipiriintaitakero mapi pankotsinampiki, roshiyakaitairo iroorikame tzinkamitsi. Iri Awinkatharite Pawa owairori onampinaki, Iroowa ayokitziliwentantariri.”

<sup>43</sup> “Iro nokantantari: Eero piñagairo eeroka impinkathariwentaimi Pawa, iri impinkathariwentairi itsipasatzi atziri ikaatzi oshiyaaawone pankirentsi ikithokitzi ikemisantanai. <sup>44</sup> Jiroka okantakota mapi: Inkaate ontziwatyaawone, ari ritankawaitake. Iriima inkaate anawyagairi, ari ishemyaakeri.”

<sup>45</sup> Ikanta reeware Imperatasorentsitaarewo itsipatakari Fariseo-paini riyotawakero iriira roshiyakaawentake Jesú. <sup>46</sup> Ikowaiyawetanakanri raakaantanakerime, osheki ithaawakayimaitakari atziripaini. Tema riyoshiretaiyini atziripaini Kamantantaneri rini Jesú.

### Roshiyakaawentaitziri aawakaachari

**22** <sup>1</sup>Ikanta rapiitakero Jesú roshiyakaawentziro riyotaantziri. Ikantzi: <sup>2</sup>“Jiroka ikanta ipinkathariwentantai Inkitesatzi, roshiyakotari pinkathari oimoshirenkiriri itomi raawakaaga. <sup>3</sup>Rotyaantakeri rimperatanewo, inkamanteri inkaate pokatsine roimoshirenky. Iri kantacha jirikapaini, te ripokaiyini. <sup>4</sup>Rotyaantake itsipa rimperatanewo, ikantawakeri: ‘Pinkanteri noyaimanewo ripoke roya, nowamaake wathayetatsiri nopira, nokimoshirewentziri notomi raawakaiya.’ <sup>5</sup>Eekero ripiyathataiyatyaaani. Jatake rowaneki, itsipa ikenanake ipimantawaitzi. <sup>6</sup>Eenitatsi itsipa owasanketawakeriri imperataarewo, ritsitokakeri. <sup>7</sup>Ikanta ikemake pinkathari, rotyaantake rowayerite, rithonkakeri ritsitokapaakeri tsitokantantsiri, ritaakero ipanko. <sup>8</sup>Ikantairi itsipa rimperatanewo: ‘Aritake wetsikayetaka owanawontsi oimoshirenkyaaari, te opantari noyaimanewo, eero ripoki. <sup>9</sup>Piyaate awotsiki ikenapiintaitzira, pinkanteri inkaate piñeeri ripokeeta oimoshirenky.’ <sup>10</sup>Ikanta ryaatake imperataarewo, ipiyotakeri ikaatzi iñaakeri: kameethatatsiri eejatzi kaariperotatsiri. Piyotaiyakani oimoshirenkeyetachari.

<sup>11</sup> Ikanta pinkathari raminakeri ikaatzi pokantsiri. Iñaatzi osatekainchari apaani te ikithaatapaakawo rowaneenkatashitantyaariri aawakaachane. <sup>12</sup>Ikantapaakeri: ‘Asheninká, *¿tsika okantaka pikyaantakari te pikithaawentari notomi?*’ Ari imairetake, te raki.

<sup>13</sup> Ikantakeri rimperatanewo: ‘Poosowakoteri, poosoyitziteri, pookeri otsirenikitakera, ari riraawaityaari ratsikaikiwaitya inkemaatsitaiya.’

<sup>14</sup> Osheki inkaimawetaitya, iro kantzimaitacha apawopaini riyoayaetai.”

**Ikenkithatakotitziri koriki ripinaiteriri pinkathari  
(Mr. 12.13-17; Lc. 20.20-26)**

<sup>15</sup> Ikanta ripiyaiyanaani Fariseo-paini. Ikenkithawaitaiyakeni, ikantawakagaiyani: “¿Jimpe ankanterika Jesús akompitakaantyaariri?”

<sup>16</sup> Rotyaantanakeri riyotaanewo irirori itsipataanakeri raapatzianepaini Herodes, ikantapaakeri Jesús: “Yotaantanerí, okaatzi piyotaantziri irooperi ini. Iro ompoñaantyaari riyotakoperoitairi Pawa. Tekaatsi pinthaawakaiya. <sup>17</sup>Pinkantena eeroka oita pikenkithashiretari: ¿Kameethatatsima apinateri Pinkathari César ikowakaantziri?”

<sup>18</sup> Iri kantacha Jesús, riyotawakeri ikenkithashiretari, ikantziri:

“Owapeyimotantanerí. ¿Litaka pikowantari pikompitakaina?

<sup>19</sup> Poñaayenari koriki pipapiintziriri Pinkathari.” Ramaitapaakeniri apaani koriki iitaitziri “denario”. <sup>20</sup>Rosampitanakeri: “¿Litaka ashitawori iwairo jaka? ¿Litaka ashitawori roshiyakaawo?” <sup>21</sup>Ikantaiyini: “Rashi César.” Ikantzi Jesús: “Tema iri César ashitariri, pantantyaanari okaatzi ikowakaimiri, pipinateri. Iriima ikaatzi rashitari Pawa, pantantyaanari okaatzi ikowakaimiri Pawa.” <sup>22</sup>Ikanta ikemaiyakeni ikantakeriri Jesús, ryokitziiwentanakeri, ripakaanakeri. Jataiyaini.

**Rosampikowentaitziro arika rañagai kamayetatsiri  
(Mr. 12.18-27; Lc. 20.27-40)**

<sup>23</sup> Ikanta ripokaiyakeni Sadoc-iite iñeeri Jesús. Iritake Sadoc-iite kantapiintatsiri: “Eero rañagai kamayetatsiri.” Rosampitapaakeri Jesús, <sup>24</sup>ikantapaakeri: “Yotaantanerí, rosankenatake pairani Moisés, okantzi: ‘Arika inkame apaani atziri, eerorika rowaiyakaanakawo iina, shinetaantsitsati ragairo irirentzi, rowaiyakagaiyaawo. Roshiyakagairi iriime ashityaarine irirentzi kamaintsiri.’ <sup>25</sup>Jame ankantawake: Tzimatsi kaatatsiri 7 irirentzi. Etawori itzimi raake iina, te rowaiyakaawo iina kamake, ragairo itsipa irirentzi. <sup>26</sup>Ari ikantakari ejatzti apitetapaintsiri irirentzi. Poñaapaaka itsipa mawatapaintsiri. Ari ikantakari maawoini ikaatzira 7. <sup>27</sup>Okanta osamanitake kamai ejatzti tsinane. <sup>28</sup>Arikame rañaayetai paata kamayetatsiri, ¿tsika itzimika oimentaperotaiyari tsinane? Tema maawoini ikaatzira 7 iinantawetakawo.”

<sup>29</sup>Rakanakeri Jesús, ikantziri: “Pikenakaashitakawo eeroka, te piyotakotziro Osankenarentsiperi, te piyotakotairo ejatzti ishindsightsinka Pawa. <sup>30</sup>Arika rañaayetai paata kamayetatsiri, eero itzimayetai awakagaachane. Roshiyapaiyaari imaninkarite Pawa Inkitesatzi.

<sup>31</sup> ¿Tema piñaanatakotziro tsika onkantya arika rañaayetai kamayetatsiri? Tema ikantake Pawa, riñaawaitake:

<sup>32</sup> Naakatake Pawa ipinkathatziri Abraham, Isaac, eejatzi Jacob. Ari ayotaiyini añaayetatsi irirori, te okanta kaminkari impinkathateri Pawa, apa rimatziro añaayetatsiri.” <sup>33</sup> Ikanta ikemaiyakerini Jesús ikantakeriri, riyokitziiwentanakeri, ikantaiyini: “Imapero okameethatzি riyotaantziri.”

### Ikenkithatakotitziro ikowakaaperotantziri Pawa

(Mr. 12.28-34; Lc. 10.25-28)

<sup>34</sup> Ikanta ipiyotaiyakani Fariseo, tema ikemake kameetha rakakeri Sadoc-iite rosampitakeriri. <sup>35</sup> Ikanta apaani, irijatzi yotakoperowetawori Inintakaantaitanewo, ripokashitakeri Jesús rosampiteri, tema ikowatzi rikompitakayaarime, ikantapaakeri: <sup>36</sup> “Yotaantaneri, ¿otzimika Inintakaantaitanewo anairori otsipa?” <sup>37</sup> Ari rakanake Jesús, ikantziri: “Piwinkatharite rini Pawa, ontzimatye pinintaperotairi, pinintashirenkatairi, pinintashiretairi eejatzi. <sup>38</sup> Iroowa etawori Inintakaantaitanewo ikowaperotitziri. <sup>39</sup> Ari oshiyawo apitetanaistsiri: Ontzimatye petakotaiyaari pisheninka, poshiyakagairi pineshironkatziro eeroka piwatha. <sup>40</sup> Pimonkaatakerorika jiroka kaataintsiri apite, pimatakerowa maawoini rosankenayetakeri Moisés-ni, maawoini eejatzi rosankenayetakeri Kamantantaneri.”

### ¿Tsika iitaka charinetariri Cristo?

(Mr. 12.35-37; Lc. 20.41-44)

<sup>41</sup> Rimatanakero irirori Jesús, rosampitakeri Fariseo-paini itsipatakari ipiyotaiyanira. <sup>42</sup> Ikantziri: “¿Itaka pikenkithashiretakotariri eeroka Cristo? ¿Tsika iitaka charinetariri?” Ikantaiyini Fariseo: “Icharine David-ni rini.” <sup>43</sup> Ikantzi Jesús: “¿Tsika oitaka riñaawaitakaantariri pairani David-ni Tasorenkantsi, roshiyakaakeri Iwinkatharite? Ikantake pairani:

<sup>44</sup> Ikenkithawaitake Pinkathari, ikantawairi nowinkatharite:

Pisaikapai nakoperoki ampinkathariwentante,  
Irojatzi paata nowasanketantakaariri kisaneentakemiri,  
Ari pimakoryaaityitzitantaiyaari.

<sup>45</sup> Rimatzitakawo David-ni ikantake: ‘Nowinkatharite rini.’ ¿Tsika inkene incharinetyaari?” <sup>46</sup> Mairetaiyanakeni te raki. Thaawashire ikantaiyakani, tekaatsi kowanaatsine rosampitanairi.

### Ikenkithatakotitziri Yotzinkariite eejatzi Fariseo-paini

(Mr. 12.38-40; Lc. 11.37-54; 20.45-47)

**23** <sup>1</sup>Ari ikenkithataaakeri Jesús atziripaini itsipataakeri ryotaanewopaini, ikantziri: <sup>2</sup>“Paminerí Yotzinkariite

eejatzi Fariseo-paini, iro ikamaita rowaagakoyetziro okaatzi rosankenayetakeri pairani Moisés-ni. <sup>3</sup>Pinkemisanteri onkaate inkantayetemiri, te okameethatzi poshiyakotaari okaatzi rantayetziri, tema te rimonkaayetziro irirori. <sup>4</sup>Imapero opomeentsita okaatzi ikowakayimiri pimayetairime. Te iñiimaitawo impomeentsiwentyaawo irirori rimatantyaawori. <sup>5</sup>Rantashiyetawo ikowiri irirori iñaantaityaariri. Osheki rashiminthatari mashitsimonki roteyetzirowa Osankenarentsiperon rontarekakotziro ishempaki, eejatzi itamakoki. Osheki rowaneenkakaakiyetziro iithaare rishirikiro manthakintsi. <sup>6</sup>Rashiminthatawo rosatekaiteri niyankineki arika rowaiyani isheninka. Ari ikantari eejatzi arika ryaate pankotsiki rapatotapiintaitaga. <sup>7</sup>Ikowi impinkathaiteri arika iñagaiteri, riwethaityaari. Ikowi eejatzi inkantaiteri: ‘¡Yotaantanerí!’ <sup>8</sup>Te okameethatzi pimatero eeroka, eero pikowashita inkantaitemi: ‘¡Yotaantanerí!’ Tema maawoini eerokapaini oshiyawaitakawo pirentzitawakagaaty. Apaani ikanta yotaantatsiri, iriitake Cristo, tekaatsi itsipa. <sup>9</sup>Jaka kipatsiki, te okameethatzi pinkantashiwaityaari pisheninka: ‘¡Ashitanarí!’ Tema apaani ikanta Ashitzimiri Inkitesatzi. <sup>10</sup>Te okameethatzi eejatzi inkantaitemi: ‘¡Nowinkatharité!’ Tema apaani ikanta piwinkatharite, iriitakera Cristo. <sup>11</sup>Inkaate kowatsine ririiperote, roshiyakotaari ikantaga ronampitaitari. <sup>12</sup>Inkaate kowashiwaitachane impinkathaiterime, ari iñaakero intsinampashiretakagaitairi. Iriima tsinampashirewaitatsiri, iri ñagairone impinkathaitairi.

<sup>13</sup> ¡Ikantamatsitaitzimi eeroka Yotzinkari eejatzi Fariseo, owapeyimotantaneri pinatzi! Osheki potzikakeri ipinkathariwentairi Pawa. Eero piñagairo eeroka impinkathariwentaimi, ¿tsika piiteroka piyotaantyaariri itsipa impinkathariwentai irirori? <sup>14</sup> ¡Ikantamatsitaitzimi eerokapaini Yotzinkari eejatzi Fariseo, owapeyimotantaneri pinatzi! Pawentaashitawo kamatsiri oime pashitzitawo opanko, iro posamaninkantawori pamanapiintawetaga eero Riyotantaitzimi. Iro kantzimaitacha antawo rowasankeetaimi. <sup>15</sup> ¡Ikantamatsitaitzimi eerokapaini Yotzinkariite eejatzi Fariseo, owapeyimotantaneri pinatzi! Osheki poomerenchaakeri atziripaini kaari ashenkata roshiyakotai aaka a-judá-itetzira, piyotaakeri rowapeyimotante irirori. Roshiyakotantaimiri eeroka ratsipetaiyaawo sarinkaweni.

<sup>16</sup> ¡Ikantamatsitaitzimi eerokapaini, oshiyakotariri mawityaakiri rakathatawakagaiyani! Tema raakoitziro owairo tasorentsipango, ikantaitzi: ‘Rowasanketainaata Tasorentsipankotsiweri eerorika nimonkaatziro nokantziri.’ Pikantapiintaiyakeni eerokapaini: ‘Eerorika rimonkaataitziro, tekaatsi oitya.’ Irooma arika raakoiteri iwairo oroo saikatsiri tasorentsipankoki, pikantapiintake: ‘Ontzimatye rantaitero ikantaitakeri.’ <sup>17</sup> ¡Masontzishirerí, mawityaakishirerí!

¿Iitaka kowaperotachari, iriima ooro? Kaari, tema iro irooperotatsi tasorentispango otasorentsitakairi ooro.<sup>18</sup> Ari okantari ejatzi arika raakoitero owairo taapokimentotsi, ikantaitzi: ‘Rowasanketainaata Ataapiintziniri eerorika nimonkaatziro nokantziri.’ Iro kantacha pikantapiintaiyakeni eerokapaini: ‘Eerorika rimonkaataitziro, tekaatsi oitya.’ Irooma arika raakoitero iwairo piratsi ritagaitziria taapokimentotsiki, pikantapiintake: ‘Ontzimatye rantaitero ikantaitakeri.’<sup>19</sup> ¡Masontzishirerí, mawityakishirerí!, ¿Iitaka kowaperotachari, iriima piratsi? Kaari, tema iro irooperotatsi taapokimentotsi otasorentsitakairi ritagaitziri.<sup>20</sup> Ikaatzi aakotzirori owairo taapokimentotsi, raakotakero owairo maawoini ikaatzi ritagaitziri janta.<sup>21</sup> Ari ikanta ejatzi ikaatzi aakotzirori owairo tasorentispango, raakotakero owairo maawoini okaatzi tzimantawori.<sup>22</sup> Ikaatzi aakotzirori owairo inkite, raakotakero owairo maawoini janta risaikinta Pawa, roshiyakaakero iriime Pawa raakotake iwairo.

<sup>23</sup> ¡Ikantamatsititzimi Yotzinkariite ejatzi Fariseo, owapeyimotantaneri pinatzi! Pinashitapiintanari pashitakaariri Pawa, pipayetapiintziri inchashaaniki. Temaita pantayetziro irooperotatsiri ikowakaitzimiri: Pinkameethashireyete, pineshironkashiretante, pawentaashiretaiyaari. Irootake irooperotatsiri pantayetairo, eero pipakayimaitawo panteniri otsipa.<sup>h</sup> <sup>24</sup> ¡Mawityaakiri, akathatawakaachari! Poshiyakari pankenatariri shikiryaaniki eero rirakotantari, iro kantzimaitacha rirakotakeri antari piratsi.<sup>i</sup>

<sup>25</sup> ¡Ikantamatsititzimi eeroka Yotzinkariite ejatzi Fariseo, owapeyimotantaneri pinatzi! Poshiyakotakawo iramentotsi ejatzi owamentotsi, okiteweta kameetha jakakeroki, irooma inthomoiki kipatsi okantaka. Ari pikantayetaka eeroka kantacha iñagaitemi kameethashireripini, koshintzimaita pini, pikowapiintakero pinintaawaitya.<sup>26</sup> ¡Mawityaakiri Fariseo! Poshiyakairo poshetatyeyerome inthomoiki piraamento ejatzi powamento, ompoñaantyaari onkitetai ejatzi jakakeroki.

<sup>27</sup> ¡Ikantamatsititzimi eeroka Yotzinkariite ejatzi Fariseo, owapeyimotantaneri pinatzi! Poshiyakawo okitamaaweta rowantitariri kaminkari, owaneenka okantaka jakakeroki. Iro kantacha inthomoiki, ari risaikake itonkipooki kaminkari, shityeenkatake.<sup>28</sup> Ari pikantayetakari eeroka, iñaayewetakemi atziri pantakero kameethari, iro kantzimaitacha inthomoikinta owapeyimotantaneri pinatzi, kaariperoshiretakemi.

<sup>29</sup> ¡Ikantamatsititzimi eeroka Yotzinkariite ejatzi Fariseo, owapeyimotantaneri pinatzi! Oitaka piwetsikapookitantawori

<sup>h</sup> 23.23 Iro ikantaitziri jaka inchashaaniki: menta, eneldo, comino.

<sup>i</sup> 23.24 Kantakotachari jaka “antari piratsi”, iri iitaitzitari “camello”.

ikitayeetakerira Kamantantaneri, powaneenkayetakero eejatzi inkene inkenkithashiretakoitapiintemi, inkantaite: ‘Kameethashireri rinake jirika.’<sup>30</sup> Pikantaiyini eejatzi: ‘Arime nontzimakeme ketziroini naaka eero nowamairime, eero noshiyakotari nocharineni ikaatzi owamaakeriri Kamantantaneri.’<sup>31</sup> Eerokatake thawetakotacha apaniroini, iri poshiyakoyeta eero kaariperori okaatzi retanakari pairani picharinepaini!<sup>32</sup> ¡Poshiyakawo pisheninkatatyeyaaarime maanke! Kaariperoshire pikantaka. ¿Tsika pinkantaiyaaka pishiyapithatantaiyaawori powashironkagaiya sarinkaweniki?<sup>33</sup> Iro notyaantantakemiriri pairani Kamantantaneri, yotaneri, eejatzi etawori Yotzinkari. Eenitatsi apawopaini powamaakaantayetakeri, pikentakotakaantayetakeri itsipa. Eenitatsi itsipa, pipasatakaantawaitakeri rapatotapiintaitaga, osheki powasankeyetakeri maawoiniki nampitsi.<sup>35</sup> Iro piñaantyaawori rowasankewentaitemiri eero ikaatzi kamayetaintsiri pairani, retanakawo kameethashireri Abel irojatzi Zacarías itomini Berequías. Iriira rowamagaitake pairani riyaaterome taapokimentotsiki ipoñaanakawo tasorentsipankoki.<sup>36</sup> Imaperoko nokantzimi ari rowasankewentaitakemiri jirikapaini nosheninka.”

### Riraashiretawo Jesús Jerusalén (Lc. 13.34-35)

<sup>37</sup>“¡Jerusalén-satzí! Osheki pitsitokake Kamantantaneri. Pishemyaayetakeri ikaatzi rotyaantawetakemiri. Tema nokowawetapiintaka noshiyakotaarime tyapa rosatetziri iryaani, ari nokowawetaka nonkantairime naaka maawoini ikaatzi notomintaari. Iro kantzimaitacha te pikowaiyini.<sup>38</sup> Jaka pisaikawetaga eero iñagaitai paata iita nampitaiyaawone, kaankiityagai.  
<sup>39</sup> Tema eero piñaapiintaana jaka, irojatzi paata pinkantaiyaari:

Tasonkawentaari rini, tema Pinkatharentsi aitziri otyaantakeriri.”

### Ikenkithatakotziro Jesús intzimpookaitero tasorentsipanko (Mr. 13.1-2; Lc. 21.5-6)

**24** <sup>1</sup>Ikanta rishitowanairo Jesús ipoñaanaawo tasorentsipankoki, iro riyaatai. Ari ikantziri ryotaanewo: “Paminero jimpe okanta riwetsikaitziro tasorentsipanko.”<sup>2</sup> Rakanakeri irirori, ikantanakeri: “Maawoini piñaakeri, eero piñagairo paata jimpe okanta mapi opewiryaayetaka iroñaaka, iroowa rithonkaitero intzimpookaitero. Imaperotataya nokantzimiri.”

### Iñagaiteri paata arika ithonkimataiya (Mr. 13.3-23; Lc. 21.7-24)

<sup>3</sup>Ikanta ritonkaanake otzishiki Olivo, ari risaikapaake. Rosampitakeri ryotaanewo, ikantziri: “Janjaatya pinkantena, ¿tsikapaiteka

imonkaatyat pikantakeri? ¿Aripaitema ithonkaiya arika pipiyimatai? ¿tsika onkantyaaka niyotantyaawori?”<sup>4</sup> Rakanake Jesús, ikantanakeri: “Ontzimatye paamaya ramatawitatitzimikari.<sup>5</sup> Tema osheki kowatsine ramatawitemi paata, raakotapaakena nowairo, inkante: ‘Cristo nini naaka.’<sup>6</sup> Ari pinkemakoyetakero omanataantsi, paamaiya ominthaawashiretzimikari. Ontzimatye awisayete jirokapaini, tekerata imonkaatyata ithonkantaiyaari maawoini.<sup>7</sup> Rantaminthatawakaiya maawoini nampitsiki inkaate rotyaatayeteri pinkathariyetatsiri. Iñagaite mantsiyarentsi, tashetsi, omoyekya kipatsi tsikarikapaini.<sup>8</sup> Iroowa etanakyawone inkemaatsitaityaawo jirokapaini.

<sup>9</sup> Raakaantaitanakemi eeroka, inkoshekawaitaitemi irojatzi rowamaantaitakemiri. Osheki inkisaneentanakemi atziri okantakaantziro paakotairi nowairo pikemisantaana.<sup>10</sup> Ari iñagaitake atsipetashitawori ikemisantaweta, iñagaite kisaneentawakaachane, iñagaite aakaantawakaachane.<sup>11</sup> Osheki pokapaintsine roshiyawetapaakyaarime Kamantantaneri, ramatawitapaakeri inkaate kemisantawakerine.<sup>12</sup> Rantaperitero kaariperori, eero ineshironkatawakaanaa atziri.<sup>13</sup> Iriima kyaaryootaintsine, iriitake awisakoshiretaatsine.<sup>14</sup> Arika ithonkakya inkemakoitairo maawoini kipatsiki Kameethari Ñaantsi kenkithatakotzirori ipinkathariwentantai Pawa, aripaite imonkaataiya ithonkantaiyaari maawoini.

<sup>15</sup> Ari piñaakeri iitaitziri ‘Pinkaari Thonkaatantaneri’, ikenkithatakotakeri pairani Kamantantaneri Daniel. Risaikapaake otasorentsitzira. (Maawoini ñaanaterone jiroka, okowaperotaty inkemathatairo.)<sup>16</sup> Inkaate nampitaiyaawone paata jak Judea-ki, ontzimatye rishiyayetai tonkaariki.<sup>17</sup> Pisakerika jekokeroini pipankoki, irojatzi pishiyantanakyaari, eero pikyaapanaaantzi paapanaante oitarika.<sup>18</sup> Powanekirika pisaiki, pishiyanaake tsika pikanta, eero paapanaantziro piithaare.<sup>19</sup> Inkantamatsitaitero paata onkaate motziyetatsine, onkaate eejatzi tzimayetatsine eentsite eeni ithotsi!<sup>20</sup> Pamañaari Pawa, onkantyaama arika pishiyayetake, eero pitonkyotantawo kyaawontsi, eero pishiyanta eejatzi kiteesheriki rimakoryaantaitari.<sup>21</sup> Tema antawo iñagaitero rashironkaitya paata. Pairani owakera riwetsikaitakero kipatsi, irojatzi iroñaaka, te iñagaitziro oshiyaawone jiroka ashironkagaantsi. Eero apiita iñagaitairo oshiyaawone.<sup>22</sup> Eerome ishintsitaitzi romairyagaitero jiroka ashironkagaantsi, tekaatsime awisakotaatsine. Ikaminta itzimayetzi riyoyaitakeri, awentaayetaariri Pawa, iro romairyaaantakawori intspapiteeni jiroka ashironkagaantsi.<sup>23</sup> Arika pinkeme inkantaitemi: ‘Jirika Cristo’, itsipa kantatsine: ‘Jirinta Cristo’, eero pikemisantziri.<sup>24</sup> Ripokayetapaake oshiyakotyaarine Cristo, oshiyakotyaarine Kamantantaneri. Ari ritasonkawentantapaake, inkowawetya ramatawiteri riyoyaayetakeri Pawa.<sup>25</sup> Nokamantzitakemirowa.<sup>26</sup> Ari inkantaitakemi: ‘Areetaka janta

ochempiki.’ Eero piyaatashitziri. Inkantaite eejatzi: ‘Ari risaiki inthomoiki pankotsiki.’ Eero pikemisantziri. <sup>27</sup>Tema arika ripiyai Itomi Atziri, roshiyapaiyaawo okanta ookathawontsi. Etanakyaawo imorekanake rishitowapiintzira ooryaatsiri, irojatzi tsika ikyapiintzi. <sup>28</sup>Tsikarika risaiki shitziware, ari ipiyowentari amempori.”<sup>j</sup>

**Ripiyantaiyaari Itomi Atziri**  
**(Mr. 13.24-37; Lc. 21.25-36; 17.25-36; 12.41-48)**

<sup>29</sup>“Arika onkaatapaake paata rashironkaita antawo, ari ritsiwakake ooryaa, eero roorenta kashiri eejatzi. Rithopiryayaete impokiro, maawoini ikaatzi oorentachari inkiteki rithonkya ripookayete. <sup>30</sup>Aripaite inkoñaatapai Itomi Atziri inkiteki. Antawo inthaawayetanake atziri jaka kipatsiki. Tema iñagaitawairo rowaneenkawo eejatzi ishintsinka, inkenantapaiyaawo menkor. <sup>31</sup>Rityootapaake shintsiini maninkariite, impiyotapairi ikaatzi riyoyaakeri nampitawori maawoini tsikarika jaka kipatsiki, irojatzi jimpe owatzitapaawo.

<sup>32</sup>Oshiyawo piñaapiintziro eereshiyetai pankirentsi, piyotzi irootaatsi osarentsitzimatai.<sup>k</sup> <sup>33</sup>Iro piyoteri eerokapaini, arika piñaayetakero nokantayetakemiri, jekaatzimataana. <sup>34</sup>Imaperotaty nonkante, eero ipeyayetzitaawo jirika asheninkapaini, irojatzi iñaantayetakyaawori nokamantayetakemiri. <sup>35</sup>Ari ithubkaiya inkite eejatzi kipatsi, irooma okaatzi niñaaneyetakari imaperotaty iroori.

<sup>36</sup>Iro kantacha tekaatsi yotatsine tsikapaite, iri owatsipero inkiteweri te riyotzi. Tema apatziro ikantakaawo Ashitanari riyotziro irirori. <sup>37</sup>Ari oshiyawo okanta pairani eeniro rañaaweta Noé, ari onkantaiyaari eejatzi arika ripiyai Itomi Atziri. <sup>38</sup>Tema pairani tekera areetaata oonkawo, inimowitziri atziri, rowawaitaiyani, rirawaitaiyini, itsipatari aayetatsiri iina. Irojatzi rotetantanakari Noé pitotsiki. <sup>39</sup>Tekaatsi inkenkithashirete, irojatzi omapokantakari oonkawo, ari raperaataiyakani maawoini. Ari onkantaiyaari eejatzi arika ripiyai Itomi Atziri. <sup>40</sup>Risaike apite antawaitatsiri rowaneki, ragaitanai apaani inkiteki. Iriima itsipa rookaitanairi. <sup>41</sup>Isaike apite tsinane itoonkawaite, ragaitanai apaani inkiteki. Irooma otsipa tsinane rookaitanairo. <sup>42</sup>Paamaawentaiya eeroka, tema te piyotzi tsikapaite ripiyai Piwinkatharite. <sup>43</sup>Pinkenkithashiretakoteri apaani atziri, arikame riyote ripokatyne koshintzi tsireniriki, ari raamaakyaaame, eero ikoshaagantaitzirime ipankoki. <sup>44</sup>Ari onkantyaari, ontzimatye paamaawentaiya eejatzi eeroka. Tema tekaatsi yotatsine tsikapaite ripiyai Itomi Atziri.

<sup>j</sup> 24.28 Ikanta añaapiintziri amempori rewotaiyani, ayotzi eenitatisi kamatsiri. Ari okantari eejatzi arika añaayetakero okaatzi ikenkithatakoyetakeri Jesú, ayotzi irootaintsi ripiyimatai. <sup>k</sup> 24.32 Ikantakoitziri jaka “pankirentsi” higuera ini.

<sup>45</sup>Poshiyakotaari kameethashireri noshikaarewo, kenkithashiretachari kameetha. Rookanakeri ipankoki imperatariri, ikantanakeri: 'Paminenari ikaatzi saikatsiri pankotsiki.' <sup>46</sup>Kimoshire inkantaiya jirika noshikaarewo, arika ripiyai imperatariri, tema iñaapairi rimonkaatakeri ikantanakeri. <sup>47</sup>Ari rishinetaakeniri inkempoyagainiri maawoini okaatzi rashitari. <sup>48</sup>Iriima kaariperoshireri noshikaarewo, ikantzi: 'Eero ripiyita imperatanari.' <sup>49</sup>Arira rowasankewaitakeri itsipa noshikaarewo. Jatake intsipayetyaari shinkiyantzi. <sup>50</sup>Inimowitziri jirika noshikaarewo, romapokashitaiyaari rareetaiya imperatariri. <sup>51</sup>Rimaperoiteri rowasanketapairi, rookapaakeri tsika ikashaakagaitakeri owapeyimotantaneri. Ari riraawaitya, ratsikaikiwaitya inkemaatsitaiya."

### Ikenkithatakotaitziro 10 mainawo

**25** <sup>1</sup>"Jiroka ikanta ipinkathariwentantai Inkitesatzi, roshiyatyawo 10 mainawo jatatsiri tsireniriki itonkyotyaari aawakaachane. Aayetanake ootapiintaiyarini. <sup>2</sup>Eenitatsi okaatzi 5 mainawo kyoshiretsiri, eenitatsi eejatzi okaatzi 5 mainawo kaari kyoshiretsiri. <sup>3</sup>Jirokapaini 5 mainawo kaari kyoshiretsiri aawetanakari ootapiintari, iro kantacha eepichoki aanake iyaa. <sup>4</sup>Irooma otsipa kyoshiretaintsiri, aayetanake iroori ootapiintari, aanake eejatzi osheki iyaa. <sup>5</sup>Te ripokita aawakaachane, ayimatapaakero owochokine, magaiyanakeni. <sup>6</sup>Okanta niyankiite tsireniri, okematz ikaimitzi, ikantaitzi: '¡Kaakitake aawakaachane, pitonkyotawakyaari!' <sup>7</sup>Kakitaiyanakeni mainawo, iyeekiyetanairi iyaa ootapiintari. <sup>8</sup>Mainawopaini kaari kyoshiretsiri, okantawetanakawo kyoshiretaintsiri: 'Pimprena iyaa pootapiintari, irootaintsi ritsiwake nashi naaka.' <sup>9</sup>Ari okantanake: 'Te ikimaatzi nashi naaka, piyaate pamanantapainte eeroka.' <sup>10</sup>Iyaaminthaitapaintzi amanantzi, areetapaaka aawakaachane. Jirokapaini okaatzi aamaawentainchari, itonkyotawakari, raanakero tsika roimoshirenkaiteri. Rashititanakero otantotsi. <sup>11</sup>Okanta ipiyawetapaaka jatatsiri amanantzi, okaimakaimawetapaaka, okantapaake: '¡Pashitareenawo naaka!' <sup>12</sup>Okematz ikaimitzi rakitanakero, ikantaitziro: 'Te niyotzimi. Imaperotatyá.' <sup>13</sup>Ontzimatyé paamaawentayetaiya eeroka. Tema te piyotzi tsikapaite ripiyai Itomi Atziri."

### Ikenkithatakotaitziri koriki (Lc. 19.11-27)

<sup>14</sup>"Jiroka ikanta ipinkathariwentantai Inkitesatzi, roshiyakotatyari apaani atziri kowatsiri ryaate intaina, ipiyotakeri rimperatanewo, ipanakeri inkempoyeeniri okaatzi rashitari. <sup>15</sup>Ipanakeri apawopaini rimperatanewo iyorikite. Jirika kenkithashiretachari kameetha, impanakeri ikaatzi 5 koriki, itsipa yoneentatsiri impanakeri ikaatzi

apite, iriima itsipa weyaantapaakawori impanakeri apaani. Jatake intaina.<sup>16</sup> Ikanta jirika ipaitakeri 5 koriki, rantawaitakaakeri, roshekyaakeri ragai ikaatzi 5.<sup>17</sup> Ari ikantakari ipaitakeri apite, roshekyaakeri irirori, ragai ikaatzi apite.<sup>18</sup> Iriima itsipa ipaitakeri apaani, raanakeri iyorikite, ikitatakeri kipatsiki.<sup>19</sup> Okanta osamanitake piyaawo ashitariri koriki, ikaimakaantapairi rimperatanewo riyote oita rantantakari iyorikite.<sup>20</sup> Ari ripokapaake ipaitakeri 5 koriki, roñaagapairi itsipa 5 koriki roshekyaakeri, ikantapaakeri: 'Pinkatharí, 5 koriki pipakena pairani, jirika itsipa 5 noshekyagairi.'<sup>21</sup> Ikantzi Pinkathari: 'Ariwé nimperatanewo, kameethashireri pini. Eepichokiini koriki pikempoyaakena, ari pinkempoyagai itsipa osheki. Pipoke, pintsipataina pinintagaiya.'<sup>22</sup> Areetapaaka ipaitakeri apite koriki, ikantapaakeri: 'Pinkatharí, apite koriki pipakena, jirika itsipa apite noshekyagairi.'<sup>23</sup> Ikantzi pinkathari: 'Ariwé nimperatanewo, kameethashireri pini. Eepichokiini koriki pikempoyaakena, ari pinkempoyagai osheki itsipa. Pipoke, pintsipatena pinintagaiya.'

<sup>24</sup> Areetapaaka ipaitakeri apaani koriki, ikantapaakeri: 'Pinkatharí, niyotzi naaka mashireyantzi pini, pashi powiro pantawaitakaantziri piyorikite, piñaantyaawori poshekyeeri.<sup>25</sup> Iroowa nothaawantakari, naakeri piyorikite, nokitatakeri kipatsiki. Jirika iroñaaka namaimiri.'

<sup>26</sup> Rakanakeri ikantziri: 'Kaariperoshireri pini, perantzi pini. Piyowetaka ari nonkisakemi eerrika poshekyaanari noorikite,<sup>27</sup> piñaawetaka eero pimatziro eeroka, pamineme iita antawaitakaimirine, ari ishenitaime iroñaaka, iri pimpawainarime nipiyyawowa.'<sup>28</sup> Ikantanakeri ikaatzi saikaintsiri: 'Paapithateri koriki, pimpairi itsipa oshekyaaikeriri 10 koriki.'<sup>29</sup> Ikaatzi otzimimotziri, ari ontzimimotairi osheki. Iriima kaari otzimimotzi, eekero riyaatatye iñagairo eero otzimimotairi.<sup>30</sup> Paanakeri jirika kaariperoshireri, pookeri otsirenikitzira. Ari riraawaityaari, ratsikaikiwaitya inkemaatsiwaitaiya."

### Ikenkithatakotaitziro yakowentaantsi

<sup>31</sup> "Arika ripiyai Itomi Atziri pinkatha rowaitairi. Intsipataiyaari maninkariite, roshiyakotaiyaari ikanta pinkathari risaikantawo owaneenkatachari risaikamento.<sup>32</sup> Impiyotairi maawoini atziri tsikarika risaikai irirori. Rinashiyetaiyaari roisaikayetairi. Roshiyakotaiyaari atziri yoshiitziriri ipira te ikowakayiri intentaiya.<sup>33</sup> Roisaikairi ikowaperotziri rakoperoki, iriima imanintayetziri rampateki roisaikairi.<sup>1</sup> <sup>34</sup> Kenkithawaitake Pinkathari, riñaanateri rinashitakari rakoperoki, inkanteri: 'Pipoke maawoini, osheki inkimoshiretakagaimi

1 25.32-33 Iri ikantakoitzi jaka oweja, iri piratsi ikowaperoitakeri roisaikaiteri akoperotsiki. Iriima cabra, iri piratsi imanintaitakeri roisaikaitakeri ampatentsiki.

Ashitanari, pinampitaiyaawo tsika ipinkathariwentantzi irirori, arira riwetsikaantakemi pairani owakera riwetsikantakawori kipatsi.

<sup>35</sup> Tema piñaana pairani aawetana nitashe, iro kantacha pipakena nowanawo. Piñaana ayimatana nomere, pipakena nirakeri. Piñaakena nareeta pinampiki, pineshironkatakena pipankoki. <sup>36</sup> Piñaana nisagaakowitzi, pipakena nokithaatari. Piñaana nomantsiyatake, pamitakotakena netsiyatakotantaari. Romonkyakaantaitakena, pipokashitakena piñaana.’ <sup>37</sup> Ikantaiyini kameethashireri: ‘Pinkatharí. ¿Tsikapaite noñiimika pitasheneentzi, nopantzimiri powanawo? ¿Tsika noñiimika pimereneentzi, nopantzimiri pimere? <sup>38</sup> ¿Tsikapaite noñiimika, naakameethatantzimiri nopankoki? ¿Tsikapaite noñiimika pisagaakowitzi, nopantzimiri piithaare? <sup>39</sup> ¿Tsikapaite noñiimika pimantsiyatzi, romonkyagaitzimi, niyaatashitantzimiri noñiimi.’

<sup>40</sup> Ari rakanake Pinkathari, ikantzi: ‘Tema pineshironkatakeri ikaatzi awentaayetanari noshiyakagairi iyeki, naakatajaantake pineshironkatake. Imaperotatyá.’ <sup>41</sup> Ripithokashitanakari saikantsiri rampateki, ikantziri: ‘Kaariperorí, piyaate eeroka pinkemaatsiwaitaiya paampariki kaari tsiwananetatsine, ikashaakaitakeriri Kamaari intsipataiyyaari maawoini imaninkarite irirori. <sup>42</sup> Piñaawetakana nitasheneentzi, te pipana nowanawo. Owamaimatakena nomere, te pipana nire. <sup>43</sup> Piñaawetana nareeta pinampiki, te pineshironkatena pipankoki. Piñaawetana nisagaakowitzi, te pipana nonkithaatyaari. Piñaawetana nomantsiyatzi, romonkyakaantaitana, te pareetana.’ <sup>44</sup> Rakanake kaariperoshireri, ikantzi: ‘Nowinkatharite, ¿tsikapaiteka noñaawetzimi pitasheneentzi, pimereneentzi, pareetanta, pisagaakowitzi, pimantsiyatzi, romonkyagaitzimi, temaita noneshironkayetzimi.’ <sup>45</sup> Ikantanake Pinkathari: ‘Te pineshironkayetantai, inkantawetakya iryaani rine, naakatake pantzimotake. Imaperotatyá.’ <sup>46</sup> Iroowa ratsipetantaityaawori kantaitaachane ashironkagaantsi. Iriima inkaate kameethashiretaintsiri, inkantaitaatyeero rañaayetai.”

**Ikamantawakaita raakaanteri Jesús**  
*(Mr. 14.1-2; Lc. 22.1-2; Jn. 11.45-53)*

**26** <sup>1</sup>Ikanta rithonkanakero Jesús okaatzi ikenkithawaitakotakeri, ikantanakeri riyotaanewo: <sup>2</sup>“Piyotaiyini eeroka yotapaaka apite kiteesheri roimoshirenkaityaawo Anonkoryagaantsi. Ari raakaantaiterí Itomi Atziri inkentakoiteri.”

<sup>3</sup> Ikanta reeware Imperatasorentsitaarewo itsipatakari Yotzinkariite, ejatzti Itzinkampaini, ipiyotaiyakani ipankoki Caifás reewaperore Imperatasorentsitaarewo. <sup>4</sup> Ari ikamantawakaiyakani, ikantaiyini: “Jame amatawiteri Jesús ayeri atsitokakaanteri. <sup>5</sup> Iro kantacha eero akoshekari kiteesheriki roimoshirenkantaitari, ikisawentzirkari atziripaini.”

**Risaitantaitari Jesús kasankari**  
*(Mr. 14.3-9; Jn. 12.1-8)*

<sup>6</sup>Ikanta ikenanai Jesús Betania-ki, ipankoki Simón pathaawaiwetachari. <sup>7</sup>Ari areetapaaka tsinane amakotake kasankari, kameetha okantaka onaki riwetsikaitziro mapi jitachari “alabastro”, osheki owinawo. Isaitantapaakari iitoki Jesús risaikakera rowaiyani. <sup>8</sup>Ikisaiyanakani riyotaanewo iñaakerowa, ikantaiyini: “¿Oitaka apaawaitantawori? <sup>9</sup>Arikame ompimantya, ragaiteme osheki koriki impaiterime ashironkainkari.” <sup>10</sup>Riyotakotakeri Jesús, ikantziri: “¿Oitaka pikasantawori jiroka tsinane? Kameetha okanta noñaakero naaka antakeri. <sup>11</sup>Rashi rowaatyeero ashironkainkari pintsipatyari, irooma naaka eero pintsipataana. <sup>12</sup>Tema jewatake isaitantanawo kasankari imotaawentatyaaanawo paata arika inkitaitakena. <sup>13</sup>Arika inkamantantaitero paata Kameethari Ņaantsi, inkenkithatakoitero jiroka tsinane, roshiretakoitantlyaawori antakeri. Imaperotaty.”

**Ikenkithashiryaa Judas raakaanteri Jesús**  
*(Mr. 14.10-11; Lc. 22.3-6)*

<sup>14</sup>Ikanta Judas Iscariote kaawetachari 12 riyotaanewo Jesús, riyaatashitakeri reeware Imperatasorentsitaarewo. <sup>15</sup>Ikantapaakeri: “¿Itaka pimpenari arika namakemiri?” Roñaagaitanakeri ikaatzi 30 ipewiryaka koriki. <sup>16</sup>Aripaite raminaminatanakero Judas tsikapaite raakaanteri.

**Weyaantawori rowakaanaari riyotaanewo**  
*(Mr. 14.12-25; Lc. 22.7-23; Jn. 13.21-30; 1 Co. 11.23-26)*

<sup>17</sup>Areetapaaka etawori kiteesheri rowantapiintaitawori tashirentsiponka, pokaiyapaakeni riyotaanewo Jesús, rosampitziri: “¿Tsika onkotsitakaanteka oyaari kiteesheriki Anonkoryagaantsiki?” <sup>18</sup>Ari rakanakeri: “Piyaate nampitsiki. Ari pitonkyotyaari apaani atziri, pinkanteri: ‘Ikantzi yotaanari: “Monkaatapaaka, nokowi niyaate pipankoki noimoshirenkero kiteesheri Anonkoryagaantsi, nontsipatyari niyotaanewopaini.”’” <sup>19</sup>Rimatakero riyotaanewo okaatzi ikantakeriri Jesús. Ronkotsitakaantake royaari kiteesheriki Anonkoryagaantsiki.

<sup>20</sup>Ari otsireniityaanake areetapaaka Jesús, saikapaake rowaiyaanira itsipatapaakari riyotaanewo ikaatai yini 12. <sup>21</sup>Ikanta rowaiyani, ikantanake Jesús: “Pinkeme nonkante, pikaatai yinira eeroka jaka, eenitatsi apaani pithokashitenane. Imaperotaty.” <sup>22</sup>Owashire ikantaiyanakani. Apaanipaini rosampitanakeri: “¿Naakama, Pinkathari?” <sup>23</sup>Rakanakeri, ikantziri: “Akaatakeria owaiyani, iri pithokashitenane. <sup>24</sup>Imaperotaty impeya jirika Itomi Atziri, iroowa

rosankenatakoitakeriri pairani. ¡Ikantamatsititziri pithokashitenane! ¡Itaka itzimaatsikaitantakari jirika!” <sup>25</sup>Ari riñaawaitanake Judas pithokashitantzachane, ikantzi: “¿Naaka yotaanari?” Ikantzi Jesús: “Irootake pikantakeri.”

<sup>26</sup>Eeniro rowaiyani raakero Jesús pan, riwetharyaawentakawo, itzipetowakero, ipayetakeri ryotaanewo, ikantziri: “Jiroka, poyaawo, nowatha ini.” <sup>27</sup>Raakotakero riraitziri, riwetharyaawentakawo, ipakotakeri ryotaanewo, ikantziri: “Piraiyeroni maawoini, <sup>28</sup>niraa inatzi jiroka, iro ooñaawontaperotairone aapatziyawakaantaiyaari, iro shitowaatsine rariperotantaitayaariri kaariperoshireri. <sup>29</sup>Pinkeme nonkante, eero nritaawo jiroka iroatzi paata impinkathariwentantaira Ashitanari, ari apiitairo ejatzi.”

### Ikenkithatakotakero Jesús rookanawentante Pedro

(*Mr. 14.26-31; Lc. 22.31-34; Jn. 13.36-38*)

<sup>30</sup>Ikanta rithonkanakero romampaakotari Pawa, jataiyanakeni tonkaariki otzishiki Olivo. <sup>31</sup>Ikantanakeri Jesús ryotaanewo: “Irootaintsi pookanawentaiyenani tsirenirikika. Rosankenaiteke pairani kantsiri:

Nitsitokeri kempoiiriri oweja, ari rithonkya ripookanake ipira.

<sup>32</sup>Iro kantacha arika nañagai, Galilea-ki piñaapaina.” <sup>33</sup>Ari rakanake Pedro, ikantzi: “Aritaikema rookanawentakemi itsipapaini, eero nimatziro naaka.” <sup>34</sup>Ikantzi Jesús: “Pinkeme nonkantemi, iroñaaka tsirenirikika tekera riñaakeeta tyaapa, mawa papitero pinkante: ‘Te niyotziri Jesús.’ Imaperotatyá.” <sup>35</sup>Ikantanake Pedro: “Eero nookanawentzimi, aritake ankaate ankame.” Ari ikantaiyanakeni ejatzi maawoini ryotaanewo.

### Ramana Jesús Getsemaní-ki

(*Mr. 14.32-42; Lc. 22.39-46*)

<sup>36</sup>Ikanta Jesús itsipatakari ryotaanewo, areetaiyakani Getsemaní-ki, ikantapaakeri: “Ari pisaiwake jaka, niyaatawakeeta naaka jantyaatsikaini namaña.” <sup>37</sup>Raanakeri Pedro itsipataanakeri apite itomi Zebedeo. Ari riraakoshiretapaaka Jesús. <sup>38</sup>Ikantzi: “Owamaimatatyana nowashirenka. Ari pisaiwakeeta eeroka jaka, tame ankakite.”

<sup>39</sup>Jataneentanake jantyaatsikaini irirori. Otziwerowapaaka, amanapaaka. Ikantzi: “Ashitanarí, pikowirika eeroka, pontsiparyaaakowentena onkaate nonkemaatsityaari. Iro kantacha eero pimatanawo nokowawetari naaka, iro pimate okaatzi pikowakaanari eeroka.” <sup>40</sup>Iroatzi ripiyashitantaari ryotaanewo, iñaapaatziri rimagaiyini. Ikantapaakeri Pedro: “¿Tema pikisashitawo piwochokine, pintspatena ankakite? <sup>41</sup>Pinkakite, pamaña, otzimikari piyenakaashitanewo. Osheki naaweta pikowawetari panterome kameethatatsiri, iro kantacha te pikisashiwineta.” <sup>42</sup>Eejatzi ripiyanaa

Jesús, amanapaa, ikantzi: “Ashitanarí, tekaatsirika nonkenakairo naaka eero nokemaatsiwaitanta, panterowa okaatzi pikowakeri eeroka.”<sup>43</sup> Ikanta ripiyapaa, eejatzi iñaapairi rimagaiyini, tema antawo okantaka iwochokine.<sup>44</sup> Ripiyaphitathanari, mawa ripiyaka ramana. Irojatzi rapiitapai ikantakeri inkaaganki.<sup>45</sup> Irojatzi ripiyashitantaapari ryotaanewo, ikantapaakeri: “¿Irojatzima pimagaiyini? Monkaatapaakaga raantaityaariri Itomi Atziri, ragaiteri kaariperoshireriki atziri.<sup>46</sup> Pimpiriinte, jame aatai. Okakitzimatapaake pithokashitenane.”

### Ragaitanakeri Jesús

(Mr. 14.43-50; Lc. 22.47-53; Jn. 18.2-11)

<sup>47</sup> Ikenkithawaiminthaitzi Jesús, areetapaaka Judas itsipawetapiintari. Osheki atziri itsipatapaakari, ramayetake rowathaamento, ripasamento. Rotyaantanewo rini reewaperore Imperatasorentsitaarewo, eejatzi rashি Itzinkami.<sup>48</sup> Ikantzitakari ketziroini ramanewo Judas pithokashitananeri: “Tsikarika itzimi nonthowootapaakeri, iriitake, potaiyeri.”<sup>49</sup> Ikanta rareetapaaka Judas, ripokashitapaakeri okaakiini Jesús, ikantapaakeri: “Yotaanarí.” Ithowootapaakeri riwethatapaakari.<sup>50</sup> Rosampitanakeri Jesús, ikantziri: “Asheninká, ¿litaka pipokashitziri?” Rotaiyaitapaakeri Jesús.<sup>51</sup> Ikanta apaani tsipatakariri okaakiini Jesús, inowikyaanakero rosataamento, rithatzinkitakeri ikempita inoshikanewo reeware Imperatasorentsitaarewo.<sup>52</sup> Ari ikantanake Jesús: “Powero posataamento, ripiyatzimikari. Tema ikaatzi thatzinkantatsiri, rithatzinkaitziri irirori.<sup>53</sup> Piyotzi eeroka, kantacha namañaari Ashitanari, ari rotyaantakeme osheki maninkariite kisawentenane.”<sup>m</sup> <sup>54</sup> Iroowa imonkaatantaiyaari okaatzi rosankenatakoitakenari pairani.”<sup>55</sup> Ripithokashitanakari Jesús ikaatzi pokashitakeriri, ikantziri: “¿Naakama koshintzi pamashitantanari powathaamento, pipasamento? ¿Tema piñaapiintawetana niyotaantzi tasorentsipankoki, kaari paantana?”<sup>56</sup> Arira imonkaatari okaatzi rosankenayetakeri pairani Kamantantaneri.” Ari rishiyayetanaka ryotaanewo, rookanawentaitanakeri Jesús apaniroini.

### Ipiyowentitari Jesús

(Mr. 14.53-65; Lc. 22.54, 63-71; Jn. 18.12-14, 19-24)

<sup>57</sup> Ikanta ragaitanakeri Jesús ipankoki Caifás, reewaperore Imperatasorentsitaarewo, ari ipiyotaiyakani maawoini Yotzinkariite itsipatakari Itzinkampaini.<sup>58</sup> Noshikacha neetsikeroini Pedro

<sup>m</sup> 26.53 Ikantaitziri jaka “osheki maninkariite”, 12 legión ikaatzi. Ikantakoitziri eejatzi jaka “legión” iriria Roma-satzi shekiperotatsiri rowayerite, arika inkaate 3000 aamaaka 6000 owayeri. Iritake iitaitziri legión.

royaatakowentakeri Jesús, irojatzi rareetantapaakari ipankoki reewaperore Imperatasorentsitaarewo. Kyaapaake pankotsiki itsipayetapaakari kempoyaantaneri, ikowi Pedro inkemakowenteri tsika inkantaiteri Jesús.<sup>59</sup> Ikanta reewarepaini Imperatasorentsitaarewo itsipatakari ikaatzi piyotainchari, raminawetayakani iita thaiyakotaarine Jesús ompoñaantyaari ritsitokakaanteri.<sup>60</sup> Te iñiimaita, ripokayewetaka osheki kowatsiri inthaiyakotaarime. Irojatzi ikatziyananakanari apite thaiyakotanakariri,<sup>61</sup> ikantanake: “Nokemiri naaka chapinki ikenkithawaitzi ikantzi: ‘Ari nontzimpookakero tasorentsipango, iro awisawetaka mawa kiteesheri, nithonkairo niwetsikairo.’”<sup>62</sup> Ari ikatziyanaka reewaperore Imperatasorentsitaarewo, ikantanakeri Jesús: “¿Litaka kaari pakanta? ¿Tema pikemiri okaatzi ikantakotakemiri?”<sup>63</sup> Irojatzi imairetake, te raki. Ari ishintsineentanakeri, ikantziri: “Paakoteri iwairo Kañaaneri Pawa, niyotantyaari imaperorika onkaate pinkantenari. ¿Eerokama Cristo, Itomi Pawa?”<sup>64</sup> Rakanake Jesús, ikantzi: “Irootake pikantakeri. Iroñaaka piñeeri Itomi Atziri risaikimotairi rakoperoki Pawa impinkatharitai. Piñeeri ripiyai inkenapai menkoriki.”<sup>65</sup> Ikanta ikemawake jewaperori, itzisagaanakero iithaare ikisanaka, ikantanake: “Piñaakero, raakowitzashitakari Pawa. Te ankowe itsipa kantakoterine. Pikemaiyakeni eeroka rithainkakeri Pawa.”<sup>66</sup> ¿Tsika pikantaiyinika eeroka?” Rakaiyanakeni, ikantaiyini: “¡Tzimataike iyenakaashitanewo! ¡Ontzimatye inkame!”<sup>67</sup> Irojatzi reewawootaitantanakariri. Itsipa kaposawootakeri. Itsipa pasawootakeri.<sup>68</sup> Rosampitzimaitari ikantziri: “Cristo, ¿tema Kamantantaneri pini, janjaatya pinkantena iita pasawaitzimiri?”

**Ikantzi Pedro: Te niyotziri naaka Jesús**  
*(Mr. 14.66-72; Lc. 22.55-62; Jn. 18.15-18, 25-27)*

<sup>69</sup> Ari risaikake Pedro jakakeroki, irojatzi oñaantapaakari rimperaitari, okantapaakeri: “¿Tema eeroka itsipata pairani Jesús Galilea-satzi?”<sup>70</sup> Osheki ñaakeriri Pedro roipianakero, ikantanake: “Te, te niyotziri iita pikantanari.”<sup>71</sup> Shitowaneentanake Pedro jakakeroki. Oñaapairi otsipa rimperataitari, okantapaakeri itsipayetakari: “Irijatzira jirika itsipatari pairani Jesús Nazaret-satzi.”<sup>72</sup> Rapiitanakero Pedro roipiyiro, ikantanake: “Apatziro riyotzi Pawa, te niyotziri naaka jirika atziri pikantanari.”<sup>73</sup> Tekera osamaniteeta, rapiitakeri ikaatzi itsipatakari ikantziri: “Eerokaga itsipatapiintari Jesús, Galilea-satzi pini, ariwaitakemi ikantziro riñaawaitzi.”<sup>74</sup> Ikantanakeri: “Té, te niyotziri jirika atziri pikantanari. Riyyotzi Pawa nothaiyarika, rowasanketainaata.” Ari riñaanake tyaapa.<sup>75</sup> Ikenkithashiretanairo Pedro ikantakeriri Jesús: “Tekera riñeeta tyaapa, mawa poipiyero, pinkante: ‘Te niyotziri Jesús.’” Shitowanake Pedro, antawoite riraawaitanaka.

**Ragaitanakeri Jesús Pilato-ki**  
*(Mr. 15.1; Lc. 23.1-2; Jn. 18.28-32)*

**27** <sup>1</sup>Okanta okiteeshetamanai, piyotaiyakani reewarepaini Imperatasorentsitaarewo itsipayetakari Itzinkampaini, ikamantawakaiyakani ritsitokeri Jesús. <sup>2</sup>Irojatzi roosoitantanakari Jesús, ragaitanakeri risaikira Poncio Pilato, jewarepero rini jirika.

**Ikamantakari Judas**

<sup>3</sup>Ikanta Judas pithokashitantaneri, riyotanake rowamaakaantashitakari Jesús. Antawoite ikenkithashiretanaka, jatake roipiyaniri iyorikite reeware Imperatasorentsitaarewo, eejatzi Itzinkampaini, <sup>4</sup>ikantapairi: “Jirika piyorkite. Te okameethatzi okaatzi nantakeri. Tekaatsi rante Jesús naakaantashitakari.” Ikantaiyanakeni irirori: “Iitaanitya eeroka.” <sup>5</sup>Romanatanakeri koriki janta tasorentsipankoki, rishiyaperotanakitya ripianaka, irojatzi rishirkantapaaka. <sup>6</sup>Ikanta reeware Imperatasorentsitaarewo, ragairi koriki, ikantaiyini: “Te ishinetaantsite ankempoyagairi koriki, tema iriitake apinatakeriri ritsitokantaityaariri.” <sup>7</sup>Ari rosampitawakaiyani: “¿Tsika ankanterika jirika koriki?” Ikantaiyini: “Jame amanantantyaari tsirepathari kipatsi, tsika inkitaliteri arika inkamayete kaari asheninkata.” <sup>8</sup>Irojatzi ironaaka iitaitziro jiroka kipatsi: “Iraantsipatha”. <sup>9</sup>Irojatzi imonkaatantakari rosankenatakeri pairani Kamantantaneri Jeremías, ikantake:

Ragaitakeri 30 ipewirya koriki,  
 Ikowaiyakerini icharinepaina Israel ripinaiteri,  
<sup>10</sup> Iri ramanantaitantakawori tsirepathari kipatsi,  
 Iro ikowakaakenari Pinkathari namanantero.

**Pilato rosampitziri Jesús**  
*(Mr. 15.2-5; Lc. 23.3-5; Jn. 18.33-38)*

<sup>11</sup>Areetaka Jesús risaikira reewaperori, rosampitawakeri, ikantziri: “¿Eeroka iwinkatharite Judá-ite?” Rakanake Jesús, ikantzi: “Irootake pikantakeri.” <sup>12</sup>Ikanta reeware Imperatasorentsitaarewo itsipayetakari Itzinkampaini, osheki ithaiyakowetapaakari Jesús. Te rakimaita irirori. <sup>13</sup>Irojatzi ikantantari Pilato: “Tema pikemi okaatzi ikantakoitzimiri?” <sup>14</sup>Irojatzi imairetake, te raki. Riyokitziiwentanakeri Pilato jirika Jesús.

**Riyakowentaitziri Jesús**  
*(Mr. 15.6-20; Lc. 23.13-25; Jn. 18.38-19.16)*

<sup>15</sup>Tzimatsi rametapiintari reewaperori: Maawoini osarentsi arika roimoshirenkyá Judá-ite, romishitowakaantzi apaani isheninka raakaantaitziri intzimerika inkoweri. <sup>16</sup>Eenitatsi itsipa Judá-ite

raakaantaitziri iita Barrabás, ikemakoitanewo rini jirika rantakero koweenkatatsiri.<sup>17</sup> Ikanta ipiyotaiyakan atziripaini, rosampitantzake Pilato, ikantziri: “¿Itaka pikowiri nomishitowakaanteri? ¿Iri Barrabás? ¿Iriima pikowiri Jesús iitaitziri Cristo?”<sup>18</sup> Riyotake Pilato ikisaneentashitaitari Jesú, iroowa raakaantitantariri.<sup>19</sup> Tema inkaaganki, okantakaantakeri iina, okantake: “Eero pikoshekawaitari eeroka kameethashireri. Osheki romishimpyaakena tsireniriki ominthaawashiryaaakena.”<sup>20</sup> Iri kantacha reeware Imperatasorentsitaarewo itsipatakari Itzinkampaini, rowatsimaakeri atziripaini, ikantaiyini: “Iri kameethatatsi romishitowaiteri Barrabás, iriima Jesú ritsitokaiteri.”<sup>21</sup> Irojatzi rapiitantanakawori reewaperore rosampitantzi: “¿Itaka pikowiri nomishitowakaantairi?” Ikantaiyini maawoini: “¡Barrabás!”<sup>22</sup> Ikantzi Pilato: “¡Tsika nonkanterika Jesús iitaitziri Cristo!” Rakaiyini atziri: “¡Pinkentakotakaanteri!”<sup>23</sup> Ikantzi reewaperore: “¿Eenitatsima kaariperori rantakeri?” Eeke ishintsitatz ikaaimaiyini atziripaini, ikantzi: “¡Pinkentakotakaanteri!”

<sup>24</sup> Ari ryotanake Pilato raminaashiwaita rosampitantzi, tema osheki iyatsimashirenka atziripaini. Ikaaimakaantake ñaa, iñagaitakeri maawoini ikiwaakotanaka, ikantanake: “Te naaka kowatsine nitsitokakaanteri jirika kameethashireri. Pikowirika eerokapaini, piyotaiyeroni.”<sup>25</sup> Ikantaiyanakeni atziripaini: “Nokowaiyini, naaka rookoite oitarika awisaintsine ejatzi inkaate nocharinepaini.”<sup>26</sup> Irojatzi romishitowakaantantaitaariri Barrabás. Iriima Jesús ripasatakanaitanakeri, riyakowentaitakeri inkentakoiteri.

<sup>27</sup> Ikanta owayeripaini, ikyakaakanakeri Jesús ipankoki Pilato iitaitziro “Pretorio”. Ari ipiyowentakari maawoini owayeri.<sup>28</sup> Raatonkoryagaitakeri Jesú, ikithaatitakeri kithaarentsi anashirikimawotatsiri oshiyawori ikithaatapiintari pinkathari.<sup>29</sup> Ramanthaitantaitakari kitocheetapo iitoki, rotaiyakagaitakeri rakoperoki sawookaaki. Irojatzi rotziwerowashitaitanakari Jesús rithainkimawaitaitziri, ikantaiyini: “¡Paakameethatawakeri iwinkatharite Judá-ite!”<sup>n</sup><sup>30</sup> Osheki reewawoowaitakeri, romposayinawaitantari sawookaaki.<sup>31</sup> Ikanta reshitakero ishirontawentawaitari. Raatonkoryagairi ikithaatakeriri inkaaganki, ikithaatairi iithaare, raanakeri inkentakoteri.

**Ikentakoitziri Jesús irojatzi ikamantakari  
(Mr. 15.21-41; Lc. 23.26-49; Jn. 19.17-30)**

<sup>32</sup> Ikanta ryaataianakeni, ritonkyotakari Simón poñaachari Cirene, ishintsineentaitanakeri inatanakero inkentakotantaityaariri

---

<sup>n</sup> **27.29** Iro rametapiintari pinkathari ramanthaitawo poreryaayetatsiri, rotaiyapiintziro ejatzi rakoperoki kotsirotonki.

Jesús.<sup>33</sup> Irojatzi rareetantakari tonkaariki oita Gólgota (akantziro aaka: Atziriiton.)<sup>34</sup> Ari ipakowetaitakari Jesús imere rowaitaitakero yepitentsi, ikanta ithowetawakawo eepichoki, te ririro.<sup>o</sup><sup>35</sup> Irojatzi ikentakotantaitakari. Ikanta owayeripaini raakero ikithaayetari Jesús, rowawisaawakaakawo, roshiyakaakero iñaaryaataita riyatantyaari iita ayerone. Ari imonkaatakari ikenkithatakotakeri pairani Kamantantaneri, ikantake:

Iñaaryaawentaitakawo noithaare,  
Rowawisaawakaayetakawo.

<sup>36</sup> Ari risaikawentaiyirini, ikempoyiiri. <sup>37</sup> Irojatzi rosankenaitantakari kantakaantakerori ikentakoitantakariri, okantzi: JIRIKA JESÚS, IRIITAKE IWINKATHARITE JUDÁ-ITE. Rontarekakoitakeniri jeñokiini ipatziitoki.

<sup>38</sup> Ari itsipatagaitakeri ikentakoitziri apite koshintzi, ikatziyakotaka apaani rakoperoki, itsipa rampateki. <sup>39</sup> Rithainkimayetakeri ikaatzi awisayetatsiri janta, rotiekayinata,<sup>p</sup> <sup>40</sup> ikantaitziri: “Eeroka tzimpookirori tasorentsipanko, iro awisake mawa kiteesheri piwetsikairo eejatzi. Eerokame Itomi Pawa ¿Oitaka kaari payiitanta ikentakoitakemira? Powawisaakotya.” <sup>41</sup> Irojatzi ikantakeri eejatzi reeware Imperatasorentsaarewo itsipayetakari Yotzinkariite, Fariseo-paini, eejatzi Itzinkamipaini, ikantaiyini:  
<sup>42</sup> “Rowawisaakotziri itsipa, ¿kaari rimatantawo rowawisaakotya irirori iriime iwinkatharite Israel-iite? Ari rowawisaakotakyaame ikentakoitakerira, aritake ankemisantakerime. <sup>43</sup> Rawentaawetakari Pawa, janjaatyta añaeri imaperorika retakotari ari rowawisaakotairi. Tema ikantapiintzi: ‘Naaka Itomi Pawa.’ ” <sup>44</sup> Rimatzitakawo koshintzipaini itsipatakari ikentakota, rithainkawaitakeri.

<sup>45</sup> Ikanta itampatzikatapaake ooryaatsiri, omapokashitapaaka otsirenikitanake, irojatzi ishaawiiteen ithaperotanakaga ooryaa.<sup>q</sup>  
<sup>46</sup> Ari ikaimanake Jesús shintsiini, ikantanake: “¡Elf! ¡Elf! ¿Lama sabactani?” (Iro ikantaitziri apaanteki aaka: “¡Pawá! ¡Pawá! ¿Litaka pookanawentantanari?”) <sup>47</sup> Ikanta saikawentakeriri, ikemawetawakari ikaimanake, ikantaiyini: “Pinkemerí, ikaimatziiri Elfas.” <sup>48</sup> Irojatzi rishiyantapaintari apaani, romitsitsiyaatapaintzi manthakintsi kepishaariki, rankowitakeniri sawoopankeki, rowaankakotakeniri ratsimiyaaatawakeme. <sup>49</sup> Ikantaiyini itsipa: “Añaawakeriita ari ripokake Elías rowayiitairi.” <sup>50</sup> Irojatzi rapiitantanakawo ikaimanai shintsiini, peyanaka.

**o** 27.34 Iro roitaitziriri atziri eero ikemaatsiwaitanta arika rowasanketaiteri. **p** 27.39 Iro rametayiarini Judá-ite rotiekayinata arika rithainkashiretante. Iro oshiyawori ametayiarini aakapaini, arika ookoteri atziri athainkashiretziri: “¡Piñaakero! ¡Pikemakero!”

**q** 27.45 Iro ikantaitziri pairani: riweyaanaka ooryaa 6, ari omapokapaakari otsirenikitanake irojatzi riweyaanaka ooryaa 9.

<sup>51</sup> Okanta tasorentsipankoki, sagaanake niyanki tontamawotatsiri ithatashiitzirori, apimankite okantanaka, opoñaanaka jenoki areetaka isaawiki. Antawoite omoyekanaka tankayetanake mapi. <sup>52</sup> Rithonka ripookakotanake kaminkari, osheki añaanaatsiri kameethashireri kamawetainchari. <sup>53</sup> Tema rañagaira Jesús, osheki añaayetaatsiri rishitowanairo omooki riyayetai nampitsiki tasorentsitsatsiri, roñaagayetantaawo. <sup>54</sup> Ikanta reeware owayeripaini itsipayetakari itsipa ikaatzi ikatziyawentakari Jesús, iñaakero omoyekanaka, iñaakero okaatzi awisayetaintsiri, antawoite ithaawanake, ikantanake: “¿Imaperowetyaama Itomintari Pawa jirika?”

<sup>55</sup> Enenitatsi janta tsinanepaini aminakotakeriri, irootake poñagainchari Galilea-ki oyaatziri Jesús, osheki amitakoyetakeri. <sup>56</sup> Jiroka okaataiinyi: María Magdala-sato, María inaanate Jacobo eejatzi José, ari isaikake eejatzi inaanate itomipaini Zebedeo.

### Ikitaitakeri Jesús

(Mr. 15.42-47; Lc. 23.50-56; Jn. 19.38-42)

<sup>57</sup> Okanta otsireniityaanake, ari ripokakeri apaani ashaagantzinkari poñagainchari Arimatea, iita José. Irijatzi riyotaapiintakeri Jesús.

<sup>58</sup> Ryaatashitakeri Pilato, ikantapaakeri: “Pishinetenari nonkitatairi Jesús.” Ikanta Pilato ikantakaantake raanairi inkitatairi. <sup>59</sup> Ikanta José iponatantakari Jesús kiteri manthakintsi. <sup>60</sup> Romonkyakotakeri owakeranatzira imoontashiitziri kaminkaripaini shirantaaki, roipinaakaantake antawoite mapi, rashitakotantakari. Piyanaka José. <sup>61</sup> Okanta María Magdala-sato, eejatzi otsipa María, isaikawentakeri tsika ikitaitakeri.

### Kempoyiiriri tsika ikitaitakeri

<sup>62</sup> Okanta awisanake riwetsikawentitawo kiteesheri rimakoryaantaitari, ari ryaatake reeware Imperatasorentsitaarewo itsipatakari Fariseo-paini janta ipankoki Pilato, <sup>63</sup> ikantapaakeri: “Pinkatharí, chapinki eeni rañaaweta amatawitantzinkari, nokemiri ikantzi: ‘Arika nonkamawetakya, iro mawatapaintsi kiteesheri, aritake nañagai.’” <sup>64</sup> Nokowi potyaante kempoyeerine irojatzi imonkaatantakyaari mawa kiteesheri. Aamaashitya ari ryaatake tsireniriki riyotaanewopaini, ragaateri. Inkantzimaitya: ‘¡Añagai Jesús!’ Arika rimatakero, ari owatsiperotya ramatawitante.” <sup>65</sup> Ikantanake Pilato: “Jirika owayeripaini, paanakeri, pinkanteri inkempoyeeri tsikarika okanta pikowiri eeroka.” <sup>66</sup> Ari ryaataiyanakeni, rontsirekakoyetakeri omooki. Ari risaikawent aiyakerini.

### Rañaantaari Jesús

(Mr. 16.1-8; Lc. 24.1-12; Jn. 20.1-10)

**28** <sup>1</sup> Okanta awisanake kiteesheri rimakoryaantaitari, ari okiteeshetamanai etapiintawori kiteesheri. Ari iyaatamanai

María Magdala-sato otsipatanakawo otsipa María aminairo jimpemikitaitakeri Jesús. <sup>2</sup> Ari omoyekanakari shintsiini kipatsi, tema rayiitapaakitzi inkiteweri maninkariite rotainkapaanero mapi rashitantaweeetakawori omoo, risaikantapaakawo. <sup>3</sup> Shipakirya ikantapaaka roshiyapaakawo ookathawontsi. Kitamaaniki okantaka iithaare oshiyawaitakawo okitamaatzi jiriniki. <sup>4</sup> Ikanta owayeripaini aminiriri, iñaawakeri, antawo ithaawaiyanakeni, oshiyawaitanakawo inkamanakityeeme. <sup>5</sup> Ikanta maninkariite, ikantanakero tsinanepaini: “Eero pithaawaiyini eeroka. Niyotake iri pipokashitzi Jesús ikentakoweetakari. <sup>6</sup> Te aňiiri jaka, aňagai. Tema ari ikantzitaka pairani. Pipoke, paminero tsika rowaweeetakari Awinkatharite. <sup>7</sup> Pipiyanake, pinkamantayetairi riyotaanewopaini, pinkanteri: ‘Aňagai Jesús, piyatai Galilea-ki, ari piňaayetairiri.’ Tema nokamantakemi.” <sup>8</sup> Okanta ipiyaiyanakani iyokitzii okantaiyanakani. Iro kantacha antawoite okimoshiretanake, ishiyashitanakari riyotaanewo onkamantayetairi. Ishiyaminthaita iyaate onkamantante, <sup>9</sup> ari roňaagaawo Jesús, riwethatawakawo. Iyaatashitanakeri okaakiini, otziwerowashitapaakari, awithakiyitzitapaakeri. <sup>10</sup> Iroatzti ikantantanakawo Jesús: “Eero pithaawi, piyatae pinkamantayetairi nirentziyetaari, ryaataita Galilea-ki, ari iňapaina.”

### **Ikantayetziri owayeri**

<sup>11</sup> Okanta ipiyaiyanakani tsinane onkamantante, jatanake eejatzi owayeripaini nampitsiki, ikamantapaakeri reeware Imperatasorentsitaarewo okaatzi awisaintsiri. <sup>12</sup> Ari ipiyotaiyanakani Itzinkamipaini, ikenkithawaitaiyanakeni. Ikaimakeri owayeri, ikantziri: “Jirika osheki nipayatemiri, <sup>13</sup> pinkantayeteri atziripaini: ‘Niyankiiteki tsireniri, nimaanake. Aamaaka ari ripokaiyakeni riyotaanewo, raanairi.’ <sup>14</sup> Arika inkemake reeware, naakaga kantakowentemine eero rowasanketantzimi.” <sup>15</sup> Rimatakero owayeripaini, raakeri ripinaitakeriri, rantakero okaatzi ikantitakeriri. Iroowa rantetakari maawoini Judá-ite jiroka, iroatzti iroňaaka.

### **Rotyaantziri Jesús riyotaanewo**

*(Mr. 16.14-18; Lc. 24.36-49; Jn. 20.19-23)*

<sup>16</sup> Ikanta 11 riyotaanewo Jesús, jataiyakeni Galilea-ki isaikira otzishi ikantakeri pairani Jesús ari iňagairi. <sup>17</sup> Ikanta iñaawairi, rotziwerowashitawaari. Iro kantacha tzimayetatsi kisoshirewentawairiri. <sup>18</sup> Ikanta ikempiyapaari Jesús, ikantapairi: “Impinkathaperoitaina inkiteki eejatzi kipatsiki. <sup>19</sup> Iro nonkantantemiri: Piyatae maawoiniki nampitsi, pinkemisantakaayetairi atziripaini, pithotyagairo maawoini. Arika inkemisantayetai, pomitsitsiyaayetairi, paakotairi iwairo Ashitairi, Itomi,

eejatzi Tasorenkantsi. <sup>20</sup>Piyotaayetairi atziripaini rimayetairo okaatzi nokamantayetakemiri. Ari nontsipatapiintaimi naaka, kisokero nowemi irojatzi paata ithonkantaiyaari kipatsi.” Ari onkantaitaatyeeyaani.